

ISAYA***Wudja wa Kolo***

1 Enelo ka Isaya, on'a Amoza, kakandenya dikambu dia Juda la Jerusalema lu nshi ya Uziya, Jotama, Ahaza la Hezekiya, khumi ya dikanga ya Juda.

2 Ulungu li, uki! we kete, uhuke tui! Ne dia Latuyalaka kata ati: Dimi lakaleshaka ana, ndu lakawaudiaka, Keli vo wakantombokwela. 3 Ngombe atulimbitalaka khumeto, Ndu punda elelu ka khumeto. Keli Isariyele haweyi nduku yema, Wudja ami hawkani yimba. 4 Yee, wudja a kolo, antu wuludi too la wutshu wa kolo, Diuhu di'atshi wa kolo, ana watutshaka akambu wa sonyi li! Vo wakaseke Latuyalaka, wakonyola l'Ekila l'Isariyele; Wakamo uma le mi, wakakaluya ekongokongo. 5 Okoko wana wukukinyu nsuyama ntu, Dia nyu nkolamela ntombokwelami? Ote tshe waya kandji ketu, Ndu utema tshe wambokomo. 6 Umak'esi a dikaka pulu ndu l'ote, kema ki, Paka puta, sudu la wimbo, Yo yatakon, yatombama ahondo kuyanga nkitama iso. 7 Wudja anyu wambuhandjwama, Esumba anyu wambutshumbama. Asi wedja wambole diango dia lu kete yanyu lu ashu anyu. Kete yambulanyema, asendji wambuyilembia. 8 Ona umuntu a Siona ambutshikala Uku lusamvu l'ekambo k'elua, Uku etumbu l'ekambo ka sele, Uku usumba wambudingama le atunyi. 9 Utunduyala Latuyalaka Kanga lulimbilimbi, Kuntutshikela djui y'atshikadi, Tshiki shu tutuyala uku Sodoma, Tutufana la Ngomora.

Etunelu ka Ditshelu Diakawakadimula

10 Nyuki diui dia Latuyalaka, Nyu ewandji wa Sodoma. Nyuhuke atui le elembe wa Unyashungu asu, Nyu asi Ngomora. 11 Katshami l'efula kanyu k'elambu kene? mbakati Latuyalaka. Dimi lambuheko elambu wa lutshumba a waumi w'ekoko La wata w'esongo wa ngombe. Dimi hangenangena lu dikila di'esongo wa ngombe, Kana di'ekoko, kuyanga dia waumi wa mbudi. 12 Akona akanyudjangela

olembe one wa nanya aseke ami L'akamelu, lam'atunyuyakaka la ntundu kami? 13 Tanyelaki elambu w'anyanya ntu; Upumu w'etshumbelu weli wononyi le mi, Talelu ta ngondo, nshi y'ekila, dietelu dia sanganya. Dimi halangi mena kolo kosohanyimi la sanganya y'ekila. 14 Utema ami mpetshaka talelu tanyu ta ngondo, La nshi yanyu ya waki y'ongenongeno. Yo yeko wutshu le mi, dimi lambuheko ndjemba. 15 Lam'ayunyediaka anya anyu, Dimi layunyaka ashu ami uma le nyu. Lam'ayunyufudiaka alombokelo, Dimi haluhukamaka anya anyu weli too la dikila. 16 Nyuyaotsha, nyuyaedia; Nyunya etsha anyu wa kolo uma lu ashu ami, nyukimo ntsha kolo. 17 Nyeki dia ntsha ololo; Nyuyangi akambu w'uluwanyi, nyukimanya usuyami. Nyusambweli ona etshiki ololo, Nyoteketele wadi aki udu.

18 Nyuyi kakiane, tukani yimba kame, mbata Latuyalaka. Kuyanga kolo yanyu yeli tilili, Yo yayuala wema uku pembe. Kuyanga yo yeko belaa, Yo yayuala diosa. 19 Naka nyu nyayetawo, ndu nyayukitanyia, Nyu nyayole diango di'ololo dia lu wudja. 20 Keli naka nyu nyayutuna ndu nyayuhedia, Nyu nyayudiakema la yombo, Ne dia unyo wa Latuyalaka mbakati osoku.

Elumbwelu la Etshungwelu ka Jerusalema

21 Ndi usumba wa kolamelu, Wambuyala umuntu kanga luseka li! Vo waki too la sambu k'ololo, Akambu w'ololo mbakayalaka loko. Keli kakiane aya adjakanyi atu loko. 22 Fesa kaye kambukadimo akedi, La wanu aye wambosohanyema l'ashi. 23 Ewandji aye wambuyala akanga w'ehedia, Ndu ambekesanedi wa evi. Vo tshe watulangaka mbu y'utshu, Watuyangaka diango dia sambu. Vo hawutusambulaka dikambu dia on'etshiki ololo, Ndu dia wadi aki udu luyi le wo.

24 Okone Khumadiondjo, Latuyalaka kanga lulimbilimbi, Kanga-Wulu l'Isariyele, kambuta ati: Kawo, dimi layumo uma lu usanu a wane watumpetshaka, Ku layosomboya

ISAYA

atunyi ami. 25 Dimi layukahe lunya lami, Layolelola akedi aye, Layukunyiya tumi ta mbulu tshe. 26 Dimi layukaluya embadi aye uku akiwo nshi ya ntundu, Ndu andaki aye uku akiwo l'etatelu. L'okongo diku we ayetama ati: Usumba w'ololo, ngelu ka kolamelu. 27 Siona ayushimbamela uma lu sambu k'ololo, Ndu wane wambukadimula etema loko, wayushimbamela uma l'akambu w'ololo. 28 Keli elanyelu kayuala le akanga w'ehedia, la antu wa kolo kame. Waku watutunaka Latuyalaka wayulanyema. 29 Vo wayutshama sonyi ne dia etamba wakanyalangaka. Ndu nyu nyayovo sonyi ne dia dikambo diakanyasonola; 30 Ne dia nyu nyayuala uku utamba weli la akatshi wambolengela, Ndu uku ekambo kaha la ashi. 31 Kanga wulu ayuyala uku adiyo wambuma La ulimu andi uku fuki ya dja. Vo ahendi wayulgula kame, Nduku untu layeya mbadima.

Diulelu Dia Ki Dia Latuyalaka Dia Wedja Tshe (Mik. 4:1-3)

2 Enelo kakeyi Isaya, on'a Amoza, dikambu dia Juda la Jerusalema.
2 Lu nshi yayayi, Ukungu wa luudu la Latuyalaka Ayushikikala ladiku di'ekungu. Vo wayediamma ladiku dia akuna. Ku wedja tshe wayokelaka utsha leko. 3 Wedja efula wayunelaka, wayutaka vati: Nyuyi tumbeli lu ukungu wa Latuyalaka, Utsha la luudu la Unyashungu a Jakoba. Ndi ayututshaa akambu andi. Ku shu tayokendakenda lu mbuka kandi, Ne dia olembe ayutumba uma la Siona, La diui dia Latuyalaka uma la Jerusalema. 4 Ndi ayuyala umbadi wa wedja, Ayusambula akambu w'antu wa wedja efula. Vo wayutshula tombo tawo kungu, La akonga awo tukuwa loho. Wudja omotshi hawembela wudja ukina tombo, Nduku antu haweka akambu wa ta ntu.

Latuyalaka Ayulumbuya Akanga w'Utaku

5 Wa lu luudu la Jakoba, Nyuyi, tokendekende lu usasi wa Latuyalaka.

6 We Latuyalaka akaseke wudja aye, khumbu ka Jakoba, Ne dia vo wakaluli la ditshelu di'uma le antu wa lu leke l'ehutwelu ka unya. Vo wambuyala wetshi w'awulu, uku asi Filistiya, Watekesanelaka la ana w'asi wedja. 7 Kete yawo ambulula too la fesa la paunyi. Ekundji awo kema la ekumelu. Kete yeli too la falasa, Ndu pusupusu yawo ya ta yaheyama mbala. 8 Wudja awo

wambulula too la dikishi. Vo watotemolaka ulimu w'anya awo, Ee, kene kakawatshi la pita yawo vame. 9 Antu wa kolo wayusuwo, Ku antu a waki wayukitshakitsama. Okone tadinanyiaki. 10 Oto lu dive, utuyashe lu ditshu, Ne dia woma a wuki wa Latuyalaka, La ne dia lutumbu la wuki andi. 11 Untu leli la endelu ka lahi ayuhuluyama, La kanga utaku ayukitshakitsama. Ku Latuyalaka ndame kayediamma lu lushi lako.

12 Latuyalaka Kanga lulimbilimbi eko la lushi, Lukundukitshakitsa akanga wa lukanyi la ndjambiya; 13 Etamba tshe w'etali wa la Lebanonwa watusimboka hwa-hwa, La etamba tshe wa la Bashana, 14 Ekungu tshe la akuna tshe w'etali; 15 Tangelu tshe di'etali, la ngeli tshe ya waki; 16 Mashua w'ashi tshe wa la Tarashishi, La kene tshe katongenyanengenya ashu. 17 Kanga utaku la kanga lahi wayukitshakitsama. Ku Latuyalaka ndame kayediamma lu lushi lako. 18 Dikishi tshe diayulanyema. 19 Lam'ayunela Latuyalaka dia ndjidimia kete, Antu wayutshama lu weuku w'ave, Ndu lu minga ya la kete, Ne dia woma andi, ndu ne dia lutumbu la wulu andi. 20 Lu lushi lako, antu wayosa dikishi diawo dia fesa ndu dikishi diawo dia paunyi, Diakawasele dia vo ntetemolaka; Wayutadikadjedi dji la tufukifuki. 21 Ku lam'ayunela Latuyalaka dia ndjidimia kete, Vo wayoto lu weuku w'ave ndu l'asa ave, Ne dia woma wa Latuyalaka, Ndu ne dia lutumbu la wulu andi.

22 Nyukimo mbekama le untu, Latutundjaka etenyi ka lumu l'ehembe andi, Na engo kendi na?

Elumbwelu ka Latuyalaka lu Juda la Jerusalema

3 Enda, Khumadiondjio, Latuyalaka Kanga lulimbilimbi, Utsha minya usuko tshe uma la Jerusalema la uma la Juda: Usuko tshe wa dia nde ndu w'ashi, 2 Kanga wulu, usi ta, umbadi, umvutshi, Wetshi wa diwulu la ehangamendi, 3 Elombodi w'alimbi akumi atanu, untu la lukumu, Undaki, utshudi wa komba la kanga aloho. 4 Dimi layuwasha akenda dia vo ndjala ewandji awo, Ndu ana w'ashashi wayuwaualela. 5 Ku antu wayusuyanya: untu tshe la unyandi, La untu tshe la usukanyi andi. Dikenda ayutakwela usumbi, La untu anyanya untu la lukumu. 6 Untu omotshi ayukimela onangu lu luudu la shi ati: We la ahondo, uyalu uwandji asu, Elanyelu kene kayali la tshina dia lunya laye.

7 Lu lushi lako, ndi ayukaluya diui ati: Dimi haletawo ndjala wetshi, Ne dia ma la ahondo kema lu luudu lami; Tanyumbidjaki uwandji wa wudja. 8 Jerusalema ambulanyema, La Juda ambuhandjo, Ne dia aui awo la etsha awo watotombokwelaka Latuyalaka, Watudjaka ashu andi wa lutumbu tofwefwe. 9 Wuhu wenama dundji diawo, mbeli emenyi dikambu diawo, Watusanya kolo yawo uku Sodoma, hawuyishe. Fono kayali l'etema awo! Ne dia vo wakayangela unungu.

10 Nyutaki nyati: Antu w'ololo wayena olo, Ne dia vo wayole elua wa etsha awo. 11 Fono kayali le untu a kolo! ndi ayuhumoka lukulu l'engeno, Ne dia vo wayufuta uku weli etsha andi. 12 Wudja ami li, akenda watunyusuyaka, Ndu amantu watunyulelaka! Wudja ami li, wane watunyolombolaka, Watunyunganyiaka, watulanya mbuka yanyu.

13 Latuyalaka atunelaka dia mama l'antu, Ndi atemalaka dia numbuya wedja. 14 Latuyalaka ayoto l'elumbwelu Ndi la dihangamendi dia wudja andi la ewandji awo ati: Nyu mbakali elua wa l'ekambo k'elua. Diango diakanyahotola asi wula dieko lu mvudu yanyu. 15 Okoko wana watunyohotshahotshaka wudja ami? La mbatshatsha dundji di asi wula? Mbakawambula Khumadiiondo Latuyalaka Kanga lulimbilimbi.

Elumbwelu le Ana Amantu wa la Siona

16 Latuyalaka akati ati: Ne dia esekaseka w'amantu wa la Siona weko la utaku, Watusekusekuyaka kingu yawo lam'atuwokendakenda. Watolengiyaka ashu awo, Watosolaka lokendo, ndu watusakanyaka ayaka wa l'ekulu, 17 Khumadiiondo ayete ete w'esekaseka w'amantu wa la Siona kaya tshu; Latuyalaka ayatshika utakataka. 18 Lu lushi lako, Khumadiiondo ayunya dimena dia ekoma awo wa l'ekulu, etei wa dive, la ehakito; 19 dia tungunga t'atui, ekoma wa l'anya, la apupela; 20 dia tambala dia l'ote, kangi ya l'anya, eya, eshete wa malashi, la eshidika; 21 dia Pete y'amatu, la ashingu wa l'ehembe; 22 dia ekutu wa nshi ya waki, shiwawu, akoti, la atapa wa nkamelaka; 23 di'ahondo wa saa-saa, ahondo wa linene, tudingadinga ta l'ote, la ekumbo. 24 Lu dihuli dia malashi, ayuyala ehondelo; Lu dihuli di'uya, okodi; Lu dihuli di'aputu, diwandji; Lu dihuli di'ahondo w'amena, elotelok'akutu; La lu dihuli dia dimena,

sonyi. 25 Waumenyu wayudiakema la tombo, Ndu ahuka anyu lu ta. 26 Asuku wa Siona wayuyala la alelu, ndu la utanda. Vo wayohenyahenyama wulu, wayutadjaseka udjasedjase la kete.

4 Lu lushi lako, amantu esambeli wayukimela pami otoi, wayuwutela vati: Shu tayolekaka ma diasu hita, ndu taylorotaka ahondo asu hita. Keli dikambu otoi, etawo dia shu mbetama lukumbu laye; utunyiya sonyi kene!

Lutumbu la Jerusalema la lu Nshi Yayavi

2 Etena kako, dimonga dia Latuyalaka diayuyala dimena ndu la lutumbu. Elua wa la kete wayuyala ololo ndu dimena le asi Isariyele wambuhanda. 3 Okone atshikadi wa lu Siona, la wa lu Jerusalema, wayetama vati: Ekilami, untu l'untu lambufundama l'atei a wasena wa lu Jerusalema, 4 lam'ayotsha Khumadiiondo esekaseka w'amantu wa lu Siona mindu yawo, ndu lam'ayundedia dikila dia Jerusalema uma l'ununug adio la efufelu ka sambu k'ololo, ndu k'etshumbelu. 5 Latuyalaka ayukumba Ukungu a Siona la ahuli adio wa sanganya la dingi dia dinga la yanyi, la lumbi la dja l'utshu, ne dia lutumbu tshe layukumbama. 6 Etumbu kayuyala leko dia ndjala dedi la yanyi, la dia ndjala dihuli di'eshamelu uma lu ngimbi la mvula.

Wela w'Ekambo k'Elua

5 Dimi layimbela unangimi ami Usambu ne dia ekambo kandi k'elua nti:

Unangimi ami aki la ekambo k'elua Lu dikuna di'eteto efula. 2 Ndi akafusi kete, akanya ave uma loko. Ndi akune kuno y'ololo leko; Ndi akahiki etangelu l'atei ato. Ndi akakengi mbaka ka mbidjaka ashi w'elua. Ndi akalungamela dia to nto elua w'ololo, Keli to kakato elua w'ululu.

3 Kakiane nyu asi Jerusalema, la nyu apami w'asi Juda, Dimi lambunyosengasenga nti: Nyutusambuli dimi la ekambo kami. 4 Dikambu diakona diutumutshanta l'ekambo kami La diku dia akambu wakamatshi leko? Okoko wana, lam'akamalungamela elua w'ololo Ku to nto elua w'ululu? 5 Kakiane dimi layukutela Kene kayumutshela ekambo kami. Dimi layuhandjula lukumbu lato, Ku to kayutshumbama. Dimi layunyukula peli diato, Ku to kayukamamela la ekulu. 6 Dimi layukitshika anyanya, Aha kihimbula tahi, aha kikamba. Ku adungu la atende wayudwanela leko, Layudjangela wangi,

diahā vo nkiloshiya mvula; 7 Ne dia ekambo k'elua ka Latuyalaka Kanga lulimbilimbi, Keli khumbu ka Isariyele, La apami w'asi Juda weli lukuno lakandalangaka. Ndi akalungamelā sambu k'ololo, Keli ndi akenyi paka etshulwelu ka dikila. Ndi akalungamelā akambu w'ololo, Ku akuki alelu atu.

Mananu Yakawadji Antu a Kolo

8 Mananu kayali le waku watumamanyaka Luudu lomotshi la lukina, Ndu ekambo kemotshi lakekina, Edja ndu dihuli hadiutanema ntu. Ku vo vame wayudjase l'atei a wudja. 9 Dimi lakuki Latuyalaka Kanga lulimbilimbi, ata ati: Mete mete, mvudu efula yayutshikala hwe, Ya waki ndu y'amena, yaha la untu loko. 10 Dikambo dikumi di'elua diayutumba paka bata otoi k'ashi w'elua. Dinela dia homera otoi ka wuhu ayuyala paka efa otoi.

11 Mananu kayali le waku watetoka k'olomo la pindju Dia ntayangi dinono dia wulu, La watutshikalaka leko ndu l'utshu, Edja ndu wunu ambuwdajuya. 12 Losese, dikimbi, ngomo, pungi la wanu, Watuyalaka lu alambu awo. Keli vo hawutudjaka yimba l'ulimu wa Latuyalaka. Ndu hawutukanaka yimba l'ulimu w'anya andi. 13 Uma lu dikambu ne, wudja ami wayundama utsha lu fumbi, Ne dia vo kema la ewu. Antu awo wa lukumu wayuva la ndjala, Ndu ului awo a wuki wayuma tu la pusa k'ashi. 14 Okone Udimu a Pengandu atufudiaka saki, Atokokolaka unyo awo hwe. Ku lutumbu la Jerusalema la ului ayo w'antu watuhuloka utsha leko, Ndu ongenongeno ayo la one latongenangenaka loko. 15 Untu a kolo ayukutema, la untu a wuki ayukitshakitschama, Ndu ashu w'akanga a lahi wayukitshakitschama. 16 Keli Latuyalaka Kanga lulimbilimbi atutumbwamaka la sambu k'ololo, La Unyashungu atuyaenyaka ekila lu ololo. 17 Ku ana w'ekoko wayuhuhulaka adiyu uku lu dihuli diawo, Ndu angendangenda wayole diango uma l'ahuli w'elanyelu w'akanga w'enfonyi.

18 Mananu kayali le waku watukutulaka kolo la ekodi wa kashi, La kolo la eshinga wa wulu wa lu pusupusu; 19 Watutaka vati: Latuyalaka asamanya, Angasanya ulimu andi, dia shu mbéna! Didjangu dia l'Ekila l'Isariyele diayi, Diasukani dia shu dilimbitela. 20 Mananu kayali le waku watetaka kolo ololo, la ololo kolo; Watukadimulaka udjima usasi, la usasi udjima; Ndu watukadimulaka ululu mpe, la mpe ululu! 21 Mananu kayali

le waku watuyaenaka akanga a tumba lu ashu awo, Ndu watuyakanaka akanga a bewu! 22 Mananu kayali le waku wambuyala ahuka lu noshia dinono dia wulu; 23 Watuyindjaka antu wa kolo ne dia mbu y'utshu, La watunyaka sambu k'ololo uma le untu laha la unungu! 24 Uku atutshumbaka shasi ya dja nengese, Ndu uku atutshumbaka lumbi la dia adiyu wambuma, Okone edu awo wayohonda, ndu alelbo awo wayudjanganra uku ditshu; Ne dia vo wakatuni elembé wa Latuyalaka Kanga lulimbilimbi, Ndu wakonyola diui dia l'Ekila l'Isariyele. 25 Okone kele ka Latuyalaka kambufulanela le wudja andi. Ndi ambusimbula lunya landi dia mbasuya; Ekungu wambudidima; Ndu edu awo wambuyala uku ndjetete lu esese. Kuyanga akambu aso tshe wakatshama, kele kandi kumumo. Ndu lunya landi lakasimbwi tshu.

26 Ndi ayuhanelā wedja w'etalī ekuhu ka koi, Ndu ayudela waku weli la kuma ya kete pungi. Ku vo wayuya esadi, esadi. 27 Nduku layokomo, nduku layutakanaka Nduku layuningongingo, kana ndala djo; Nduku uya w'untu wayotewo, Nduku okodi wa sabata wayuhimbo. 28 Pitu yawo yeli sodi, La eta awo wamblemama. Akaka wa falasa yawo weko uku ave, La etshimbi wa pusupusu uku punganendji. 29 Dikita dia wo diayulyala uku dia tambwe. Vo wayudikita uku esongo wa tambwe; Vo wayukhungula, wayunda nyama kawo, Wayukitolu ka nduku untu layeya nkihotola. 30 Lushi lako, vo wayukhungula la diku diato Uku atudikitaka asukhu w'ashi a waki. Lam'ayenda untu kete, ndi ayena udjima la okei; Usasi ayukadimo udjima lu wang'i.

Enelo la Leta la Isaya

6 L'eleku kakavu khum'ekanga Uziya, dimi lakenyi Khumadiiondjo udjashi lu kitu ka diuelu ladiku dia loyenga l'utali, ku soso ya dihondo diandi yakaludia etemwelo. 2 Ladiku diandi kakemadi Aserifu. Userifu la Usarifu aki la ahafu asamalu: akakumbi elundji la ahendi, akakumbi ekulu la ahendi, ku akafumbo la ahendi. 3 Vo wakawelanelā, wata vati: Ekila, Ekila, Ekila eli Latuyalaka Kanga lulimbilimbi, kete tshe yambulula la lutumbu landi! 4 Atshina w'asuku wakasukasuka una lu aui wakawahangohango, la luudu lakakhudungana la dinga. 5 Okone dimi lakati nti: Ye! nduku engo kekimi; dimi

lambusumbo, ne dia kanga elomo wa mindu kemi, latudjaseka l'atei a akanga w'elomo wa mindu, ne dia ashu ami wambena Khum'ekanga, Latuyalaka Kanga ulimbilimbi. 6 Aserafu omotshi akafumbo uya le mi, ukimedi dikalanga dia dja lu lunya landi, diakandose la lumanu uma l'ediakelu. 7 Ndi akamamedio l'elomo ami, akati ati: Dio diambumamema l'elomo aye. Uhedia aye ambunyema, la kolo kaye kambudimanyema.

8 Ku lakuki diui dia Khumadiondo ati: Ayumutuma na? Ayututshwela na? Ku dimi lakati nti: Dim'one, untumi. 9 Ku ndi akati ati: Tshoka, tuteli wudja one wati: Mete nyu nyatukaka, keli hanyumani fundu. Mete, nyu nyatenaka, keli hanyulimbiteda. 10 Ununya etema w'asi wudja one, uwaete atui wulu, udishi ashu awo, Ne dia wo watukena l'ashu awo, watukuka l'atui awo, Watukumana fundu l'etema awo, watukukadimo ku vo kono. 11 Ku dimi lakambula nti: Khumemi, edja ndu kaandi? Ku ndi akakaluya diui ati: Edja ndu esumba wambulanyema, wambuyala aha la antu; Edja ndu mvudu yambuyala aha la untu; Edja ndu kete yambuyala shenga tshu; 12 Edja ndu Latuyalaka ambotola antu etali, ndu ahuli efula wa lu wudja wambuyala shenga. 13 Kuyanga etenyi ka dikumi kayutshikala, to kayulanyema l'etena kawo. Keli, uku atutshikalaka dihikeli di'etamba a waki wakakotama, Osoku mbayutshikala wuhu w'ekila lu wudja one.

Aui wa Isaya le Ahaza

7 Lu nshi ya Ahaza, on'a Jotama, on'a Uziya, khum'ekanga ka Juda, Rezina, khum'ekanga ka Suriya, la Peka, on'a Remaliya, khum'ekanga ka Isariyele, wakatshu dia ntolosha Jerusalema, keli vo kumbuya mbalembia. 2 Wakayutela khumbu ka Davidi vati: Asi Suriya wambudja la asi Efarayima sheki. Ku utema wa Ahaza la etema w'asikandi wakasutshasutshama uku atutshasutshamaka etamba la lopepe. 3 Latuyalaka akatela Isaya ati: Unela, we la on'aye Sheara-Jashuba, la ntuhumana la Ahaza, utsha l'ekumelu ka wato w'uduwa wa ladiku, utsha l'ekambo k'uminyudi w'ahondo lu alangi. 4 Utuwuteli wati: Uyakimeli, uyaliki, tukaki woma, tateki sulu, ne dia kuma hyendi ya difuku dia dja yatuto dinga nye. Tukaki woma ne dia kele ka mamba ka Rezina la asi Suriya la ka ona Remaliya, 5 asi Suriya, Efarayima la on'a Remaliya wambudja sheki ya nkutshela kolo vati:

6 Tutolosha asi Juda, tuwaukia woma, tolembia usumba awo, tudji on'a Tabele khum'ekanga leko. 7 Okone mbata Khumadiondo, Latuyalaka ati: Dikambuso hadiukuma, hadiutshama, 8 Ne dia Damaseke eli ote wa Suriya, La Rezina eli ote wa Damaseke. (L'okongo wa deku akumi asamalu la tanu, Efarayima ayuhandjwema, huyala wudja ntu) 9 Samariya eli ote wa Efarayima, La on'a Remaliya eli ote wa Samariya. Naka nyu hanyetawo, mete nyu hanyushikikala.

10 Latuyalaka akateketa la Ahaza ntu ati: 11 Olombe djimbitelu uma le Latuyalaka, Unyashungu aye, uyilombe, lu ahuli wa l'esi kana lu ahuli wa la diku. 12 Keli Ahaza akakaluya diui ati: Dimi halombe engo kana mpimba Latuyalaka. 13 Ku Isaya akati ati: Nyu khumbu ka Davidi, nyulungi, dikambu dia tshitshe mbedio dia nyu mpekuwa antu, ndu dia nyu mpekuwa Unyashungu ami uka? 14 Okone Khumadiondo ndame ayunyusha djimbitelu. Enda, usesekaseka a umuntu ayutsho diemi, ayuta ona pamii, ayuwole lukumbu ati: Emanuele (kitshimudi ati: Unyashungu eko la su.) 15 Ndi ayole mateka la usanga, edja ndu ndi ambeuya ntuna kolo la nsonola ololo. 16 Ntundu ona ako ateyi ntuna kolo la nsonola ololo, kete ya khumi ya dikanga hyendi yayutunama. 17 Latuyalaka ayukenya, we la wudja aye la khumbu ka sho, akambu wahatayala nduku lushi umaka lushi lakangana Efarayima uma la Juda ndu khum'ekanga k'Asuriya.

18 Lushi lako, Latuyalaka ayeta tshingu uma la kuma ya kushi ya Edjibitu la ndjui uma lu kete y'Asuriya la hyungi. 19 Yo yayuya, yayuyahema yo tshe lu minga ya hwe, lu weuku w'ave, lu etamba w'atende ndu lu akumbu tshe. 20 Lushi lako, Khumadiondo ayôhelola divu dia l'ote, diosa dia l'ekulu, ndu loledu la luhayu lakandasumbi uma la wedi a Ndjali, khum'ekanga k'Asuriya. 21 Lu lushi lako, untu l'untu ayulama osongo wa ngombe la ekoko ehendi. 22 Awele wayuyala efula, la untu l'unteu ayole mateka, ne dia untu tshe ayole mateka la usanga wayutshikala l'atei a kete. 23 Lu lushi lako, lu ahuli tshe waki ekodi w'elua w'ushinga wa toshekele ta fesa kinunu, ayutumba adungu la atende. 24 Paka la uta la pitu mbayukuma untu leko, ne dia kete tshe ayuyala la adungu ndu la atende atu. 25 We hukuma ntu lu akuna tshe wakawakambaka la lungu, ne dia woma w'adungu la atende. Vo wayuyala ahuli wa ngombe la ekoko

mbikamelaka.

Ukaki Latuyalaka Woma

8 Latuyalaka akamvutela ati: Ose ehasi ka wuki, ufundi ladiku diato l'ufundelu w'ololo wati: Mahere-Shalala-Hashi-Baza (kitshimudi ati: Diango dia lohotola diatshu esadi, diango diakawambi diasamanya.) 2 Dimi lakatshu la emenyi w'ololo Uriya, olombedi, la Zakariya on'a Jeberekkiya. 3 Dimi lakeyana la wademi, umvutshi a umuntu. Ku ndi akatshu diemi, akuti ona pam. Ku Latuyalaka akamvutela ati: Uwole lukumbu wati: Mahere-Shalala-Hashi-Baza. 4 Ntundu ona ateyi mvuta ati: Papa! kana nyomi! ekundji wa Damaseke la diango dia lohotola dia Samariya diayembama la ntundu ka khum'ekanga k'Asuriya.

5 Latuyalaka akateketa la mi ntu ati: 6 Ne dia wudja one wakatuni ashi wa la Shiloa, watokelaka okoke ndu watongenangenaka lu akambu wa Rezina la on'a Remaliya, 7 enda, Khumadiondjo aya kediya ashi wa wulu ndu efula uma lu Ndjali, khum'ekanga k'Asuriya la lutumbu landi tshe. Ashi ako wayulula lu ekedji awo tshe, wayudiangana ladiku di'ekenge awo. 8 Vo wayoto lu kete ya Juda, wayufulanela, wayuyala efula, wayukuma pulu ndu lu kingu. Edianganelu k'ashi ako kayukukanelu la kete yaye tshe, we Emanuele!

9 Nyudi tukuku ta ta, nyu wedja. Ku nyo nyayatshatschema. Nyuhuke atui, nyu tshe uma lu wedja w'etali. Nyukikitsha eya, nyayatshatschema. 10 Nyudji sheki, ku yo yayuyala anyanya. Nyuti diui, ku dio diayuyala uyalayala, Ne dia Unyashungu eko la su.

11 Okone Latuyalaka akamvutela la diui dia wulu, akambetsha diaha dimi nkendakenda lu mbuka ka wudja one. 12 Ndi akamvutela ati: Tetaki wati: Sheki, kene tshe keta wudja one vati: Sheki. Tanyukaki kene kukawo woma, woma, kana mbate asulu lu dikambu diako. 13 Nyete Latuyalaka Kanga lulimbilimbi Ekila, nyuwukaki woma ndame, nyateki asulu lu dikambu diandi ntu. 14 Ndi ayuyala etemwelo, dive dia ntakanya, la dive dia djewoki lu mvudu hyendi ya Isariyele, ndu djunga l'otei le asi Jerusalema. 15 Antu efula wayutakana loko. Vo wayoko, wayatshatschema; ee, vo wayutala, wayundama. 16 Ombe omenyi ami, udiji wetshelu l'atei w'andjedi ami. 17 Dimi layukungela Latuyalaka, latushelaka luudu la Jakoba elundji kandi. Ku layükungela.

18 Enda, dimi la ana wakambisha Latuyalaka teko tulimbitelu ndu ambewudi l'atei Isariyele, uma le Latuyalaka Kanga lulimbilimbi, latudjaseka lu ukungu wa Siona. 19 Lam'ayuwunyutela vati: Nyutuyangi wane watoteketshaka djimu ndu wetshi w'awulu watendjaka, watudjoka, wudja hawuhumbi nyanga Unyashungu awo uka? Ololo vo mumbwela wasena akambu le wane wakavu uka? 20 watshu le olembé ndu le omenyi! Naka vo hawoteketa aui aso, mete, usasi hawene le wo ntu.

21 Vo wayeketo lu kete lu lunyangu la ndjala. Lam'ayuwudienla la ndjala, vo wayuka yenyi, wayoloka khum'ekanga kawo la Unyashungu awo. Vo wayedia dundji diawo utsha ladiku. 22 Vo wayenda la kete, wayena paka asui, udjima, la okei. Okone vo wayusukwama utsha lu udjima a tshududu.

Eutwelu k'Uwandji wa Ki la Diulelu Diandi

9 Keli okei hawutshikala pundju lu kete yakasuyama wulu. Lu nshi ya ntundu Unyashungu akakumbi kete ya Zebuluna la kete ya Nafetali la sonyi. Keli lu nshi yayayi, ndi ayukumba kete ya l'umamu w'uduwa, ya la wedi wa Jorodana la lutumbu, ee, Ngalili ka wedja. 2 Wudja wakakendakenda l'udjima, Wakenyi usasi a wuki. Usasi ambohetela waku wakadjaseka lu kete, lu didjidji dia nyoi. 3 We ambuhamia wudja otekoya, Ambufudia ongenongeno awo. Vo wambongenangena la ntundu kaye, Uku atongenangenaka antu lu nshi ya dinela, Ndu uku atongenangenaka antu dia nkahaha diango dia lohotola. 4 We ambulanya lokoho laki wutshu le ndi, Ukalimba wakôkomolaka l'okongo, la ohehela wa one lakusuyaka, Uku lu lushi la Midiyana. 5 Eloto tshe watolotaka usi ta lam'endi l'atei wa ta, Ndu ahondo wungitwami lu dikila, Wayukadjema lu lumbi, wayutshumbama la dja,

6 Ne dia wambututela ona, wambutusha ona pam. Diulelu diayuyala lu aheka andi. Wayuwole vati: Undaki a Mamba, Unyashungu a Wulu, Shesu ka Pundju, Uwandji wa Ki. 7 Diulelu diandi diayutahamanelaka, La ki kandi huyala l'ekumelu lu kitu ka Davidi, ndu lu diulelu diandi, Dia dishikike la dikikitsha uma lu akambu w'usimbwi, Ndu uma lu sambu k'ololo, umaka kakiane edja ndu pundju. Saki ka Latuyalaka Kanga lulimbilimbi kayutsha osoku.

Kele ka Latuyalaka le Isariyele

8 Khumadiiondjo akatumela Jakoba diui, La dio diakakumi le Isariyele. 9 Antu tshe wayeya, Ndu Efarayima la asi Samariya, Wane watutaka l'utaku la etema a wulu vati: 10 Atafadi wambukungo, keli shu tayuhika l'ave. Etamba wa khumu wakakotama, Keli shu tayne elundu lu ahuli awo. 11 Okone Latuyalaka ayuwauniya apetshi wa Rezina dia ndo la wo; Ndi ayuwatomboshiya atunyi awo. 12 Asi Suriya lu leke l'ehutwelu, La asi Filistiya lu leke l'edjelu ka unya, Ku vo wayumana Isariyele l'enyo hwe. Kuyanga osoku, kele kandi hakitakita, Ndu lunya landi lakasimbemadi.

13 Keli wudja hawukadimo le one latásuyaka, Kuyanga nyanga Latuyalaka Kanga lulimbilimbi. 14 Okone Latuyalaka akahimbula ote la wela, Dianga la sopo lu lushi otoi uma le Isariyele. 15 Ehangamendi la kanga lukumu welli ote, Ku umvutshi latetshaka kashi eli wela. 16 Wane watolombolaka wudja one watuwunganyiyaka; La wane watetawoka nombwama, watulanyemaka. 17 Okone Khumadiiondjo hangenangena dia elongo awo w'apami, Kuyanga mbuka ana awo wa ditshiki kana wadi waki edu awo ketshi. Vo tshe welli amonyodi la atshi wa kolo, Ndu enyo awo tshe nteketaka oteketekeketa. Kuyanga osoku, kele kandi hakitakita, Lunya landi lakasimbemadi.

18 Koloatohetaka uku ndu, Yatutshumbaka adungu la atende. Yo yatutshumbaka akanda wa l'ukunda, Ku vo watumbelaka lu dinga. 19 Uma lu kele ka Latuyalaka Kanga lulimbilimbi, Mbatutshumbamaka kete, Ku antu watuyalaka uku kunyi ya dja, Nduku untu ayuhandja onangu. 20 Vo wayunda lu lunya la pami, ku weki la ndjala; Ndu wayole uma lu wedi wa lomoso, keli wataluti. Vo tshe, untu l'untu ayole umunyi w'usikandi. 21 Manase ayole Efarayima, la Efarayima, Manase, Ku vo ahendi wayolosha Juda. Kuyanga osoku, kele kandi hakitakita, Lunya landi lakasimbemadi.

10 Mananu kayali le waku watudjangaka adjangu wa kolo, Ndu le afundji watufundaka akambu wahasimbwi, 2 Dia nyima uhumbi sambu k'ololo, La dia impotola asi wula wa lu wudja ami ndjadjasela kawo, Dia wadi waki edu ndjala diango diawo dia lohotola, Dia vo mbete ana wa ditshiki diango dia dimbu! 3 Kayunyutsha lu lushi l'elumbwelu, Lam'ayuya elanyelu le nyu

uma l'etali? Le na ayunyulawo dia nkundja ekimanyelu, Ndu lendi ayunyutatshiki lutumbu lanyu? 4 Vo wayukutakuta l'ului w'asi lukanu, Wayoko l'ului a waku wambudiakema. Kuyanga osoku, kele kandi hakitakita, Ndu lunya landi lakasimbemadi.

Latuyalaka Ambukamba Ulimu l'Asi Asuriya

5 Asuriya eli ohehela wa kele kami. Ududu ami eli ukalimba lu lunya landi. 6 Dimi layútuma dia ntolosha wudja w'akanga a dionyo. Dimi layuwudjangela dia ndi ntsho le wudja wukami kele, Dia ntohotola la mumba diango diawo, La mbahotshahotsa l'ekulu awo uku loteké la l'esese. 7 Keli khum'ekanga k'Asuriya hakani osoku, Ndu oso kema tukanyi t'utema andi. Keli ndi la esangweyu ka nanya, La ka nshila wedja efula ushiki; 8 Ne dia ndi atutaka ati: An'ami waha khumi ya dikanga tshu uka? 9 Kalano, aha uku Karakemishe? Hamata, aha uku Arapada? La Samariya, aha uku Damaseke uka? 10 Uku akamakumia lunya lami lu waulelu wa dikishi, Lene aki dikishi dia losela ndeka dia Jerusalema dia la Samariya. 11 Uku akamatshela Samariya la dikishi diawo, Halutshela Jerusalema la dikishi diawo osoku uka?

12 Okone lam'ayushidiya Khumadiiondjo ulimu andi tshe l'Ukungu a Siona ndu la Jerusalema, ndi ayusuya khum'ekanga k'Asuriya, ne dia djawudi la utaku andi. 13 Ndi akati ati: Dimi lakatshi akambu ane uma lu wulu wa lunya lami, Ndu uma lu yimba yami, ne dia dimi leli kanga ewu. Dimi lakasekola elelu wa wedja, Lakahotola ekundji awo. Uku dihuka dia wulu mbakamalembia wane wakadjase lu kiti ya waulelu. 14 Lunya lami lakashula ekundji wa wedja efula. Uku atuwudulala ekeli wtshiki fudu, Mbakamasanganya wa la kete tshe. Ku nduku lakahuhanya dihafu, Kuyanga mbasula elomo, kana mbawana. 15 Undi, kenge yayutakula ladiku dia one lakota la yo, Kana nso ndjatumbulauleki one lahiimbula la to? Uku ukuki ohehela nkimela one latuswidiaka, Kana uku ukuki ukalimba munyia one laha utamba!

16 Okone Khumadiiondjo, Latuyalaka Kanga lulimbilimbi, Ayondja asikandi welli la alimba a waki. La tshina dia lutumbu landi, dja yayoheta, yayutuwo lumbi. 17 Usasi wa Isariyele wayuyala dja, La l'Ekila landi lumbi. Lo layutshumba ndu layumana atende andi La akumbu andi lu lushi otoi.

18 Latuyalaka ayutshumba lutumbu l'ukunda awo, Ndu la dikambo diawo di'eteto; utema la dimba. Etena keso kayuyala uku atukitakita wulu wa kanga hemo. 19 Etamba wutshikadi l'ekunda awo, wayuyala etamba wa mbala, Kuyanga dikenda mbeyaka nfunda efula kawo.

20 Lu lushi lako, atshikadi wa Isariyele ndu wane wakahandi, wa lu luudu la Jakoba, wayukime mbekama le one lakasuyaka. Keli wayekama lu mete le Latuyalaka, l'Ekila l'Isariyele. 21 Atshikadi wayukalula, ee atshikadi wa Jakoba le Unyashungu a wulu. 22 Kuyanga wudja aye, we Latuyalaka, weli efula uku losenga la l'umamu w'ashi a waki, paka djui y'atshikadi tshu mbayukalula. Elanyelu kuludi too la sambu k'ololo kambudjangema. 23 Ne dia Khumadiiondo, Latuyalaka Kanga lulimbilimbi, ayushidiya kene kakandasanguya lu kete tshe.

24 Okone Khumadiiondo, Latuyalaka Kanga lulimbilimbi kata ati: Wudja ami wudjashi lu Siona, tanyukaki asi Asuriya woma, kuyanga vo wambunyokomola ohehela, ndu wambedia ukalimba awo ladiku dianyu uku akatshaka asi Edjibitu. 25 Yema tshitshe tshu mbambutshikala ku ududu ami ayushila, ku kele kami kayukadimo utsha le wo dia mbâlanya. 26 Latuyalaka Kanga lulimbilimbi ayahashahaha l'ohbehela uku akadiakema asi Midiyana lu dive di'Oreba. Ndi ayedia ohehela andi ladiku dia ashi a waki uku akandatshi lu Edjibitu. 27 Lu lushi lako, wutshu wa khum'ekanga k'Asuriya wayumo uma l'aheka anyu, la lokoho landi layukamo uma lu kingu yanyu. Ndi ambunela uma la Rimona.

28 Ndi ambukuma la Aiyate, ambutenanya Mingirona, Ambutshika eshiko andi la Mikimashe. 29 Vo wambetta l'asa minga, wambutulala la Ngeba. Rama ambudidima, Ngibeya ka Saulu ambulawo. 30 Uhangoango la diui dia wulu, we ona umuntu a Ngalima! Laisha li, uhukami! Anatota li, ukaluya diui! 31 Madimena ambekeko, Asi Ngebime wambulawo dia ntana eku. 32 Elo kene, ndi ambemala la Nobo. Ndi ambunyinginya lunya lu manela Ukungu w'ona umuntu a Siona, Dikuna dia Jerusalema. 33 Enda, Khumadiiondo, Latuyalaka Kanga lulimbilimbi, Ayokola tahi la ngala. Wane wuleki waki wayokotama, Wane wuleki etali wayukitshakitshama. 34 Ndi ayotetshatsetsha akanda wa l'ukunda la kenge, Ndu Lebanonona ayokotama kame la etamba awo a wakiwaki.

Diulelu Di'Ololo Dia Lukuno la Jese

11 Dimonga diayomonga uma l'ehekeli ka Jese, Ndu lukuno, layutumba l'ediu andi. 2 Nyuma ka Latuyalaka kayuyala le ndi, Nyuma ka yimba ndu ka ewu, Nyuma k'elakanyelu ndu ka wulu, Nyuma ka yimba ndu ka woma wa Latuyalaka. 3 Ndi ayongenangenaka lu woma wa Latuyalaka. Ndi hulumbuya uku atundenaka; Ndi husambula uku atundukaka. 4 Keli ndi ayulumbuya asi wula la sambu k'ololo, Ayusambula akanga a memakanwa la kete aha la shonodi. Ndi ayokomola kete la diui diandi uku ohehela. Ndi ayudiaka antu wa kolo la luwi l'uma l'unyo andi. 5 Sambu k'ololo ayuyala uya lu lukindi landi, La kolamelu uya wa dikundu diandi. 6 La undu ayujase kame la on'okoko. Koi la ona mbudi wayetama kame. Osongo wa ngombe, tambwe, la elungalunga ka wata wayuyala kame, Ku kiendakenda ayuyilombola. 7 Ngombe la koi wayole kame, Ndu an'ayo wayetama dihuli diame. Tambwe ayole nengese uku ngombe. 8 Ona laloma ayokenya lasuki la ushu wa tshula. Ona lambukilaaweleye ayudja lunya landi lu difuku dia dikhuha. 9 Vo hawuhumuya kuyanga nanya Ukungu ami w'ekila tshe, Ne dia kete ayulula la ewu ka Latuyalaka, Uku atululaka ashi a waki. 10 Lu lushi loso, lukuno la Jese layemala uku ekuku ka koi ne dia wedja. Wedja wayukadimo utsha le ndi; dihuli di'edjasela kandi diayutumbwama.

11 Lushi lako, Khumadiiondo ayusimbula lunya landi etena ka hendi dia nshimbela atshikadi wa lu wudja andi wakadiangana lu Asuriya, ndu l'Edjibitu, la Patorose ndu la Etiyopiya, la Elame, la Shinare ndu la Hamata, ndu lu asenga wa lu ashi a waki. 12 Ndi ayuhane djimbitelu ya wedja; Ndi ayusanganya asi Isariyele wakatshanye. Ndi ayomotsha asi Juda wakadianganyema Uma lu kuma nyei ya kete. 13 Kandjema ka Efarayima ayumo; La waku watohenyahenyaka Juda, wayulanyema. Efarayima huka Juda kandjema, La Juda hohenyahenyaka Efarayima. 14 Keli vo wayufumbo utsha l'edjelu ka unya Dia ntahema lu aheka w'asi Filistiya. Vo wayohotola diango di'antu wa lu leke l'ehutwelu. Vo wayusimbula anya awo utsha l'Edome la Moaba; Asi Amona wayâkitianya. 15 Latuyalaka ayulanya lulimi l'uduwa wa l'Edjibitu. La loopepe l'owo mbayundetshetsha lunya landi ladiku dia Ndjali. Ndi ayukiatanya ekedi esambeli, Ku

antu wayukitenyanya lu kete y'ufumbu la sabata. 16 Osese a wuki wayuyala uma lu kete y'Asuriyo, Ne dia atshikadi wa wudja andi mbeta loko, Uku akayala osese ne dia Isariye Lushi lakawatumbi uma l'Edjibitu.

Usambu w'Eukelu ka Lusaka

12 Lu lushi loso, we ayuta wat: Dimi layukuka lusaka, we Latuyalaka Kuyangwa we akambuki kele, Ku kele kaye kambumo uma le mi la we ambunsamba. 2 Enda, Unyashungu keli panda kami. Dimi layuwekama, handjuka woma, ne dia Latuyalaka, Ee, Latuyalaka keli wulu ami la usambu ami. Ndi kakayala panda kami. 3 Nyu nyayuduwulaka ashi l'ongenongeno uma lu teko dia panda. 4 Lu lushi loso, nyayuta nyati: Nyukaki Latuyalaka lusaka, nyetaki lukumbu landi; Nyusanyiaki wedja dia etsha andi, Nyuwaahulaki dia wuki wa lukumbu landi. 5 Nyimbelaki Latuyalaka esambu, ne dia akambu wa mamba wakandatshi. Akambu aku weyami lu kete tshe. 6 Nyu asi Siona, nyudjaki dielu dia wulu l'ongenongeno, Ne dia l'Ekila l'Isariye eko wuki l'atei anyu.

Enelo lu Dikambu Dia Babilona

13 Enelo kakenyi Isaya, on'a Amoza lu dikambu dia Babilona. 2 Nyuhane ekuku ka koi ladiku di'ukungu w'utali, Nyedia diui wulu utsha le antu, Nyetshetsha anya dia vo mboto lu asuku w'antu a waki. 3 Dimi lakandjanga akiłami ami. Laketu ahuka ami ne dia kele kami, Ee, waku watuyasemaka ne dia wuki ami. 4 Nyuki lundju ladiku di'ekungu, Uku lundju l'elui a waki w'antu! Lufungusu la mamba la waulelu wa wedja womotshi kame! Latuyalaka Kanga lulimbilimbi omotsha ului w'alimbi dia ndo ta. 5 Vo wambuya uma lu kete y'etalii, Uma la kuma k'ulungu. Latuyalaka la diango dia ta dia kele kandi Wutsha nanya kete tshe.

6 Nyudi tukuku ne dia lushi la Latuyalaka laya suki. Lo layuya uku elanyelu uma le Kanga-Wulu-Tshe! 7 Okone anya tshe wayokomo, La utema w'untu tshe ayuyala ashi atu. 8 Vo wayuka woma; Okei la lunyangu wayuwanda. Vo wayena pa uku atutataka umuntu lono; Wayendana la utewalu. Dundji diawo diayukaso uku lumbi la dja.

9 Lushi la Latuyalaka lambukuka, Lushi la ngala, lushi la kele ndu l'ududu a wulu! Dia nanya kete la nshila antu wa kolo ushiki, 10 Ne dia toto ta l'ulungu la elui ato hawoheta

ntu; Unya ayuyala udjima l'ehutwelu kawo, La ngondo hukashiya ntu. 11 Dimi layusuya andja ne dia kolo kawo, La antu wa kolo ne dia ehedia awo. Dimi layunya utaku w'akanga a lahi, Layukitshakitsha djawudi y'akanga a ngala. 12 Dimi layete antu ato, wayuyala wulu menama uleki paunyi ka lutshula, Ee, antu wayuleka paunyi ka Ofira wulu ntanema. 13 Okone layudidimia ulungu. Kete ayusutshasutshama ladiku dia ekitsheli kayo, Uma lu kele ka Latuyalaka Kanga lulimbilimbi Lu lushi l'ududu andi wa mamba. 14 Uku peli katawatshi Kana uku ekoko waha l'ulami, Osoku mbayukalula unto tshe utsha lu wudja andi, Ndu mbayulawo unto tshe utsha lu kete yawo. 15 Wane tshe wayuwutana, wayutundwama, Waku tshe wayuwunda, wayudiakema la yombo. 16 An'awo wa tshitshe wayutshatshema lu ashu awo. Vo wayulanya mvudu yawo, wayahotola wadiewo la khudu.

17 Enda, dimi layatomboshiya asi Mediya, Wane wahatuyangaka fesa, La wahatukumbulaka paunyi dia ndo la wo. 18 Vo wayudiaka elongo w'apami la eta awo. Vo hawuka elua w'uma l'etema ketshi, La ashu awo hawuhandja ana. 19 Okone Babilona, lutumbu la waulelu, Elengalenga ka ndjasema k'asi Kaladiya ayulanyema, Uku akalanya Unyashungu Sodoma la Ngomora. 20 Usumba aka hawulala unto pundju; Nduku untu ayudjase loko lu lolonga la lolonga. Usi Arabiya hakki luudu landi la dipema leko, Ndu elami w'ekoko hawuladiki dungalunga diawo leko. 21 Keli nyama ya ngala ya l'usui yayetamaka loko. Mvudu y'usumba aka yayulula la diango dia woma. Kumbaka yayulalaka, ndu waowo wayulimbolimboka leko. 22 Mbulu yayawana lu mvudu yawo ya waki, Ndu ndjudi lu mvudu yaki khumi ya dikanga.

Etena kawo aya suki, Ndu nshi yawo hayuyulyala efula ntu.

Aui wa Nkanula Khum'ekanga ka Babilona

14 Latuyalaka ayuka Jakoba ketshi, ayosonola Isariyele ntu, ku ndi ayashikike lu kete yawo ntu. Angendangenda wayosohana la wo, la wayekesanelu la luudu la Jakoba. 2 Ku antu wayuwanda, wayakola lu ahuli awo. Luudu la Latuyalaka layuyala akanga awo, lu kete ya Latuyalaka, uku fumbi y'apami la uku fumbi y'amantu. Vo wayulunga wane wakalungaka fumbi, ndu wayulela wane wakasuyaka.

3 Lu lushi loso, Latuyalaka ayukusha mumuya uma lu lunyangu laye, uma lu pa kaye, la uma wakawakumbiaka la khudu. 4 We ayimba usamba wa monyola khum'ekanga ka Babilona wati: Kanga ngala kema ntu! Usumba a paunyi ambushila. 5 Latuyalaka ambokola ukalimba w'antu a kolo, Danga dia diulelu dia ambuledi, 6 Wakakomolaka antu lu ududu, La dikomodi diaha mpeko, Wakulela wedja la kele, Wakasuyaka antu l'ukunda. 7 Kete tshe yambuyala la mumuya ndu la ki. Wambutundo la kimbu y'ongenongeno. 8 Etamba wa weoto wambongenangena dia ekwelo kaye, Esasi wa la Lebanon wambuta vati: Umaka etena kakayako, Nduku okotshi ambuya dia ndjutokota. 9 Udimu a Pengandu ambusaka lukumbu pulu ndu l'ehongo awo, Dia ndjukulungula lam'ayayai. Vo wayuketwela djimu, ewandji a waki wa la kete. Vo wambunyiya khumi ya dikanga ya lu wedja uma lu kiti yawo ya waulelu. 10 Vo tshe wayukumbula vati: Ndu we kambuyala wodu uku shu! We ambufana la su! 11 Lutumbu laye lambuhulo utsha l'Udimu a Pengandu, Kame la lundju la sese yaye. Kusu yambuyala tangi la tshina diaye, Ndu kusu yambuyala ulangitshi aye.

12 Ndi wuhu wamboyoko uma l'ulungu, We Yoto ya Pindju, on'a Ehutwelu li! Ndi wuhu wambuyoko la kete, We lakalembiaka wedja li! 13 We kakataka l'utema aye wati: Dimi layumbela utsha l'ulungu, Layedia kitiki kami ka diulelu ladiku dia toto ta Unyashungu. Dimi layudjase l'ukungu wa lusanganya, Utsha lu kuma ka ngel'a kushi. 14 Dimi layumbela ladiku dia wang, Layuyaete uku Khum'Ulungu. 15 Keli we ambukadjema l'Udimu a Pengandu, Ka tshina dia Difuku di'ohongo. 16 Wane watukerenaka, watukendaka tee, Watumbwanaka vati: Aha untu uku kakadidimiaka kete? Kakasutshasutshaka waulelu? 17 Aha ndi kakete andja shenga, Kakalembiaka esumba, Ndu kaki kuntshungulaka asi lukanu? 18 Khumi ya dikanga tshe ya lu wedja yayetama la lutumbu, Vo tshe untu l'untu lu diumbu diandi. 19 Kelileye, we ambukadjema uma lu diumbu diaye, Uku lutahi la wononyi, Uku ahondo w'antu wakadiakema la tombo, Ndu wakakadjema lu ave wa lu Difuku, Uku udu wahotshahotshama l'ekulu. 20 We kunkhundama kame la wo lu diumbu, Ne dia we akalanya kete yaye, We akadiaki antu aye. Hawudimulaki diuhu di'antu wa kolo pundi!

21 Nyolongosole dihuli dia ndjaka an'andi, Ne dia kolo ka watshewo. Vo watukunela dia mbulela kete, La watukufulanela l'andja. 22 Dimi layunela dia ndo la wo, mbata Latuyalaka Kanga lulimbilimbi. Dimi layulanya lukumbu la atshikadi wa la Babilona, an'andi la akanandi, mbata Latuyalaka. 23 Layete usumba ako eduwa w'ashi ndu edjaselu ka biku. Dimi layuwomba la lombo l'elanyelu, mbata Latuyalaka Kanga lulimbilimbi.

Asuriya Ayulanyema

24 Latuyalaka Kanga lulimbilimbi akatshibi ati: Mete, kene kakamakan, kayuyala; La kene kakamasanguya, kayushikikala. 25 Dimi layowediawedia usi Asuriya lu kete yami, Layôhotshahotsha l'akaka ladiku di'ekungu ami. Ku lokoho landi layumo uma ladiku diawo, La ushiko andi uma l'aheka awo. 26 Oso eli esangweyu kakasangweyama ne dia kete tshe. Oso keli lunya lusimbwami ladiku dia wedja tshe. 27 Latuyalaka Kanga lulimbilimbi kakasanguya esangweyu kene, eya nkifutanya? Lunya landi lambusimbo, eya lokonye na?

Enelo lu Dikambu Dia Filistiya

28 Lu eleku kakavu khum'ekanga Ahaza, kakenama enelo kene ati:

29 Nyu wudja tshe w'asi Filistiya, tanyongenangenaki, Ne dia ukalimba wakanyokomolaka wambuhimbo, Ne dia uma l'udiw w'ului kayutumba dikhuha, La ulua awo ayuyala kunga ka dja, kafumbo. 30 Wane wuleki wula, wayolekaka ma, La ehumbi wayetamaka la ki. Dimi layudiaka udiu aye la ndjala, Ndu asikaye wutshikadi, wayudjikema. 31 Suku li, uleli! we usumba, udi kuku! Nyu asi Filistiya tshe nyuteko la woma! Ne dia dinga diambutumba la ngel'a kushi. Enongo w'alimbi w'utunyi weko khukhu. 32 Na diui diayuwukaluya le akendji wa wudja? Latuyalaka kakaki Siona, Amenyi fono wa lu wudja andi wayutana eshamelu loko.

Enelo lu Dikambu Dia Moaba

15 L'utshu wame, Ara ka la Moaba ayulanyema, ayuhandjwama. L'utshu wame, Kire ka la Moaba ayulanyema, ayuhandjwama. 2 Ona umuntu a Dibona ambumbela Utsha lu ahuli wa ladiku dia ntulela. Asi Moaba wambulela wulu ne dia Nebo la Medeba. Ete tshe tohola tutu, ndedu

tshe yambunyema. 3 Menda l'esese, ku antu tshe walotshi akutu atu: L'ete wa mvudu ndu l'aseke, Antu tshe tukuku tutu wasekhuma l'alelu. 4 Heshibona la Eleale wambuda tukuku. Tukuku tawo tambukema pulu la Jahaza. Okone alimbi wa la Moaba wambulela wulu, La etema awo wambudidima la woma. 5 Utema ami ambulela dikambu dia Moaba, Antu a waki wa loko wambulawo utsha la Zoara, Pulu ndu la Engelate-Shelishiya. Vo wambumbela utsha la Luhita wataleti, Ndu watade tukuku ta lunyango l'elanyelu Lu mbuka k'utsha la Horonayima. 6 Ashi wa Nimirime wambulanyema Adiyu wambuma tu-tu, ndu shinde yambusima, Nduku etumbatumba k'omongela kekiko. 7 Okone wayotola efula ka diango diakawakundja, Ndu kene kakawumbaka wakakiembe Utsha la wedi wa Kiedi y'Eduwula, 8 Ne dia alelu wambukema lu elelu wa Moaba. Tukuku tawo tambukuma la Engalayima; Ndu to tambukuma ndu la Bere-Elime. 9 Ashi wa la Dibona wambulula to la dikila, Keli layumutumela Dibona asui Tambwe le asi Moaba wambuhanda, Ndu le atshikadi wa lu wudja.

16 Nyutumeli umbuledi wa wudja osongo w'ekoko. Nyetumi uma la Sela, uma l'usui wa shenga, Utsha l'ukungu w'ona umuntu a Siona. 2 Uku fudu ya tekeko, uku kefu yambuhandjwama, Mbayuyala ana amantu wa la Moaba lu etehwelu ka Aranona. 3 Ulaki alaku, usambuli aha la shonodi; Utshi dedi diaye unya l'atei ote uku l'utshu; Ushe wane wayatshanyema, tufungaki one layalawo! 4 Etawo asikami wa la Moaba mbidjase la ye. Uyali eshamelu kawo uma l'elundji k'undjakanyi; Wengiya utsha nshila, elanyelu kutsha nkume, La wane watohotshahotshaka antu l'ekulu wutsha nshila la kete. 5 Kiti ka diulelu kayushikikala lu ngandji ka shikaa. Omotshi ayudjase loko la kolamelu lu luudu la dipema la Davidi. Ndi ayusambula, ayuyangaka akambu w'usimbwi, Ayusamanyaaka lu akambu w'ololo.

6 Shu takuki lukumu la utaku efula wa Moaba, Djawudi yandi, la osemo andi ndu kele kandi. Keli ufumu andi ambuyala anyanya. 7 Okone asi Moaba waleli, Vo tshe wayulela Moaba. Nyuleli, nyuyakomole wulu, Ne dia elanyelu k'ekati wa tomwemwe tambuma ta la Kire-Haresete. 8 Diango dia l'esui wa la Heshibona diambolengela. Khumi ya wedja wambuhimbula tahi

yuleki dimena y'okodi wa Shibima. Vo wakakumi pulu la Jazera, wakalambi l'usi wa shenga, Songusongu yawo yakalambi, yakatenyanya pulu ndu la wedi w'uduwa. 9 Okone mbayumulela kame la delu dia Jazera, Ne dia okodi wa Shibima. Heshibona la Eleale, dimi layunyoloya l'aso ami, Lu elua aye ndu lu dinela diaye. 10 Ongenongeno wambunyema, ndu ongenongeno a wuki wambumo lu dikambo. Hawuyimba esambu lu dikambo di'elua, kuyanga mbola sali leko. Amamudi hawamula ashi, la wanu lu mbaka yawo. Lakashimbi waelu awo w'ongenongeno. 11 Ndu diui diamti diambusakan uku losese lu dikambu dia Moaba, Ndu esohi ami lu dikambu dia Kire-Herese. 12 Lam'atuyaenyaka Moaba, lam'atunduyahenyahenya lu dihili dia ladiku, lam'atunduyakaka l'etemwelo dia ndjolomba, ndi hatukundjaka nduku engo.

13 Oso eli diui dia Latuyalaka diakandateketa lu dikambu dia Moaba umaka etena keso. 14 Keli kakiane Latuyalaka amboteketa ati: Lu deku satu, uku deku dia ufutami, lutumbu la Moaba layonywama, kame la ului uku a wuki tshe. Atshikadi wayuyala atoi ndu wodu.

Enelo lu Dikambu Dia Damaseke

17 Enda, Damaseke huyala usumba ntu. 1 Vo wayuyala uku tuta di'elanyelu 2 Esumba wa Aroere wambukalema, Wambukimwama le the dungalunga. Dio diayetamaka leko, ku nduku untu ayuditsha woma. 3 Lukumbu l'ave l'Efarayima layunyuko, La diulelu dia Damaseke diayushila. Ku atshikadi wa la Suriya wayuyala uku lutumbu l'asi Isariye, Mbata Latuyalaka Kanga lulimbilimbi.

Elumbwelu ka Isariye

4 Lushi loso, lutumbu la Jakoba layukitakita, Ndu dimba diandi diayonda. 5 Dikambu diako diayuyala uku atunaka umunyi epunga, Ndu uku atuhimbula lunya landi disha. Dikambu diako diayuyala uku atuwusanganyaka disha L'Ukidi wa Refayima. 6 Elua emotshi wayutshikala leko, uku atutshikalaka mbeli, Hyendi kana shatu, ka shodi lam'atuwusutshashatshaka utamba wa mbeli, Nyei kana tshanu lu tahi yawo yatotokaka elua, mbata Latuyalaka, Unyashungu wa Isariye.

7 Lushi lako antu wayenda utsha le Utungi awo, ndu ashu awo wayolemia l'Ekipa l'Isariye. 8 Vo hawenda utsha lu diakelu

ntu, ulimu w'anya awo, kuyanga nemia diango diakatshi pita yawo, kuyanga kinda ya Wa Ashera, kana difanelu dia unya. 9 Lushi lako, esumba awo a wulu wayuyala uku ahuli wakalaneyama l'atei ukunda ndu l'ete w'ekungu, ahuli wakawatshiki dia ndawo asi Isariyele. Ku ahuli ako wayutshikala atongo atu. 10 We akuhela Unyashungu a panda kaye, We kumbuho Dive dia eshamelu kaye. Okone we akasekola esango w'amena l'ekambo, Akune esango w'uma lu wedja loko. 11 Lam'akayayuweune, we ambedinga lukumbu, Ku wedi'a pindju, we ayuyetundja alemba. Keli dinela diayushisho tshe Lu lushi l'okei la lunyangu la wulu.

12 Yee! lundju l'antu efula loso. Lufungusu lawo leli uku luhelu l'ashi a waki. Yee! lundju la wedja loso! Dikita diawo dieli uku dikita di'ashi a wulu. 13 Wedja wambudikita uku atudikitaka ashi a waki, Keli ndi ayahangwela ku vo wayulawo etali, Uku puhudi yatembamaka la lopepe l'ekungu, Uku ditshu diatembamaka la lopepe la wulu. 14 La dikolo, enda woma wa mamba! Ntundu unya atahuto, ku vo kema ntu! Oso eli etenyi ka waku watutusuyaka, Ndu difutu dia waku watutohotolaka diango diasus.

Etelu k'Akambu Wahatayi lu Dikambu Dia Etiyopiya

18 Yee! kete yukema luhelu l'ahafu wa difumbobumbo, Yeko la wedi w'ekedi wa Etiyopiya, 2 Yo yatutumaka atumami lu Nile, Lu watu wa tusadisadi ladiku di'ashi! Nyutshu, nyu akendji w'esadi, Utsha lu wudja w'antu w'alundoki la amena, Utsha lu wudja wakawukaka woma uma k'etatu, Wudja a wulu watohotshahotshaka antu tshe, Wudja wa kete yakahimbuhimbuyama l'ekedi. 3 Nyu wa l'andja tshe, watudjaseka la kete, Nyendi lam'ahane wo ekuku a koi l'ekungu! Lam'adawo pungi, kanyulungi! 4 Latuyalaka akamvutela ati: Dimi layendaka ki uma lu edjaselu kami, Uku luhaladi la yanyi, Uku dingi dia dihohe lu nshi ya dinela. 5 Keli la ntundu ka dinela, lam'atololoka alemba, Ndu lam'atutumbaka elua w'apepe, Ndi ayuhimbula songusongu la lukuwa, Ayuhimbula alambu w'etali. 6 Ekodi ako tshe wayukimwama Le fudu ya l'ekungu la le nyama ya la kete. Ku fudu yayahemaka ladiku diawo lu nshi y'ovo, Ku nyama tshe yayetamaka loko lu nshi ya diye.

7 L'etena keso, ushasha ayukimwama le Latuyalaka Kanga lulimbilimbi, uma le

wudja w'antu walundoki la amena, uma le wudja wakawukaka woma umak'etatu, wudja a wulu watohotshahotshaka antu tshe, wudja wa kete yakahimbuhimbuyama l'ekedi. Ushasha ako ayembama utsha lu dihuli dieli lukumbu la Latuyalaka Kanga lulimbilimbi, l'ukungu wa Siona.

Enelo lu Dikambu Dia Edjibitu

19 Enda, Latuyalaka lahemi lu dingi diateti esadi, Ambuya uya l'Edjibitu. Dikishi dia l'Edjibitu diayudidima la ntundu kandi, La etema w'asi Edjibitu wayuyala ashi atu. 2 Dimi layotombosha asi Edjibitu dia vo ndosha asi Edjibitu. Vo tshe wayoloshanya untu l'onangu, Ndu untu l'untu la unyandi, Usumba l'usumba, diulelu la diulelu. 3 Etema w'asi Edjibitu wayushila wulu. Dimi layufutanya sangweyu diawo. Ku vo wayutumbula dikishi, akanga w'alocho, Wane watoteketshaka djimu la wane watendjaka wetshi. 4 Dimi layukimo asi Edjibitu l'anya wa kanga ngala. Khum'ekanga ka djawudi ayuwaulela, Mbata Khumadiiondjo Latuyalaka Kanga lulimbilimbi,

5 Ashi wa Nile wayuma tu, Okedi ayuma, ayuyala ditshu tu. 6 Wetshiya ato wayuyala sulu; Ekedi walambula Nile l'Edjibitu wayukitakita, wayuma Kungu la asopo wayolengela. 7 Ahuli wa hwe waha la adiyu, mbayuyala l'ukidi wa Nile. Kene tshe kakawune l'emamu a Nile kayuma, kayukadimo ditshu. To kayembama la lopepe, hakienama ntu. 8 Amundji wa nsi wa lu Nile wayulela, wayuda tukuku, Wane tshe watukaka todi lu Nile. Wane watudjaka etei lu ashi wayuyala la lunyangu. 9 Waku watutshaka eshinga wa linene, La watutshaka ahondo wa wema wayukanana. 10 Waku weli dikoho dia la kete, wayatshatshema. Asi elimu tshe wayuyala la etema w'okei.

11 Ewandji wa la Zoana weli dinginya. Aui w'andaki wa yimba wa Farayo wambuyala anyanya. Ukundi, eyanyu mvutela Farayo nyati: On'a usi yimba kemi, ona aki khumi ya dikanga y'edjedja? 12 Lend'eli asi yimba aye? Wakuteli, wakulimbitshiya kene kakasanguya Latuyalaka Kanga lulimbilimbi dia ntshela Edjibitu. 13 Ewandji wa Zoana wambuyala dinginya, Ndu ewandji wa la Memifi wambukesama. Waku weli ete a wauhu wambunyangiya Edjibitu. 14 Latuyalaka akadianganya lumu l'uhukusanu l'atei awo. Vo wakasukusukuya asi Edjibitu lu tumu yawo tshe, Uku atusukosukuka umbidjoki

lam'atuwondi. 15 Akambu wakatshaka ote kana wela, dianga kana sopo, Hawuyeyama ntshama ntu lu Edjibitu.

16 Lu lushi loso, asi Edjibitu wayuyala uku amantu. Wayudidima la woma, lam'ayeteta lunya la Latuyalaka Kanga lulimbilimbi ladiku diawo. 17 Asi Edjibitu wayuka wudja wa Juda woma wa mamba. One tshe ladimula lukumbu la wudja ako, ayuka woma efula, ne dia esangweyu kakasanguya Latuyalaka Kanga lulimbilimbi dia ntshela Edjibitu. 18 L'etenetreso, esumba etanu wa lu kete y'Edjibitu wayoteketa oteketa wa Kanana, wayutshiba dia mbekama le Latuyalaka Kanga lulimbilimbi. Omotshi ayetama ati: Usumba w'elanyelu. 19 K'etenetreso, vo wayuhikela Latuyalaka ediaikelu l'atei a wudja w'Edjibitu, wayuhikela Latuyalaka ekoho l'umamu wa kete yako. 20 To kayuyala djimbitelu la omenyi le Latuyalaka Kanga lulimbilimbi lu kete y'Edjibitu. Vo wayulelela Latuyalaka ne dia asuyanyi, ku ndi ayatümela ushimbedi la umamedi dia mbatshungula. 21 Latuyalaka ayeyama l'Edjibitu, ndu asi Edjibitu wayülimbitela l'etenetreso, ee, vo wayöttemola la elambu wa nyama la wa diango. Vo wayutshikela Latuyalaka tunyi, ku wayudishiki. 22 Latuyalaka ayokomola asi Edjibitu, ayäkomola, ku ayäkonoya. Vo wayukalula le Latuyalaka. Ndi ayuwaukela ayäkonoya.

23 Lu nshi yako, osese a wuki ayuyala uma l'Edjibitu pulu l'Asuriya. Asi Asuriya wayutshokaka utsha l'Edjibitu, la asi Edjibitu utsha l'Asuriya. Asi Edjibitu la asi Asuriya wayotemolaka Latuyalaka kame. 24 Lu nshi yako, Isariyele ayuyala diulelu dia satu, kame l'Edjibitu la Asuriya. Otshoko wayuyala la kete, 25 ne dia Latuyalaka Kanga lulimbilimbi akätshokola, ata ati: Edjibitu, wudja ami: la Asuriya, ulimu w'anya ami; ndu Isariyele, ukito ami, watshokwami!

*Elembielo k'Asuriya,
Kayundolembia Edjibitu la Etiyopiya,
Kambutama Ntundu*

20 L'eleku kakatumi Sarangona, khum'ekanga k'Asuriya, olombodi andi w'alimi la ntolosha Ashidode, ndi akatuwalembia. 2 L'etenetreso, Latuyalaka akatela Isaya, on'a Amoza, ati: Unela, ukululi dikutu, unya sabata uma l'ekulu aye. Ku ndi akatshi osoku, akakendakenda utakataka, la ekulu hwe. 3 Latuyalaka akatela ati: Uku akakendakenda ukambi ami Isaya

utakataka la ekulu hwe deku satu, dia ndjala djimbitelu la ewelu le Edjibitu la Etiyopiya, 4 osoku mbayotola khum'ekanga k'Asuriya asi Edjibitu la esekwami wa Etiyopiya utsha lu fumbi: elongo la esumbi, etakataka la ekulu hwe, la asoko l'andja dia mbutshaa asi Edjibitu sonyi. 5 Wayundama la woma, wayolombo la sonyi, dikambu dia Etiyopiya diakawalungamelaka, la dikambu dia Edjibitu diakawayasemaka. 6 L'etenetreso, antu watudjaseke l'umamu w'ashi a waki wayutava: Nyendi uku ambuya elongamelu kasu, le waku wakatalawo le wo dia nkimanyiamma la ntshungwama le khum'ekanga k'Asuriya. Keli kakiane, ukundi ayutuhanda na?

*Enelo lu Dikambu Di'Usui
wa Shenga w'Ashi a Waki*

21 Enelo k'usui wa shenga wa l'umamu w'ashi a waki Uku atetaka lopepe la wulu lu leke la Nengebe, Osoku mbatutumbaka lukumu uma l'usui wa shenga, Uma lu wudja wukawo woma. 2 Enelo ka mamba kambenama le mi. Ukesanyi atukesanaka, la ulanyishi atulanyaka. Elame li, uneli! Mediya li, utädingi! Dimi layukumiya tukuku tshe takawatungi. 3 Okone utem'ami ambulula la okei. Lunyangu lambumunda, uku atutataka umuntu lono. Dimi laya khunya, lokonyo lambumbula atuu. Lambudidima, luktunba lambula ashu. 4 Lambate sulu, woma ambundjidima. Hyutshihutshu yakamangenangenaka, yaya woma le mi.

5 Vo wambula mesa, wambukitsha ulami, wole, wono. Nyuneli, nyu ewandji, nyukuti engawi iso!

6 Okone mbambumvutela Khumadiodjо ati: Uneli, ukitsha ulami. Ndi kataki akambu wayundenaka. 7 Lam'enandi ambahemi, ambahemi wa falasa ahendi ahendi, Ambahemi wa punda, ndu ambahemi wa kamelo, Ndi alungi, ahukami ololo. 8 Ndi akaleli uku tambwe ati: Khumadiodjо li, dimi latemalaka l'etangelu yanyi tshe, Ndu latutshikalaka lu dihuli diam i'di'ulimu utshu tshe. 9 Kakiane enda, ambahemi wuyayi, ambahemi wa falasa ahendi ahendi! Ku ndi akatshi ntu ati: Ambuhandjo, yee! Babilona ambuhandjo, La difanelu tshe dia ditemolatemola diawo Diambatshatshema la kete,

10 Wudja ami li, nyu nyakasuswama uku epunga lu dihuli diam i'di'esuswelu. Kene kakamuki uma le Latuyalaka Kanga lulimbilimbi, Unyashungu wa Isariyele,

ISAYA

kamumunyutela.

Enelo lu Dikambu Dia Duma

11 Enelo lu dikambu dia Duma. Amotshi watumbetaka uma lu Seire vati: Ulami, unya akona l'utshu? Ulami, unya akona l'utshu? 12 Ku ulami atâkaluyaka diui ati: Unya utsha imputo, pindju kuyayi, ndu utshu. Naka nyu nangaka mumbula, nyukaluli, nyuyumumbuli ntu.

Enelo lu Dikambu Dia Arabiya

13 Enelo lu dikambu dia Arabiya. Nyu ambetshetshi wa la Dedana, Nyayutulala lu tuhuka ta la Arabiya 14 Nyu asi wudja wa Tema, Nyotolele wane weli la pusa k'ashi ash; Nyutuhuman la andawi, nyutuwasha ma. 15 Vo wambulawo tombo, ee tombo tosowmami, Uta wukutwami, la ehenyohenyo wa ta. 16 Khumadiiondjo kata okone ati: Ambutshikala eleku otoi, uku deku di'usi ulimu, ku lutumbu tshe la Kedara layushila. 17 Ambuki w'eta wa dihunga wa wudja wa Kedara wayutshikala paka atoi, ne dia Latuyalaka, Unyashungu wa Isariyele, kambuta osoku.

Enelo lu Dikambu Di'Ukidi a Waenelo

22 Na dikambu ne, diambunyumbela nyu tshe l'ete a mvudu, 2 We usumba wa yengeliyengeli, Wuludi too la lundju, ngelu k'ongenongeno? Antu aye wuvvi, kundjakema la tombo kuyanga mvo lu ta. 3 Ewandji aye tshe wakalawo kame, Wakandama le waku waki kundjala la eta. Waku tshe wakakukaka ngandji, wakakelekama kame, Kuyanga vo wakalawo etali. 4 Okone dimi lakati nt: Nyunya ashu uma le mi, dimi lutsha ndela kuku ya wulu. Tanyutetemalaki nsambami Lu elanyelu k'ona umuntu a wudja ami.

5 Khumadiiondjo, Latuyalaka Kanga lulimbilimbi eko la lushi, Lushi l'ohenyohenyo, l'ehotshehotshelu, Ndu l'ukananu l'ukidi w'enelo. Lo laki lushi l'ehandjwelu ka kumbu, Ndu l'alelu a wulu l'ekungu. 6 Asi Elame wakahakata ekulu wa pitu, wakalongosola Pusupusu y'andoshi wa ta, la ambahemi wa falasa, Ndu asi Kire wakatundja dingawu diawo. 7 Pusupusu yanyu ya ta yakaluli lu ekidi w'amena, Ku ambahemi wa falasa wakemala lu asuku anyu. 8 Ndi akanya ukumbo wa Juda. Lushi lako nyu nyakenyi diango dia ta dia lu luudu la l'ukunda. 9 Nyu nyakenyi ahuli wakalanyema l'usumba wa Davidi,

nyati: Efula kawo. Ku nyu nyakalongosola djuwaduwa y'ashi wa l'esi. 10 Nyu nyakalili efula ka mvudu ya la Jerusalema, nyakayihandjula dia nkikitsha eheli ka lukumbu. 11 Nyu nyakatshi djuwaduwa kina y'ashi l'asa peli pendi dia lukumbu, ne dia ashi w'uma lu djuwaduwa y'edjedja, keli nyu kumenda le one lakatshi dikambu ne, kuyanga nemia one lakadisonola edjedja.

12 Lushi lako, Khumadiiondjo, Latuyalaka Kanga lulimbilimbi, Akanyeti dia nyu ndela la ndjakomola lu tulu, Dia nyu minya divu la ndota akutu. 13 Keli nyakangenangenaka, nyakatamanya ngenangena! Nyakadiaki ngombe la ekoko, Nyakali unatshi, nyakano wanu nyati: Tuli, tono ne dia tayovo lui. 14 Ku Latuyalaka Kanga lulimbilimbi akamvutela ati: Mete, edja ndu lam'ayunyuvo, kolo kene hudimanyema le nyu, Mbakati Khumadiiondjo, Latuyalaka Kanga lulimbilimbi.

Eliyakima Ayukita Shebina

15 Okone mbata Khumadiiondjo, Latuyalaka Kanga lulimbilimbi ati: Uneli, utshu le Shebina, ulami wa luudu, utuwumbuli wati: 16 We layatshimela diumbu lu dihuli dia ladiku, layaselela edjaselu lu dive, katshaye lane na? Akona eli la ye lane? Na dikambu diatshimaye diumbu lane? 17 Enda, we kanga wulu, Latuyalaka ayukulimbula la wulu. Ndi ayukukimela wulu, 18 ayukomba wombo, ayukuka uku pundi lu kete ya hwe. We ayutuvo leko; pusupusu yaye ya ta y'amena yayuyala leko, we ako leli sonyi ka luudu l'uwandji aye! 19 Dimi layukukitshakitsha uma lu dihuli diaye, layukutshanya uma l'ulimu aye.

20 Lushi lako, dimi layeta ukambi ami Eliyakima on'a Hililiya. 21 Dimi layuwudja ukutu aye, layôlotsha uya aye. Dimi layûkikitsa, layukimo wulu aye lu anya andi. Ndi ayuyala shi asi Jerusalema, ndu luudu la Juda. 22 Dimi layuwusha sapi ka luudu la Davidi. Lam'ayundudihula, nduku layudiha, lam'ayundudihula, nduku layudihula. 23 Layûshikike uku seti kahasukasuka. Ku ndi ayuyala kitu ka lutumbu lu luudu la shi. 24 Ndi ayuyala usuko wa lutumbu tshe la luudu la shi, ndu w'ana wa luta ndu w'antu k'antu, wa diango tshe di'ulimu uku mbaka la akoho.

25 Keli lu lushi lako, seti kako kakawashikike lu dihuli dia wulu, kayuhiko, mbata Latuyalaka Kanga lulimbilimbi. To kayolembiamma, kayoko. Ku wutshu tshe

wakananemi ladiku diato, wayulanyema, ne dia osoku mbakati Latuyalaka.

Enelo lu Dikambu Dia Tura

23 Enelo lu dikambu dia Tura. Nyu mashua wa la Tarashishi, Nyudi tukuku ne dia Tura ambulanyema. Nduku luudu, nduku eotwelo kekiko. Vo wambuyeya dikambu so lu kete ya Kupiro. 2 Nyuyali ki, nyu wane wudjashi l'umamu w'ashi a waki, Nyu asumbishi wa la Sidona, Akendji anyu wakatakindulaka efula Ladiku di'ashi a waki dia nkutsha chumba anyu. 3 Ekundjelu kanyu kaki epunga w'uma la Shihoro, Ee, dinela di'uma la Nile. Nyu mbaki esumbisha a wedja. 4 We Sidona, uvu sonyi, ne dia ashi a waki wamboteketa, Ee, wumbe wa ta w'ashi a waki vati: Dimi kuntata lono kuyanga mbuta ona. Dimi kundeshaka elongo w'apami Kuyanga mbudia esekaseka w'amantu. 5 Lam'ayukuma lukumu lone l'Edjibitu, Vo wayuyala la okei dia mbuka lukumu l'elanyelu ka Tura.

6 Nyu wane watudjaseka l'umamu w'ashi a waki, Nyuleli wulu, nyeti utsha la Tarashishi. 7 Aha usumba anyu w'ongenongeno oso, Wakatatela uma lu nshi y'edjeda, wakawasekola etali? 8 Akona akasanguya ntshela Tura, lakahaneka alebo wa kusu, Laki la esumbishi waki ewandji, Laki la ambetshetshi w'ukunda wa lukumu wa la kete, dikambu ne na? 9 Latuyalaka Kanga lulimbilimbi kakasanguya dikambu diako, Dia monyola utaku tshe wa waku weli la lutumbu, La dia mbutsha antu a waki tshe wa la kete sonyi.

10 Ulekani kete yanyu uku Nile, we ona umuntu a Tarashishi, Ne dia dihuli diakanyashamaka diakalana. 11 Latuyalaka akasimbula lunya landi ladiku di'ashi a waki. Ndi akasutshasutsha waulelu. Latuyalaka akadjanga dia nanya Kanana, Lu ahuli a wulu w'usumba. 12 Ndi akati ati: We hongenangena, we usuyanyi, ona umuntu a Sidona! Unela, utshu utsha la Kupiro. Ndu leko we huyala la mumuya. 13 Enda kete ya Kaladiya. Yo yeko wudja; yo kema Asuriya. Vo mbakatshikela nyama ya ngala Tura. Vo wakalanya mvudu yawo ya waulelu. Vo wakahiki tangelu diawo, wakalanya usumba aka. 14 Nyu mashua wa la Tarashishi, nyudi tukuku, ne dia usumba anyu a wulu wambulana.

15 L'etena keso, l'atei wa deku akumi esambeli Tura ayuhamel, uku efula ka deku diatulumbaka khum'ekanga kemotshi.

Ku l'ekumelu ka deku akumi esambeli, Tura ayimba limbu uku atimbaka umuntu kanga luseka ati: 16 Ose losese, ukindul'usumba, We kanga luseka lakawuhela. Uhumi ololo, otelenganya kimbu, Imbi efula, dia vo nkuho. 17 L'ekumelu ka deku akumi esambeli, Latuyalaka ayokendela Tura. Tura ayukalula l'ulimu awo ntu. Vo wayunana la waulelu tshe wa la kete, wa l'andja. 18 Keli waho awo la difutu diawo wayukimwama le Latuyalaka. Vo hawomotshama, kuyanga mumbama. Keli waho awo wayulesha ndu wayolotsha wane watudjaseka la ntundu ka Latuyalaka.

Elumbwelu ka Latuyalaka le Wedja

24 Enda, Latuyalaka ambulanya kete, ambuyete shenga. Ndi ambuyikadimula etshulitshuli, Ambudianganya wane wudjashi loko vwa. 2 Uku ayuyala le wudja, mbayuyala le olomedu, Uku ayuyala le ukambi a umuntu, mbayuyala le khumendi ka umuntu, Uku ayuyala le usumbi, mbayuyala le usundjishi, Uku ayuyala le osombi, mbayuyala le osondjanyi, Uku ayuyala le one latukundjaka waho, mbayuyala le one latukimoka waho. 3 Kete yayulana tshe, yayutshikala anyanya, Ne dia osoku mbakandjanga Latuyalaka. 4 Kete yambuda tukuku, yambokomo. Andja wambukitakita wulu, waya mbalakata. Ewandji wa wedja wambushila wulu. 5 Kete yambulanyema uma le wane wudjashi loko, Nedia vo wakahediaka elembe. Vowatutunaka adjangu, wakalanya sheki ya pundju. 6 Okone mananu kambulanya kete, La wane wudjashi loko wambuswa, ne dia enungu awo. Okone wa la kete wambutshumbama, Paka atoi atu mbambutshikala 7 Wanu w'uyuyu hawuyuyala ntu, Okodi w'elua wambolengela. Wane wakangenangenaka, wukhuma akhumu, 8 Ongenongeno wa ngomo ambushila. Lundju la waku watongenangenaka lambukume, La ongenongeno wa losese ambushila. 9 Hawuyono wanu, hawuyimba kimbu. Dinono dia wulu diayuyala ululu le anoshi. 10 Usumba w'ufutunu wambulanyema, Luudu tshe lambudihama. Nduku untu leya mboto loko. 11 Wambulela l'esese ne dia wanu kema. Ongenongeno tshe wambukadimo okei, Ongenongeno wa la kete wambukume. 12 Elanyelu kambuya l'usumba, Kuki yambulanyema.

13 Uku atutshikalaka atoi wa mbeli l'okongo w'esutshesutshelu ka tahi

y'utamba, Ndu uku atutshikalaka atoi w'elua lam'atuwumbaka, Osoku mbayutshikala atoi w'antu l'atei a wedja wa la kete. 14 Atshikadi ako wambuhangohongo wulu, wambimba esambu ne dia ongenongeno. Vo wambudja waelu uma lu leke l'edjelu ne dia wukiwuki wa Latuyalaka. 15 Nyu wa lu leke l'ehutwelu ka unya, nyotemole Latuyalaka. Ndu nyu wa lu leke l'edjelu, Nyutumbuli lukumbu la Latuyalaka, Unyashungu wa Isariyele.

16 Shu takuki esambu wa diandu uma lu kuma ka kete vati: Lutumbu layali le Untu Ololo. Keli dimi lakati nti: Lambonda la lunyangu! Lambonda la lunyangu! Mananu kambuya le mi! Ne dia akesanyi wambutsha lukesu, Akesanyi wambutsha lukesu la wulu. 17 Woma wa mamba, wawu la djunga Wambukukungela, we ludjashi la kete! 18 Okone one latulawoka lundju la woma, atutambelaka lu wawu; La one latutumbuka uma lu wawu, atutalaka lu djunga. Adidishi wa l'ulungu wambudihwama, La atshina wa kete wambusukasuka. 19 Kete yambatepalala, Yambudiangana vwa, Yambusutshasutshama wulu. 20 Kete yambusukosuko uku umbidjoki, Yambengengo uku kipoi. Kolo kayo kambuyala wutshu ladiku diayo; Yo yamboko, ku hayunela ntu.

21 Lu etena kako, Latuyalaka ayusuya Ului w'antu weli l'ulungu l'ulungu, Ndu khumi ya dikanga ya la kete la kete. 22 Vo wayomotshama kame Uku asi lukanu lu luudu la pika, Wayudihama lu lukanu. Ku l'okongo wa nshi kambi, wayusuyama. 23 Ngondo hukashiya, Unya ayuyala lutshukutshuku; Ne dia Latuyalaka Kanga lulimbilimbi ayulela L'Ukungu a Siona ndu la Jerusalema. Ndi ayohetsha lutumbu ngangai la ntundu ka dihangamendi diandi.

Usambu wa Diandu ne Dia Ololo wa Latuyalaka

25 Latuyalaka li, we keli Unyashungu ami. Dimi layukutumbula, layandula lukumbu laye, Ne dia we akatshi akambu wa mamba. We akashidiya alaka wakayalaki la kolamelu la mete. 2 We ambete usumba tuta dia ave, Ndu ngelu ka wulu elanyelu. Luudu la diulelu l'asi wedja lambuhandjo, Lo haluhikama ntu. 3 Okone wudja a wulu wayukutumbula, La esumba wa wedja wa ngala wayukuka woma. 4 We aki eshamelu k'usi wula, Eshamelu k'uuhumbi lu pa kandi, Ehandelu uma lu ngimbi, la dedi uma lu luhaladi. Luwi l'akanga a ngala leli Uku ngimbi l'eheli ka lukumbu la

ngelu, 5 Uku luhaladi lu kete ya wumu. We atukitshakitsaka lundju l'asi wedja wa ngala, Uku atututshaka dedi dia dingi luhaladi; Osoku mbatuyolembohayaka akanga a ngala.

6 L'ukungu one, Latuyalaka Kanga lulimbilimbi ayolongoswela antu tshe dambu di'ololo, dambu dia wanu w'ololo, dambu dieli la uhiho, dambu dia wanu wambolongoswama ololo. 7 L'ukungu one, ndi ayulanya ukumbo watukumbaka antu tshe, ee, ukumbo watukumbaka wedja tshe. 8 Khumadiondjo, Latuyalaka ambunya nyoi pundju. Ndi ayukitula asoi tshe uma lu ashu awo, ndi ayunya wudja andi uma lu sonyi tshe ka la kete; ne dia osoku mbata Latuyalaka.

9 Lushi lako, antu wayuta vati: Enda, one eli Unyashungu asu. Shu takukungela, dia ndi ntushimbela. On'eli Latuyalaka, lakatakungelaka. Tongenengene, tuleki ngenangena lu panda kandi. 10 Lunya la Latuyalaka layutshikala l'ukungu one. Moabá ayohotshahotshama lu dihili diandi, uku atohotshahotshama adiyu l'ukutu. 11 Ndi ayusimbulaanya andi l'atei antu andi, uku atusimbulauntuanya dia ntsho usali. Keli Latuyalaka ayukitshakitsa utaku awo, la komba y'anya awo. 12 Ndi ayulanya lungeli lawo la ta, ayulutedia tshe.

Usambu wa Mbekama lu Elamelu ka Latuyalaka

26 Lu lushi loso, antu wayimba usambu one lu kete ya Juda vati: Shu la usumba a wulu. Latuyalaka ambutuhikela panda kandi dia ndjala lukumbu la lungeli lasu la ta. 2 Nyudihuli asuku, Wudja w'ololo weli la kolamelu woto loko. 3 We atulamaka one lukanga tukanyi Tushikikadi le ye, lu ki k'uluwanyi, Ne dia ndi atukekamaka. 4 Nyekamaki Latuyalaka pundju, Ne dia Latuyalaka Unyashungu keli dive dia pundju. 5 Ndi akakitshakitsaka antu wakadjase Lu ahuli wa ladiku, l'usumba wa l'ukungu. Ndi akalanya usumba aka, akuhandjula vwa, Ndi akawete ditshu tu. 6 Amenyi fono la ahumbi wayukamela usumba aka La tshina di'akaka, la tshina di'akaka awo.

7 Mbuka k'untu l'usimbwi keli usimboki. We untu l'usimbwi, we katolongosolaka mbuka k'untu ololo. 8 Latuyalaka li, shu tambukukunga lu mbuka ka dumbwelu diaye. Etema asu wambulula la saki k'euhwelu kaye. 9 Dimi latukukumbulaka l'utema l'utshu. Dimi latukuyangaka la lumu

lami tshe; Ne dia lam'atuyalaka dumbwelu diaye la kete, Antu wa l'andja tshe watekaka sambu k'ololo. 10 Kuyanga untu a kolo ayuhumo lukulu l'olo, Ndi hekela dia ndjala untu ololo. Ndi ayutshaka kolo ketu l'atei a wudja w'usimbwi, La ndi hetawo menda wuki wa Latuyalaka. 11 Latuyalaka, lunya laye leli wulu, Keli vo hawuleniyi; wayenda saki kaye le wudja, wayutshama sonyi. Mete, dia yayutshumba atunyi aye.

12 Latuyalaka, we atutushaka ki, Ne dia kene tshe katututshaka, we katutukutshiyakato. 13 Latuyalaka li, we Unyashungu asu, Khumi kina yakatulela, Keli shu tatudimulaka paka lukumbu laye lutu. 14 Vo wambuvo, hawulumbi ntu. Vo waya asumbu, hawuyulo ntu. We ambâlanya, Ambunya euhwelu kawo pundju. 15 Latuyalaka li, we akahamia wudja! We akahamia wudja, we ambutumbwama. We akakokola elelu tshe wa wudja. 16 We Latuyalaka, vo wakakuyangi lam'akiwo la pa. Vo wakakolombe. Lam'akayâsuya. 17 Uku atulelaka kanga diemi La lono lam'ayangandi mbata, Osoku mbakisu la ntundu kaye, we Latuyalaka. 18 Shu takatshu waemi, takatati lono; Keli shu tambuyuta paka lopepe lutu. Shu kumbeya nshimbela kete, Ndu asi wedja konembiamma.

19 We Latuyalaka, wavo aye wayuyala la lumu, edu awo wayulo. Wane wudjashi lu ditshu wewo, wimbi esambu l'ongenongeno ne dia dihohe diaye dieli dihohe di'usasi. We ayukimo usasi dia vo mpeta lu kete yeli la aledi. 20 Nyu wudja ami, nyuyi, nyuyoto lu mvudu yanyu, Nyudihi kuki l'okongo awo. Nyutukuyashe yema Edja ndu kele kambeta. 21 Enda, Latuyalaka uyatumbi uma lu dihuili diandi, Dia ndjusuya wa la kete, ne dia kolo yawo. Ndu kete yayushula dikila dia andjakemi, Kete hayushe andjakemi nduku yema.

Etshungwelu la Esanganyelu ka Isariyele

27 Lu lushi lako, Latuyalaka ayukimela yombo yandi ya wulu, ya wuki, ayokota shimiamba, ului a wuki, wa lwangwa, wa ana-ana. Ndi ayudiaka keengandu kako katuyalaka lu ashi a waki.

2 Lushi lako kanyimbi usambu ne dia ekambo k'elua. 3 Dimi Latuyalaka keli ulami ato; Dimi layukiloyaka tena tshe. Dimi layukilamaka ndu la yanyi ndu l'utshu, Antu watukukilanya. 4 Dimi kema la kele. Keli naka adungu la atende wayutumba dia ndjondosha, Dimi layunela dia ndo la wo,

Layatshumba, vo tshe kame. 5 Naka aha osoku, wayangi eshamelu le mi, Wayali la mi ki, Ee, wayali la mi ki.

6 Lu nshi yayayi, Jakoba ayudja ediu. Isariyele ayutundja amonga la alemba, Ku vo wayuludia andja l'elua. 7 Latuyalaka akakomola asi Isariyele, Uku akandakomola wane wakâkomola uka? Ndi kumbatshela uku Akandatshela wane wakâdiaki? 8 Lu mete, kakandasani la wo, kakawatshanya. Ndi akawatshanya la efufelu ka lopepe la wulu una l'ehutwelu. 9 Kolo ka Jakoba kayudimanyiama. Ku ulua w'edimanyelu ka kolo kandi ayenama okone: Ndi ayete ave tshe w'ediakelu efushi etu, uku pembe, Edja ndu dikishi dia WaAshera la difanyelu dia unya hadienama ntu. 10 Usumba waki la lukumbu la wulu wambutshikala hwe, Uku edjaselu kambutunama la kambosekama, Uku usui wa shenga. Yana ya ngombe yayolekaka adiyu la akatshi, yayetamaka leko. 11 Lam'ayolengela avundja, vo wayuhimbwama, Ku amantu wayuya, wayâtshumba. Wudja one kema la yimba, Okone one lakâtungi huwauka ketshi, Ee, one lakâtungi huwahumuya lukulu l'olo.

12 Lu lushi loso, Latuyalaka ayuninginya elua, uma l'umamu wa ndjali ka Eyufarate pulu ndu l'okedi wa l'Edjibitu. Ku nyu, asi Isariyele, nyayusanganyema otoi otoi. Ku lushi lako, wayuda pungi ka wuki. Ku waku weli l'as'eku la nyoi wa lu kete y'Asuriya la atunami wa lu kete y'Edjibitu, wayotemola Latuyalaka l'ukungu w'ekila, la Jerusalema.

Dianyelu Dia Efarayima

28 Mananu kayali le dembo dia kusu di'utaku di'ambidjoki wa la Efarayima. Ndu le dembo diambolengela, diateteka elengalenga kandi ngaingai. L'ote w'ukidi w'eteto wa wane watudjoka wanu! 2 Enda, Khumadiondo eko la ukimanyidi a wuki ndu a wulu, Layuhumania antu la ngala la kete, Uku mvula ka mboko, ngimbi k'elanyelu, Mvula ka wulu katutungaka elula. 3 Dembo dia kusu di'utaku di'ambidjoki wa Efarayima Diayohotshahotshama l'ekulu. 4 Dembo diambolengela diateteka elengalenga kandi ngaingai, Dieli l'ote w'ukidi w'eteto, Diayuyala uku ulua a ntundu wambela. Lam'ayena untu ulua aki lu lunya landi, ndi ayuwole esadi.

5 Lushi loso, Latuyalaka Kanga lulimbilimbi ayuyala lufule la lutumbu, La dembo dia kusu dia dimena le atshikadi wa

wudja andi. 6 Ndi ayuyala lumu la sambu k'ololo le one ludjashi lu kiti k'elumbwelu, Wulu le waku watutshanyaaka atunyi lu asuku wa ngelu.

7 Keli ndu vo, watusukosukoka la wanu, Watengengoka la dinono dia wulu. Elombedi la amvutshi watusukosukoka la dinono dia wulu, Wambolembiam dia tshe la wanu. Vo watengengoka la dinono dia wulu, watungaka lu dienelo. Vo watutakanaka lam'atuwusambulaka akambu. 8 Mesa tshe wambulula too la tuwoki, Nduku hyuli yeli kema diango dia mindu. 9 Akona ayundetsha yimba? Akona ayundulimbitshiya wetshelu? Wane wukidishawo awele, Wane wahayoloma? 10 Ambuyala didjangu la diku dia didjangu, didjangu la diku dia didjangu, Wetshelu ladiku dia wetshelu, wetshelu ladiku dia wetshelu, Yema lane, yema lane. 11 Kema, uma l'unyo wa kanga dikukuma, La uma l'oteketa wa kana, Mbayoteketa Latuyalaka le wudja one. 12 Ndi akawatela ati: Mumuya kene, Usha one lambolemba mumuya. Dihuli dia mumuya ne! Keli vo kunanga mbuka. 13 Okone diui dia Latuyalaka diayuyala le wo: Didjangu ladiku dia didjangu, didjangu ladiku dia didjangu; Wetshelu ladiku dia wetshelu, wetshelu ladiku dia wetshelu; Yema lane, yema lane. Okone lam'atawatshu, vo watokokaka akalikali, Watowediawediamaka, wundami, wukelekami.

Wambewula Jerusalema

14 Okone nyu amonyodi watulelaka wudja one wa Jerusalema, Nyulungi diui dia Latuyalaka! 15 Nyu nyatutaka nyati: Shu takadji la nyoi sheki, Ndu takukana la Udimu a Pengandu. Lam'ayeta sui dia wulu, dio hadiusukanla sa su, Ne dia shu tambete kashi eshamelu kasu, La lukesu elawelu kasu.

16 Diako mbata Khumadiiondo, Latuyalaka ati: Enda, lambukitsa dive etshina dia Siona ka shikaa, Dive diedikami ololo, dive dia lu tshuku di'ushinga a wulu, dive diushikikami shikaa. One layudiekama huhasahasa dia ndawo. 17 Dimi layete elumbwelu k'uusimbiwi ushinga wa mbedika too, La sambu k'ololo yediko ya nsimbula. Mvula ka mboko ayulanya edjaselu ka kashi, La ashi wayuyala elula lu dihuli di'eshamelu ka lukesu.

18 Sheki yakanyadjii la nyoi yayulanyema. Diukanelu diakanyukana l'Udimu a Pengandu, hadiushikikala. Lam'ayeta fono ka wulu, To kayunyohotshahotsha. 19 Tena

tshe diayukietaka, to kayunyundaka, Ne dia to kayetaka pindju tshe, ndu la yanyi ndu l'utshu. Untu tshe layuka lukumu lato, ayudidima la woma. 20 Tangi keko mundumundu, untu heyi nsimbo loko, La dihondo dia nkumba tshitshi hadiukuki ndjakumba. 21 Latuyalaka ayunela uku akandatshi l'ukungu a Perazima, Ndi ayumala uku akandumala l'ukidi wa Ngibiyona, Ne dia ndi ntsha ulimu andi, ee, ulimu andi wa mamba, Dia ndi nshidiya etsha andi, ee, etsha andi wa mamba. 22 Kakiane, nyukimo dionyo, Ekodi watukunyushinganya wulu, Ne dia lakuki didjangu di'elanyelu ka wudja tshe Uma le Khumadiiondo, Latuyalaka Kanga lulimbilimbi.

23 Nyuhuke atui, nyuki diui diam! Nyuhukami, nyumani oteketa ami fundu! 24 One latufusaka kete dia mune, Atuyufusaka nshi tshe uka? 25 Lam'ayundushidiya nkamba, ndi hatokomaka ahoho, Hatukakaconde, hatuneka epunga wa yeleta la komba, La wa menge lu leke lukina, la dikomi l'elelu uka? 26 Unyashungu andi atolombolaka oloolo, atuwetshaka. 27 Hawutuwulaka ahoho l'ukanda, Hawutetshetshaka etshimbi wa pusupusu la falasa ladiku diaconde dia ndjisusula, Keli watususulakaconde la tshamba, watuwulaka ahoho l'anya. 28 Vo watetshetshaka etshimbi wa pusupusu La falasa la diku di'epunga ne dia mbesusula, Keli epunga hawutulanaka, Ne dia vo hawututetemalaka mbesusula nshi tshe. 29 Ndu dikambu ne diambuya uma le Latuyalaka Kanga lulimbilimbi. Alaku andi weli mamba, la yimba yandi yeli wuki.

Ariyele la Atunyi Andi

29 Yee! Ariyele, Ariyele; Usumba wakadjashi Davidi! Nyahatanya eleku ladiku di'eleku, Nyuyalaki la nshi ya waki lu tena diayo. 2 Dimi layohenyahenya Ariyele. Tukuku la alelu wayuyala leko, Ku usumba ako ayuyala le mi uku Ariyele, 3 Dimi layukudinga lu beke tshe, Layukutshimbia l'alimbi, layukutshimbiya ngeli. 4 We ayukitshakitsama k'esi, We ayoteketa la diui di'okoke lu kete. Diui diaye diayutumba uma lu kete uku diui di'edimu, Ku we ayutundja diui okoke uma lu ditshu. 5 Efula k'atunyi aye wayuyala uku efula ka ditshu, La efula k'antu wa ngala wayuyala Uku efula ka puhudi katembamaka la lopepe. Dikambu ne diayutshama shashimuya uku mamiya ka su. 6 Latuyalaka Kanga lulimbilimbi ayunyusuya la dikhungula,

Edidimelu ka kete, la lundju la wuki, Lopepe la wulu la ngimbì ndu la lumbi la dja yadikita. 7 Efula ka wedja tshe wayolo la Ariyele, Ee, waku tshe wayolosha lu lungeli landi la ta, Ndu wayohenyahenya, wayuyala uku do, uku enelo ka l'utshu. 8 Uku atenaka one luka ndjala ale ma lu do, Ku lam'akashimondi k'utema hwe, Kana uku atonokaka one luka pusa k'ashi lu do, Ku lam'akashimondi, ku wudi tu. Osoko mbayuyala ului wa wedja tshe wayolosha Ukungu a Siona.

Tshungu la Lukesu l'Isariyele

9 Nyukashimo, nyuhukusani, Nyudihe ashu, nyuyali tutshungu! Nyudjo, keli aha la wanu; Nyusukosuko, keli aha la dinono dia wulu. 10 Latuyalaka ambunyutshulwela lumu la nyuladia djo ya wulu. Ndi kakadihe ashu anyu, nyu amvutshi, Ndu ndi akakumbi ete anyu, nyu amenyi w'akambu wahatayi. 11 Enelo k'akambu ane tshe kambenama le ye, keli uku aui wufundami lu buku diumamatanyi akatshi maa l'elungu, diambuwusha untu leya mbala l'osengsengo vati: Utadiya aui wa loko, ku ndi nkaluva diuvi ati: Haleyi mbala, ne dia dio diambumamatana akatshi maa l'elungu. 12 Ku vo wambusha untu laheyi mbala buku diako, wambosengasenga vati: Utadiya aui weli loko, ku ndi nkaluva diuvi ati: Haleyi mbala. 13 Ku Khumadijonjo akati ati: Lam'atusukanaka wudja one le mi, Vo watonemiaka lu enyo awo la lu elomo awo. Keli etema awo watuyalaka etali uma le mi, La woma watuwumbukaka, weli uku shimu wakaweki le antu. 14 Okone nyulungi, dimi layutate la ntsha ntu Ulimu wa mamba l'atei a wudja one, Ee, ulimu a wuki ndu wa mamba: Yimba y'akanga a tumba yayulanyema, La ewu k'akanga a bewu kayushisho.

15 Mananu kayali le waku watusheka sangweyu diawo etali uma le Latuyalaka, Ndu le waku watutshaka elimu awo lu udjima, wata vati: Atena na? atulimbitela na? 16 Nyu nyatukadimulaka akambu etshlitshuli. Undi, ukingi a puki hatuyalaka la kenemo uleki diwumba uka? La engo kakanigungama atutaka dia utungi andi ati: Ndi kumbeaya ntungami? Puki atutaka dia ukingi ato ati: Ndi kema la yimba uka?

Etshungwelu ka Isariyele

17 Aha yema tshitshe mbambutshikala Dia Lebanonon ndjala ekambo k'elua? Ku ekambo kako ndjala uku ukunda?

18 Lu lushi loso, akanga a puki wayuka

aui w'uma lu buku diako Ndu ashu w'akanga a tutshungu wayutshungo uma lu lungi la udjima, wayena olo. 19 Akanga a memakana wayutamanya ngenangena le Latuyalaka, Ndu asi wula l'atei w'antu wayongenangena le l'Ekila la Isariyele. 20 Kanga ngala huyala ntu, osoki ayushisho, La waku tshe watulungamelaka kolo, wayushila 21 Watutakanya untu lu aui andi, Watambaka one latemalaka la suku dia ndaka antu djunga, La watunganyiyaka untu l'usimbwi la aui wa lukesu. 22 Diako mbata Latuyalaka, lakatshungula Abarahama, lu dikambu dia luudu la Jakoba ati: Jakoba hutshama sonyi ntu, elundji kandi hokolama la dionyo. 23 Ne dia lam'ayena an'andi Ulimu w'anya ami l'atei awo, vo wayukidia lukumbu lami, Vo wayutumbula l'Ekila la Jakoba, Wayukaka Unyashungu wa Isariyele woma. 24 Wane wakanganela lu nyumu yawo, wayukundja ewu, La wane wakanganungaka, wayetawo wetshelu.

Mbekama Edjibitu Eko Anyanya

30 Mananu kayali le ana w'chedia, mbata Latuyalaka! Vo watuyalaka la sangweyu diaha uma le mi. Vo watudjaka sheki yaha la lulangu lami loko. Vo watahatanya kolo ladiku dia kolo. 2 Vo watutshokaka utsha l'Edjibitu, Aha mumbulami, dia ntekama wulu wa Farayo, La dia ntuyanga eshamelu lu dedi di'Edjibitu! 3 Okone wulu wa Farayo wayunyutsha sonyi, La eshamelu lu dedi di'Edjibitu ayunyukananya.

4 Kakiane elohe awo weko la Zoana, La atumami awo wakakumi la Hanese. 5 Vo tshe wayutshama sonyi Dikambu dia wudja waheyi mbakimanya, Kuyanga mbakundjiya waho, Keli wambuyala sonyi la wononyi le wo. 6 Enelo lu dikambu dia nyama ya la Nengebe. Vo wataheka ekundji awo ladiku dia punda, La diango diawo di'ushinga a wulu ladiku dia kamelo. Vo watetaka lu kete y'ohenyohenyo la y'ukiyano, Lene atetaka tambwe ka wadi la k'umi, Dikhuga la kunga katulimboka. Watutshokaka utsha lu wudja waheyi mbakimanya. 7 Ekimanyelu k'uma l'Edjibitu keli anyanya atu. Diako mbakamawole nti: Rahaba ludjashi udjasedjase.

8 Uneli kakiane, ufundi akambu ane lu chasi ka dive la ntundu kawo. Uwasanguli lu buku, Dia vo ndjala lu nshi yayayi Uku omenyi wa pundju, 9 Ne dia wudja one weli wudja w'akanga w'uhedia. Vo

ISAYA

watutaka kashi, hawutulungaka elembe wa Latuyalaka. 10 Vo watutelaka amenyi w'akambu wahatayi vati: Tanyuwaenaki! Ndu watutelaka amvutshi vati: Tanyutelaki akambu w'usimbwi. Nyututelaki paka aui w'oselo, nyutudimbiyaki. 11 Nyangani uma l'osese, nyetole uma lu mbuka. Nyutunyiya l'Ekila la Isariyele uma lu mbuka kasu. 12 Diako mbata l'Ekila la Isariyele okone ati: Ne dia nyu monyolaka diui ne, Ndu nyatukitshaka elungamelu lu wengiya la ngala, nyu nyatuwaekamaka, 13 Okone kolo kene kayuyala le nyu Uku etshi k'eheli kambate elonge, kambengama, kutsha mvuto. To kayuto shashimuya uku mamiya ka su. 14 To kayuhandjo vwa uku atuleka puki ka diwumba. Ku hatshikala nduku kiengakenga ya mbosa dja, Kuyanga ya ntekola ashi l'eteko.

15 Khumadiondjo, Latuyalaka, l'Ekila la Isariyele, kakati okone ati: Paka nyu nyambukalula, nyambuyakimo le mi, mbayunyushimbamela. Tshikima nyambunya ukandukandu, nyambombekama, mbayunyukundja wulu. Nyu kumbetawo osoku, 16 Keli nyakati nyati: Kema, shu tayusamanya esadi lu falasa yasu. Uma lu dikambu diku, mbayunyutukalula la luwangu. Ku nyu nyati: Shu tayahema lu diango diatsho luwangu. Uma lu dikambu diako, mbayudja ndu wane wayunyutshanya luwangu. 17 Antu kinunu wayulawo la luhangu l'untu otoi, La luhangu l'antu atanu nyu nyayulawo, Edja ndu nyambutshikala uku utamba waki dembela l'ote w'ukungu, Uku djimbitelu y'euhwelu lu dikuna.

Daku Dia Ngandji ka Mamba ka Unyashungu le Isariyele

18 Okone Latuyalaka atulangaka nyuhumuya lukulu l'olo, Ndu atukumbulaka nyuka ketshi, Ne dia Latuyalaka keli Unyashungu a sambu k'ololo. Waku tshe watulungamelaka le ndi weli la otshoko. 19 Nyu asi Jerusalema wudjashi lu Siona li, nyuhanyuyulela! Metendiyayunuhumuya lukulu l'olo lam'ayunyolomba. Kam'ayunduka, ndi ayunyukela. 20 Kuyanga Khumadiondjo ayunyusha ma dia lutunu la ashi w'asui, Umbetsha anyu hunyushama ntu, keli ashu anyu wayenaka Umbetsha anyu. 21 Lam'ayunyuyanga mbetola lu lunya la pami kana la lomoso, atui anyu wayuka diui uma l'okongo ati: Mbuka keku, nyokendekende loko! nyokendekende loko! 22 Ku nyu nyayulanya dikishi dianyu

diakanyombe la fesa la diakanyombe la paunyi. Nyu nyayudianganya betshi diako uku diango dia mindu, nyayuta nyati: Nyumo lane.

23 Ndi ayolosha mvula la kete, dia wehu wayunyune ngona, ku mbu ya nde yayufulanelu la kete. Ndu l'etena kako, dungalunga dianyu diayolekaka adiyu l'esui a waki. 24 Ku ngombe la punda yatukambaka dikambo, yayolekaka adiyu wakawahimbula, wakawumia ololo, wosohanyimi la leho. 25 Tokoko la ekedi w'ashi wayuyala uku ladiku di'ekungu a waki la akuna w'etali lu lushi layudiakema antu ndu layunyuko tangelu. 26 Usasi a ngondo wayuyala uku usasi a unya. Usasi a unya wayoheta wulu tena esambeli, uku yediko y'usasi wa nshi esambeli lu lushi layomba Latuyalaka puta ya wudja andi, layundokonoya wimbo wa dikomoki diawo.

Elumbwelu ka Latuyalaka le Asi Asuriya

27 Enda, Latuyalaka ambuya uma l'etali, Kele kandi kayahete uku dja, kayatuto dinga. Elomo andi wambulula too l'ududu, La lulimi landi uku dja yadikita. 28 Luwi landi lambuyala uku okedi wambudja elula, Wambukuma pulu ndu lu kingu, Dia nyunga wedja la djungo y'elanyelu, La okodi lu kingu y'antu dia mbanganyiya. 29 Nyu nyayimba usambu uku atunyimbaka l'utshu wa dambu di'ekila. Nyayongenangena l'utema uku atonganengenaka one latakendakenda lu ekuma wa pungu utsha lu dikuna dia Latuyalaka, le Dive dia Isariyele. 30 Keli Latuyalaka ayukia antu diui diandi dia lutumbu. Ndi ayuwaenya lunya landi layahulo l'ududu wa kele kandi, la lumbi la dja yadikita, la ngimbi ka wulu la mvula ka mboko. 31 Asi Asuriya wayusaka lukumba lu luhangu la Latuyalaka lam'ayundásuya la ukalimba andi. 32 Lu ehetenganyelu ka ngomo la sese, mbayákomola Latuyalaka la ukalimba. Ndi ayolo la wo la lunya landi la wulu. 33 Ne dia dihuli di'etshumbelu diambolongoswamaka, ee, dio diakalongoswama ne dia khum'ekanga. Dio dieli ohongo la wuki, diuludi dja la kunyi efula. Luwi la Latuyalaka layuyitshumba la lumbi la dja uku okedi wa tsho.

Asi Edjibitu Weko Antu Waha Unyashungu

31 Mananu kayali le waku watutshokaka Utsha l'Edjibitu dia ntuyanga

ekimanyelu, Watekamaka falasa ndu wayuyasemaka Ne dia efula ka pusupusu la wulu w'ambahemi wa falasa. Keli vo hawutendaka utsha le l'Ekila l'Isariyele, Kuyanga nyanga Latuyalaka. 2 Keli ndu ndi eli kanga yimba, ayela elanyelu; Ndi hukadimula aui andi. Keli ndi ayunela dia ndo la atshi wa kolo ta, La dia ndosha waku watukimanyiaka wane watutshaka kolo. 3 Asi Edjibitu weko antu, vo kema Unyashungu. Falasa yawo yeko paka emunyi, aha pundju. Lam'ayusimbula Latuyalaka lunya landi, Ukimanyidi ayudidima, la one lakimanyiama, ayoko. Ku vo tshe wayulanyema kame.

4 Okone mbakamvutela Latuyalaka ati: Lam'atudikitaka tambwe la ona tambwe ladiku dia nyama kakayandji, Kuyanga ului w'elami w'ekoko wayuyihangwela, Yo hayuki woma la luhangu lawo, kuyanga ndjamonye, Ne dia efula ka lundju lawo. Okoso mbayuhulo Latuyalaka Kanga lulimbilimbi Dia ndjolo ta la Ukungu a Siona ndu la dikuna diawo. 5 Uku atudamaka fudu ekelo ayo, Osoku mbayulama Latuyalaka Kanga lulimbilimbi Jerusalema. Ndi ayûlama, la ayûhandja, ayuwumba ayûshimbela. 6 Nyu asi Isariyele nyukadimo utsha le one lakanyatombokwela! 7 Lu lushi loso untu tshe ayukadja dikishi diandi dia fesa la dia paunyi diakanyayatshela la anya anyu dia ntsha kolo. 8 Asi Asuriya wayudiakema la yombo yaha uma le untu. Ku yombo yako yaha y'uma le untu, yayâtshatscha. Vo wayulawo yombo, la elongo awo w'apami wayundama lu fumbi. 9 One latuwekamaka, ayulawolawo la woma, La olohe awo wayudidima la ntundu ka dembela, Mbata Latuyalaka lukanga dja yeli lu Siona, La khuka ka dja keli lu Jerusalema.

Khum'ekanga k'Ekila

32 Enda, khum'ekanga ayulela la sambu k'ololo, La ewandji wayolombola antu lu akambu w'usimbwi. 2 Ku untu l'untu ayuyala uku eshamelu uma lu lopepe, Uku ukumbo uma lu ngimbi, Uku ekedi w'ashi lu kete ya wumu, Ndu uku dedi dia dive dia wuki l'usui watuhekyaka antu. 3 Ashu a waku watosenaka, hawuyala lungi; La atui a waku watukaka, wayuka ololo. 4 Utema wa kanga enginya wayulimbitala yimba, La lulimi la kanga dikukuma layeya nteketa esadi. 5 Hawuyeta kanga enginya ntu vati: Kanga lukumu, Kuyanga kanga unyishi ntu vati: Kanga lukahu; 6 Ne dia kanga enginya atoteketaka oteketateketa, La utema

andi ayuyakimoka lu kolo, Dia monyola Latuyalaka lu mvuta kashi lu dikambu diandi, Dia ntshika utema wa one leli la ndjala hwe, La nshimba ashii le one luka pusa. 7 Diango di'ulimu dia kanga lukesi dieli loko. Ndi atusanguyaka nanya omenyi fono l'au i wa kashi, Ndu uhumbi pupu lam'atandi aui w'ololo. 8 Keli kanga lukumu atusanguyaka akambu wa lukumu, La uma lu akambu wa lukumu, mbatundushikikalaka.

Wambewula Amantu wa la Jerusalema

9 Nyu amantu watudjaseka udjasedjase, nyuneli, nyulungi diui diam. Nyu ana w'amantu watuyasemaka, nyuhuke atui. 10 L'okongo wa mvula otoi la nshi motshi, Nyu amantu watuyasemaka, nyayukanana, Ne dia dikambo di'elua hadiongona, la dinela diadio hadiuyala. 11 Nyu amantu watudjaseka udjasedjase, nyudidimi. Nyu wane watuyasemaka, nyuyali la woma! Nyukululi ahondo, nyuyali etakataka, Nyolote akutu lu kendi yanyu. 12 Nyuyakomole lu tulu, Ne dia euhwelu ka dimena di'ekambo la engonelo k'elua. 13 Adungu la atende wayutumba lu kete ya wudja ami, Ee, ladiku dia mvudu tshe y'ongenongeno ndu l'usumba w'ongenongeno,. 14 Ne dia luudu la khum'ekanga layutshikala hwe, La usumba a wuki ayutshikala tongo tu. Vo wayulyala ahuli wa nyama mbetama. Mangana yayogenangenaka loko, Ndu dungalunga diayolela adiyu loko. 15 Enda, ndu Nyuma ka Unyashungu ambutuhulwela uma l'ulungu. Ku usui wa shenga ayukadimo ekambo k'elua La ekambo k'elua ayuyala uku ukunda. 16 Ku akambu w'usimbwi ayuyalaka l'usui wa shenga, La sambu k'ololo ayutshikalaka l'ekambo k'elua. 17 Ulimu wa sambu k'ololo wayuyala lutui tshitshi, La elua ato weli ki la elungamelu pundju. 18 Wudja ami wayudjase lu dihuli dia lutui tshitshi, Edjaselu kaha la ohenyohenyo, lu edjaselu ka ki. 19 Ukunda ayunyuko lam'ayolo mvula ka mboko, La usumba ayukitschakitsama k'esi.

20 Nyu wane watukaka wehu l'emamu w'ashi tshe, Nyeko la ongenongeno, ndu nyatutshungulaka ngombe la punda.

Latuyalaka Ayela Panda

33 Mananu kayali le ye, we unyishi laki kunanyema weme! We latohotolaka antu diango keli vo kunkhotola. Lam'ayuyushila nanya akina, ku we ayulanyema. Ndu lam'ayuyushila

mpotola antu diango, Wayukohotola ndu we.

2 We Latuyalaka, utuki ngandji ka mamba; shu takakulungamela. Uyali ekimanyelu kasu pindju tshe, Ndu panda kasu lu nshi ya pa.

3 Uma lu lundju la diui diaye mbatulawoka antu. Ndu lam'atunyunelaka, wedja watudianganaka vwa. 4 Ekundji awo wayomotshama uku atomotshamaka eto. Antu wayesusana uku atususanaka endjo akatshi.

5 Latuyalaka atumbwamaki, ne dia ndi atudjaseka l'ulungu; Ndi atuludiaka Siona la akambu w'usimbwi la sambu k'ololo. 6 Panda ka mamba, yimba, la ewu, Wayushikikala lu nshi yanyu. Woma wa Latuyalaka weli ukundji anyu.

7 Enda, ahuka wuda tukuku l'andja. Akendji wa ki wulela wulu. 8 Esese wambutshikala anyanya, hawuyeteta loko ntu. Alaka wambulanyema; emenyi wambonywama; Untu holemiamma ntu. 9 Kete yaya l'utanda, Lebanon ambukanana, ambolengela. Sharona ambuya uku usui wa shenga. Bashana la Karamele watololoka akatshi. 10 Kakiene layunela, mbata Latuyalaka, Layuyaedia, layutumbwama. 11 Nyu nyayutsho waemi wa puhudi, nyayuta adiyu. Luwi lanyu leli dja yayunyutshumba. 12 Antu wayutshumbama, wayuyala uduwu utu, Uku adungu wambokotama, wambutshumbama lu dja. 13 Nyu wane weli etali, nyuhukami uku amumutsha. Nyu wane weli suki, nyetawo wulu ami!

14 Antu wa kolo wa lu Siona wambuka woma, Amonyodi wa Unyashungu wambusaka lukumba. Akona l'atei asu ukuki mbindjase lasuki la dja yadikita? Akona l'atei asu ukuki mbindjase lasuki la nyumbi ya dja ya pundju? 15 One latokendakenda lu akambu w'ololo, ndu latoteketaka akambu w'usimbwi; One latuhetshaka waho wa lohotola, One latunyanginyulaka anya watukimela mbu y'utshu, One latudihaka atui andi Ne dia ndi atukuka akambu w'etshulwelu ka dikila, La one latudihaka ashu andi watukena kolo, 16 Untu ako ayudjase lu ahuli wa ladiku. Ave wa wulu wayuyala lungeli landi la ta. Ndi ayulungula ma, ayutanaka ashi tena tshe. 17 Ashu aye wayena khum'ekanga lu dimena diandi. Vo wayena kete lu wuki ayo tshe. 18 Utema aye ayukanaka yimba lu akambu wa woma vati: Lend'eli ufundji? Len'eli ulungudi w'elambu? Lend'eli one lakalaka tangelu? 19 We hayena wudja wa ngala ntu, Wudja

wateketa oteketa wahayamani fundu, La oteketa wa kana wahayeyi.

20 Endi Siona, usumba wa nshi yasu ya waki yakawashikike! Ashu aye wayena Jerusalema, edjaselu ka ki, Luudu la dipema lahembamaki ntu. Lo leko la dikoho diahunwamaki pundju, La ekodi wahahimboki. 21 Latuyalaka ayuyala la su leko lu lutumbu. Ekedji a waki la tokoko wayuyala leko. Keli watu wa luduka kana mashua a waki haweyi nkuma leko. 22 Latuyalaka keli umbadi asu, keli umbidji asu w'elembe. Ndi keli khum'ekanga kasu, ndi kayutushimbela.

23 Ekodi aye wambotewo. Vo hawuyukimela utamba wa mashua wulu, hawuyunanula apema ntu. Ku diango dia dimbu diayukahanyema, Ndu akanga wa tshumbi wakose etenyi. 24 Nduku untu ludjashi la Jerusalema ayuta ati: Dimi la kandji! Antu wa leko wayudimanyama kolo yawo.

Kele ka Latuyalaka le Wedja

34 Nyusukani nyu wedja, nyulungi! Nyuhukami, nyu antu! Kete yuki, ndu kene tshe katuyalaka loko, Ndu andja la diango tshe diatutumbaka loko, 2 Ne dia kele ka Latuyalaka keko ladiku dia wedja tshe, Ndu ududu andi ladiku dia elui awo tshe w'alimbi. Ndi ambâshila ushiki, ambâkimo dia vo ndjakema. 3 Edu wa wavo wayukadjema, wayutumba sulu. Ku ekungu wayolelo la dikila diawo. 4 Ului tshe w'alimbi wa l'ulungu wayuhandjo, Ulungu wayombama uku wombó wa mukanda. Ku ului awo tshe w'alimbi wayoko Uku atololoka dikatshi di'okodi w'elua, Ndu uku atololoka dikatshi di'utamba wa fingu. 5 Yombo yami yambeshama la kele l'ulungu. Enda, yo yayuhula ladiku dia Edome, Ladiku dia antu wakamadjii mananu dia mbalumbuya. 6 Yombo ya Latuyalaka yaya dikila tu. Yo yambukumbama la wata la dikila dia ana w'ekoko la dia weumbi wa mbudi, Ndu wata a washu w'ekongo a waumi w'ekoko, Ne dia wambudiakela Latuyalaka nyama efula la Bozera, Ndu wakûdiakela efula lu kete ya Edome. 7 Mangana yayoko kame la yo, Ndu esongo wa ngombe la waumi wa ngombe. Ku kete yayomena dikila, Ndu ditshu diayukumbama la wata. 8 Latuyalaka ambosonola lushi l'esombweyo, La ononyi wa nsombweya Siona.

9 Tokedi ta Edome tayukadimo elangi, La ditshu diayukadimo tsho. Ku wudja awo

wayutshumbama la dja ya tsho. 10 Dja yako hayudimalaki ndu la yanyi ndu l'utshu, Dinga diayo diayumbelaka pundju. Ku kete yako yayutshikala anyanya lu lolonga la lolonga. Nduku untu ayeta loko pundju, pundju. 11 Kumbaka la eku wayuyala akanga ayo, La ekuki la dingwangwa wayudjaseka loko. Ndi ayusimbula ushinga wa mbedika ufutanu ayo, Ayuhane okodi dia menda elanyelu kayo. 12 Vo wayeta dihangamendi dia lu diulelu, ku nduku otoi; Ku wayeta ndu ewandji, ku nduku untu. 13 Atende wayutumba lu mvudu yaki khumi ya dikanga, Ndu adungu la ahangulakoi lu tangelu diawo. Leko kayuyala edjaselu ka mbulu la seke dia kumbaka. 14 Nyama ya l'susui wa shenga yayuhumana la laundu, La peli yayetata leko. Ee, ekuk'a sheka ayumuyaka leko. 15 Tsheketeki yayutsha kefu leko, yayumba ekeli, yayudama, Yo yayuhuhula, yayukhukhumre tana tayo la tshina di'ahafu. Ndu beki diayusangana leko, wadi l'umi, wadi l'umi. 16 Nyuyangi buku dia Latuyalaka, nyudiali. Nduku otoi ayuyala kema; Nduku layuyala aha la wadi kana aha la umi; Ne dia unyo wa Latuyalaka ambudidjanga. Lu yimba yandi, mbambundásanganya. 17 Lunya landi lakawaedikela ahuli l'okodi, Ku ndi akásonoya ahuli lu kete yako. Okone vo wayuyala akanga ayo pundju; Wayudjaseka loko lu lolonga la lolonga.

Lutumbu Layuyala la Siona

35 Usui wa shenga la kete ya wumu wayongenangena. Kete y'ufumbu yayutundja mamasongo yato alembu w'amena. 2 Mamasongo yako yayoto alembu efula. Ku kete yako yayogenangena, yayimba esambu w'ongenengeno. Yo yayukundja lutumbu la Lebanon, La dimena dia Karamele, ndu dia Sharona. Vo wayena lutumbu la Latuyalaka la dimena dia Unyashungu asu. 3 Nyukikitsha anya wa wodu, nyushikike adui wa yekayeka. 4 Nyuteli akanga w'etema wa woma nyati: Nyukikitali, tanyukaki woma, Nyendi Unyashungu anyu lu ndjayi la esombweyo, difutu dia Unyashungu. Ndi ndame ayuya, ayuyunyushimbela.

5 Ashu w'akanga a tutshungu wayosena, La atui w'akanga a puki wayuka. 6 Akanga a tshumbi wayulimbolimbo uku peli La kanga lumi ayimba esambu. Ashi wayufukofuko l'usui wa shenga, La ekedu w'ashi wayokela lu kete y'ufumbu. 7 Ditshu diaheta diayukadimo uduwa, La

kete ya wumu yayukadimo teko di'ashi. Seke diaketamaka mbulu diayukadimo landa, Ku adiyu wayukadimo asopo la kungu. 8 Mbuka kayuyala leko, osese a wuki wayuweta vati: Osese w'ekila. Wane wahatalongoswama haweti loko. Tekeko la akanga a dinginya haweyi mabetola utsha loko. Osese ako ayuyala dikambu di'ekilami etu. 9 Nduku tambwe kayuyala leko, Kuyanga nyama ka ngala, yo hayutanema loko. Ekilami etu mbayetaka loko. 10 Atshungwami wa Latuyalaka wayukulula, Wayukuma pulu la Siona wayimbi esambu. Ku ongenongeno wa pundju wayukumba ete awo. Vo wayutamanya ngenangena, Ku okei la tukuku wayushila.

*Eyelu ka Ta Dia Senakeribe
(2 Khum. 18:13-37; 2 Ek. 32:1-19)*

36 L'eleku ka dikumi l'anei ka diulelu dia khum'ekanga Hezekiya, Senakeribe, khum'ekanga k'Asuriya, akayi dia ndjolosha esumba tshe wa wulu wa la Juda, ku akélembia. 2 Khum'ekanga k'Asuriya akatumi olombokodi kame l'ului a wulu w'alimbi uma la Lakishi utsha la Jerusalema, le khum'ekanga Hezekiya. Olombokodi ako akayemala lu kungi ka l'uduwa wa ladiku, lu osese w'utsha l'ekambo k'uminyi w'ahondo lu alangi.

3 Ku Eliyakima, on'a Hilikiya, uwandji wa luudu la khum'ekanga, akatshu le ndi kame la Shebina, ufundji, la Asafu, okondodi w'ekondo. 4 Olombokodi w'ului w'alimbi akawatela ati: Nyututeli Hezekiya nyati: Khum'ekanga ka wuki, khum'ekanga k'Asuriya kakumbula ati: Akona eli usuko aye? Le na ekamiye? 5 Dimi lambukutela nti: Aui wa utata, esangweyu kaye, la wulu aye wa ndo ta, weko anyanya. Le na ekamiye, dia we ntombokwelami? 6 Enda, we ambekama ukalimba w'Edjibitu, lokombe lambowele. Lo layuhumuya untu tshe layulekama, layutundula lunya landi. Osoku mbatutshelaka Farayo, khum'ekanga k'Edjibitu, antu tshe watuwakamaka. 7 Kana we ayumvutela wati: Shu tatekamaka le Latuyalaka, Unyashungu asu. Keli aha lu dikambu diandi mbakahandjula Hezekiya alunga la diakelu, atela asi Juda la Jerusalema ati: Kanyotemolaki l'ediakelu kene? 8 Kakiane, yaka, udji la khumemi, khum'ekanga k'Asuriya, sheki. Ku dimi layukusha falasa nunu pendu, naka we la antu weya mbahema. 9 Úkundi atshanyage uwandji wuleki tshitshe l'atei w'ekambi

wa khumemi, dia mbekama. Edjibitu ne dia pusupusu ya ta la ambahemi wa falasa? 10 Undi, dimi lambuya dia ndjulanya wudja one aha la wulu uma le Latuyalaka? Latuyalaka kakamvutela ati: utolosha wudja one, utulanya.

11 Ku Eliyakima, Shebina la Joa wakatela olombodi ako vati: Tambukosengasenga shati: Otekete la ekambi aye lu oteketa w'Arama, ne dia shu mbéyaka. Toteketaki la su l'oteketa w'asi Juda, ne dia alami wa lukumbu l'usumba watukuka. 12 Keli olombodi ako akálaluya diui ati: Undi, le khumeye, ndu le ye kakantumi khumemi dia ndjunyutela aui ane? Aha le elami ene walama usumba, wayole tumi tawo ndu wayono wanyi awo kame la nyu uka?

13 Ku olombodi w'alimbi akemala, akahangohango la diui dia wulu l'oteketa w'asi Juda ati: Nyuki aui wa khum'ekanga ka wuki, khum'ekanga k'Asuriya! 14 Khum'ekanga kata ati: Tanyetawoki Hezekiya nyukesa, ne dia ndi heyi nyushimbela. 15 Tanyetawoki aui wayunyutela Hezekiya dia nyekamia le Latuyalaka, ati: Mete, Latuyalaka ayunyushimbela; usumba one holembiamia le khum'ekanga k'Asuriya. 16 Tanyetawoki aui wa Hezekiya, ne dia khum'ekanga k'Asuriya kata ati: Nyuyi le mi, nyuyudji la mi sheki. Ku nyu tshe untu l'untu ayole uma l'ekambo kandi k'elua, ndu uma l'utamba andi wa fingu. La untu l'untu ayono ashi uma l'ushima andi, 17 edja ndu lam'ayumuya dia ndjunyosa. Ku layutsho la nyu utsha lu kete yufanyi la kete yanyu, kete yeli la mbu ya nde la wanu w'eyuyu, len'eli mbu ya nde la dikambo d'eluia. 18 Hezekiya tanyudimbiyaki ati: Latuyalaka ayutushimbela. L'atei a ditemolatemola tshe dia wedja, undi, etemolatemola kemotshi kakahandja wudja ato uma l'anya wa khum'ekanga k'Asuriya? 19 Ditemolatemola dia Hamata la dia Arapada, lendi'edio? Lendi'eli a ditemolatemola dia Sefaravayina? Dio diakatshungula Samariya uma l'anya ami uka? 20 L'atei a ditemolatemola tshe dia wedja one, diakona diakatshungula wudja adio uma l'anya ami, diayutshungula Latuyalaka Jerusalema uma l'anya ami? 21 Keli vo wakalembohala ki, kumbukaluya nduku diui, ne dia khum'ekanga akadjanga ati: Tanyúkaluyaki nduku diui.

22 Ku Eliyakima, on'a Hilikiya, uwandji wa luudu la khum'ekanga, la Shebina, ufundji, la Joa, on'a Asafu, okondodi

w'ekondo, wakatshatsha ahondo awo. Vo wakayi le Hezekiya wakayuwutela aui uma le Rabishake.

*Juda Ambushimbamela
Uma le Senakeribe*
(2 Khum. 19:1-37; 2 Ek. 32:20-23)

37 Lam'akuki Hezekiya aui aso, ndi akatshatsha ahondo andi, akalote akutu, akoto lu luudu la Latuyalaka. 2 Ndi akatumti Eliyakima uwandji wa luudu landi, la Shebina, ufundji, la elombedi wa dikumanyi, wolotshi akutu utsha le umvutshi Isaya, on'a Amoza. 3 Ku vo wakatuwutela vati: Okone mbata Hezekiya ati: Lushi lone leli lushi la pa, l'asui, ndu la dionyo; ne dia etena k'ana mbuto ambukuka, keli wulu wa mbauta kema. 4 Undu, Latuyalaka, Unyashungu aye, akuki aui w'olombodi w'alimbi wakantumi khumendi, khum'ekanga k'Asuriya, dia monyola Unyashungu a lumu. Latuyalaka, Unyashungu aye, ayuhangwela ne dia aui wakanduki, undu. Okone olombele atshikadi ane Unyashungu.

5 Okone ekambi wa khum'ekanga Hezekiya wakakumi le Isaya. 6 Ku Isaya akawatela ati: Kanyututeli khumenyu nyati: Latuyalaka kata okone ati: Tukaki woma dia aui wakayuki, wakantenge ekambi wa khum'ekanga k'Asuriya. 7 Enda, layükadimula yimba, ku lam'ayunduka kumu, ndi ayukaluba utsha lakandi. Ndi ayutudiakema la yombo lu wudja andi.

8 Lam'akuki olombodi w'alimbi lukumu ati: Khum'ekanga k'Asuriya ambunela la Lakishi, ndi akakalula, akatútana alo la Libina ta. 9 Khum'ekanga k'Asuriya akuki lukumu ati: Tiriħaka, khum'ekanga k'Etiyopiya, uayai dia ndjolo la ye. Lam'akanduki lukumu loso, ndi akatumti akendji le Hezekiya ati: 10 Kanyututeli Hezekiya, khum'ekanga ka Juda, nyati: Tetawoki Unyashungu aye, latuyekamaka, nkudimbiya ati: Jerusalema holembiamia le khum'ekanga k'Asuriya. 11 Enda, we akuki uku akatshela khumi ya dikanga y'Asuriya wedja tshe, uku akawashili ushiki, ku we ayuhanda uka? 12 Wa tshesu wakalanya wedja wa Ngozana, Harana, Rezefu, ndu w'ana wa Edena waki la Talasara. Undi, ditemolatemola diawo diakeyi mbashimbela uka? 13 Lend'eli khum'ekanga ka Hamata, khum'ekanga ka Arapada ndu khum'ekanga k'usumba wa Sefaravayima, khum'ekanga ka Hena ndu khum'ekanga ka Iva?

14 Hezekiya akalungula mukanda uma

l'anya w'akendji, akawali. Hezekiya akatshu la wo lu luudu la Latuyalaka, akatuwufula la ntundu kandi. 15 Ku Hezekiya akalombe Latuyalaka ati: 16 We Latuyalaka Kanga lulimbilimbi, Unyashungu wa Isariyele, ludjashi ladiku dia akeruba! We weme keli Unyashungu a waulelu tshe wa la kete, we kakatungi ulungu la kete. 17 Latuyalaka li, uhuke tui, umbukeli! We Latuyalaka, udihuli ashu aye, endi! Uki aui tshe wa Senakeribe wakandatumi dia nkotenga, we Unyashungu a lumu. 18 Mete, Latuyalaka, khumi ya dikanga y'Asuriya yambuyalanya wedja tshe ndu kete yawo. 19 Vo wakatshumbi ditemolatemola diawo lu dja, ne dia dio diaki paka ditemolatemola diakawatshi uma l'etamba l'ave, diako mbakawadilanya. 20 Latuyalaka li, we Unyashungu asu, utushimbeli kakiane uma l'anya wa Senakeribe, dia waulelu tshe weyi vati: We, weme keli Latuyalaka.

21 Ku Isaya, on'a Amoza, akatumela Hezekiya diui ati: Latuyalaka, Unyashungu wa Isariyele kata ati: Lakuki elombelo kaye dikambu dia Senakeribe, khum'ekanga k'Asuriya. 22 Okone mbakati Latuyalaka lu dikambu diandi ati: Siona, ona umuntu leki emuma ambukonyola, ambukosoka. Jerusalema, ona umuntu, ambukusukiasukiya ote. 23 Akona akayatenge, akayonyola na? Akayahangwela na? L'Ekila la Isariyele! 24 Lu dikambi di'ekambi aye, mbakayatenge Khumadiondjo. We atuyasemaka wati: Uma l'efula ka pusupusu yami, Mbamumumbela ladiku di'ekungu ene pulu ndu la Lebanon. Layokota esasi wuleki etali, la weoto wuleki amena wa loko. Dimi layukuma k'atei a ngamba, lu dihuli diuleki eteto. 25 Dimi lakatshimi teko, lakano ashi uma loko. Dimi layumia ekedi tshe wa l'Edjibitu la dikaka diam.

26 We kumbuka wati: Dimi lambolongsolaka akambu ane, Ndu lambasanguyaka umaka nshi y'edjeda? Kakiane dimi lambukimo wulu wa akambu ane ntshama, Dia we nanya esumba wa wulu la mbaete atongo atu. 27 Okone waku wakadjashi loko, Kundjala la wulu, wakuki woma, wakananana. Wakayala uku adiyu wa lu dikambo, Ndu w'omongela, uku adiyu watomenaka l'elumbi wa mvudu, Ndu uku epunga wahatuli. 28 Dimi mbeyaka edjasel kaye, eunelu kaye, Eyleu kaye, ndu ududu watuyumbukaka. 29 Dimi lakuki dia ududu watuyumbukaka, la dia utaku aye. Okone layukudja shingu diam i'l'ohembe, la okodi

ami lu kingu, Ku dimi layukukaluya lu mbuka kakayayi.

30 Dikambu ne diayuyala djimbitelu le nyu ati: L'eleku kene, nyu nyayolekaka diango diatutumbaka diame, ndu l'eleku k'uyuyu pupu. Ku l'eleku ka satu kanyune, kanyuni; kanyune ekodi w'elua, kanyoleki elua awo. 31 Atshikadi wa lu luudu la Juda wakahandi, wayudja ediu utsha l'esi, ndu wayoto elua ladiku; 32 ne dia atshikadi wayutumba uma la Jerusalema, la waku wambuhanda uma l'ukungu a Siona. Saki ka Latuyalaka Kanga lulimbilimbi kambutsha dikambu ne.

33 Latuyalaka kata dia khum'ekanga k'Asuriya ati: Ndi hukuma l'usumba one, kuyanga mbuka pitu yandi loko. Ndi hukuma la engawu loko, kuyanga mbukela wumbe wa ta. 34 Ndi ayukalula lu mbuka kakandai, ku ndi hukuma l'usumba one, mbata Latuyalaka. 35 Dimi layulama usumba one, layûshimbela, lu dikambu diam, ndu lu dikambu dia ukambi ami Davidi.

36 Ku ondjelo wa Latuyalaka akatumbi, akadiaki asi Asuriya nunu lukama la akumi enanei la tanu lu pangu. Ku lam'aketo ante la pindju, wayendaki, ku vo wakayadi edu etu. 37 Ku Senakeribe, khum'ekanga k'Asuriya, akunela uma lu pangu, akakalula utsha lakandi, ku akatudjase la Ninive. 38 Keli lam'akindi lu ntemola etemolatemola kandi Nisroke lu luudu lato, an'andi w'apami, Adarameleke la Sharezere, wakayûdiaka la yombo. Vo wakalawo utsha lu leke la Ararata. Ku on'andi Esara-Hadona akulela lu dihuli diandi.

Hemo ka Hezekiya (2 Khum. 20:1-11; 2 Ek. 32:24-26)

38 Lu nshi sho, Hezekiya akuki kandji, aki lakuki la nyoi. Ku umvutshi Isaya, on'a Amoza, akayi le ndi, akawutela ati: Latuyalaka kata ati: Olongosole luudu laye, ne dia we ayovo, hayuka ntu.

2 Hezekiya akakadimo utsha l'eheli, akalombe Latuyalaka ati: 3 Latuyalaka li, dimi lambukosengasenga nti: Uho uku akamakendakenda la ntundu kaye lu mete l'utema w'usimbwi, ndu uku akamatshaka akambu waki ololo lu ashu aye. Hezekiya akaleli wulu.

4 Ku diui dia Latuyalaka diakayi le Isaya ati: 5 Utshu, ututeli Hezekiya wati: Latuyalaka, Unyashungu wa sho Davidi, kata okone ati: Lambuka elombelo kaye, lambena asoi aye. Enda, layukahela deku

dikumi la tanu. 6 Dimi layukutshungula, we la usumba one uma l'anya wa khum'ekanga k'Asuriya layulamaka usumba one. 7 Enda, djimbitelu nye uma le Latuyalaka, ya we mbeva wati: Ndi ayushidiya diui diakandati. 8 Dimi layukaluya dedi, diambutalo ladiku dia bandelu dia Ahaza. Unya ayukalula esokosoko yediko ya bandelu dikumi. Ku unya akakalula ekongokongo bandelu dikumi uma lene akawaselami.

9 Usambu wa Hezekiya, khum'ekanga ka Juda, lam'akindi la kandji ndu lam'akandakono one: 10 Dimi lakati nti: Lam'eki nshi yami ki, Ku lambutsho utsha l'Udimu a Pengandu. Deku diam i diambuhimbwama pe! 11 Dimi lakati nti: Dimi halenana la Latuyalaka ntu lu kete ya wasena. Dimi handjenana l'untu ntu l'atei a wane weki l'andja. 12 Edjaselu kami kambunyema uma le mi, Kambembama uku atembamaka luudu la dipema l'ulami w'ekoko. Lumu lami lambombama uku atombaka uhumi adiba. We ambumpimbula uma lu wimo. Umaka yanyi pulu ndu l'utshu, we ayunkumiya. 13 Dimi lakalembohala edja ndu pindju. We atotetshatshaka weka ami tshe uku tambwe. Umaka yanyi pulu ndu l'utshu, we ayunkumiya. 14 Lakawanaka uku yengenga, Lakakhumaka akhumu uku kudumba. Dimi lakaheko mbalela utsha l'ulungu nti: Khumadiondjo li, lambusuyama, unkimanya! 15 Keli, kakamatni na? Ndi akamvutela, Ndame kambutsha dikambu ne. Dimi layokendakenda l'okei nshi tshe ya lumu lami. 16 We Khumadiondjo, uma lu akambu ane mbeli antu la lumu. Ndu uma lu akambu ako tshe, mbeli lumu l'utema ami. Okone onkonoya, umbete la lumu. 17 Enda, asui ami wambukadimo otshoko le mi. We akangenangena dia mpandja lumu lami uma lu diumbu, Ne dia we akakadja kolo yami l'okongo. 18 Udimu a Pengandu heyi nkutumbula, Nyoi heyi nkandula. Waku watuhuloka utsha lu diumbu, Hawutulungamelaka kolamelu yaye ntu. 19 Keli lasena, ee, lasena keya nkandula uku dimi elo. Shi kateyaka nimbitshiya an'andi kolamelu yaye. 20 Latuyalaka ambunshimbela! Okone shu tayimbaka esambu la sese Lu luudu la Latuyalaka nshi tshe ya lumu lasu. 21 Isaya akati ati: Nyela diombo dia fingu, wamami Hezekiya lu edada. Ku ndi ayokono. 22 Ku Hezekiya akambula ati: Djimbitelu yakona yayumeya nti: Layoto ntu lu luudu la Latuyalaka?

Hezekiya Ambulungula Akendi Uma la Babilona

(2 Khum. 20:12-19; 2 Ek. 32:27-31)

39 L'eten a kako Merodaka-Baladana, on'a Baladana, khum'ekanga ka Babilona, akatumela Hezekiya mukanda la ushasha, ne dia ndi akuki lukumu ati: Ndi aki la kandji, ku ambokono. 2 Hezekiya akangenangena dia mbalungula. Ndi akawaenya diango diandi d'iushinga a wulu diaki lu luudu: fesa, paunyi, diango di'epumu, iso k'uishinga a wulu, ndu luudu landi la diango dia ta, ee, diango tshe di'ongonyi andi. Nduku engo kaki lu luudu la Hezekiya, kana kaki lu diulelu diandi, kakindi kumbaenya.

3 Umvutshi Isaya akayi le khum'ekanga Hezekiya, akawumbula ati: Kakakutedi antu ane, la uma lendi akawayi na? Hezekiya akukaluya diui ati: Vo wakayi le mi uma lu kete y'etal, uma la Babilona. 4 Ndi akawumbula ntu ati: Kakawenyi lu luudu laye na? Hezekiya akukaluya diui ati: Vo wakenyi diango tshe dieli lu luudu lami. Nduku engo l'atei a waumbello ami kakimi kumbaenya. 5 Isaya akatela Hezekiya ati: Uki diui dia Latuyalaka Kanga lulimbilimbi. 6 Enda, etena kukuyala, wayemba diango tshe dieli lu luudu laye, la kene tshe kakatakumbedi wa sho edja ndu elo, utsha la Babilona. Nduku engo kayutshikala, mbata Latuyalaka. 7 Vo wayotola ndu ana aye w'apami wambuyuta, dia ntuaete elenga lu luudu la diulelu la khum'ekanga ka Babilona. 8 Ku Hezekiya akatela Isaya ati: Aui wakati Latuyalaka l'unyo aye nkukaka. Ndi akakan yimba ati: Ayuyala eku la lutui tshitshi lu nshi ya lumu lami.

Aui w'Esambelu ka Unyashungu le Siona

40 Nyusambi wudja ami, nyusambi, mbata Unyashungu anyu. 2 Nyuteli asi Jerusalema aui ololo, Dia nsamba etema awo. Nyuwateli la diui dia wulu nyati: Nshi yawo y'ata yambushila, Kolo yawo yambudimanyema. Vo wambulungula asui tena pendi uma le Latuyalaka, Ne dia kolo woyo tshe.

3 Nyuhukami diui diahangohango ati: Nyati mbuka ka Latuyalaka l'usu, Nyolongoswele Unyashungu asu osese l'usuwa shenga. 4 Ekidi tshe wayutediama, La ekungu la akuna tshe wayukitshakitslama, Ahuli w'akote akote wayusimbo, La ahuli w'afuku afuku wayukitanyama.

5 Lutumbu la Latuyalaka layenama. Ku antu tshe wayulena kame, Ne dia Latuyalaka kambuta osoku.

6 Nyuhukami diui diata ati: Uhangoango! Ku umvutshi akükaluya diui ati: Ahangohangomi na? Antu tshe weli uku adiyu. Dimena diawo tshe dieli uku dembo dia l'usui. 7 Adiyu watumaka, la alemba watoloka Lam'atuwafufaka Latuyalaka lumu. Mete, mete antu uku adiyu mbewo. 8 Adiyu watumaka, la alemba watoloka, Keli diui dia Unyashungu asu diatutshikalaka pundju.

9 We umvutshi wa kumu y'ololo lu Siona, Umbeli l'ukungu w'utali, dia diui diaye wulu. We umvutshi wa kumu y'ololo lu Jerusalema, Edia diui, tukaki woma. Uteli esumba wa Juda wati: Nyendi Unyashungu anyu. 10 Enda, Khumadiondjo, Latuyalaka uayyi. La lunya landi la wulu, mbatundulelaka. Enda, waho andi weko la ndi, La diango dia lukahu diambeta la ntundu kandi. 11 Ndi ayoleshaka ekoko andi uku ulami. Ndi ayosa ana w'ekoko l'anya andi; Ndi ayuwakhumbatela lu tulu. Ndi ayoimbola wali la tana tawo okoke.

Unyashungu wa Isariyele, Nduku Ledimi la Ndi

12 Akona akedika ashi lu difuku di'ewambu ka lunya landi, Akedika ulungu l'anana wa pita, Akatshumanya ditshu dia la kete lu mbaka na? Akedika wutshu w'ekungu, akahe akuna lu kilo? 13 Akona akedika Nyuma ka Latuyalaka, akawetsha na? 14 Akona akadji la ndi sheki, akawetsha? Akôlombola lu mbuka k'usimbwi? Akumanya akambu fundu na? Akawenya mbuka k'ewu na? 15 Enda, wedja w'antu weko uku dipopo di'ashi lu mbaka. Vo weli uku loseke la ditshu ladiku dia kilo. Enda, ndi atediaka wedja wa l'asenga uku toseke ta ditshu. 16 Etamba tshe wa la Lebanona La nyama tshe ya leko hawukuki ulambu wa lutshumba. 17 Wedja tshe weli anyanya la ntundu kandi. Vo weko paka anyanya, nduku engo le ndi.

18 La untu akona ayunyedika Unyashungu? La engo kakona kakunyufanya la to? 19 Ekishi! utshudi katukitshaka. Utshudi wa paunyi katukikumbaka la paunyi, Katutshaka molola ato la fesa. 20 One laha la diango efula ne dia wula andi, Atosonolaka utamba a wulu waheyi mboto lumbu. Ndi atuyayangelaka usi ulimu la komba, Dia mbutshela ekishi ka heyi

nsukasuka. 21 We heyi dikambu diako? We kudiuka? Vo kunkuteladio umak'etatu? We kudimana fundu umak'etungelu ka kete? 22 One ludjashi ladiku dia kete Atombolaka ulungu uku dihondo dia shadisadi. Ndi atûnanulaka uku luudu la dipema dia ndi mbidjase loko. Ku wane watujaseka la kete, watuyalaka uku akata. 23 One lateteka ewandji anyanya, Katunyaka ndu embadi wa la kete dimemo. 24 Vo kumunema, kuyanga mbukama, Ndu etundu awo kema la ediu lu kete. Ndi atuwafufaka luwi ku vo watumaka. Ku punganendji atuwaembaka uku adiyu. 25 Akona ayunyomedika la ndi, Dia dimi nfana la ndi? mbata l'Ekila.

26 Nyedia ashu anyu utsha l'ulungu, Nyendi one lakatungi diango ne, Latituditdjaka l'elui adio. Ndi atudietaka dio tshe kumbu. Uma lu wuki wa wulu andi, ndu uma lu khudu kandi k'utamanya, Mbakidio kumpumbama nduku otoi. 27 Okoko wana wataye we Jakoba, Ndu wateketaye we Isariyele wati: Akambu ami wambushama uma le Latuyalaka, Ndu elumbwelu kami kambunyema uma le Unyashungu ami? 28 We ateyi? We atuk? Unyashungu a pundju, Latuyalaka, Utungi wa kuma ya kete, Hatokomoka dimba, hatuhokoka. Nduku untu leya mbedika yimba yandi. 29 Ndi atushaka one lambokomo wulu. Ndi atufudiyaka one lamboko la yimba ntshimba wulu. 30 Akenda w'apami watokomoka, watuhokoka. Ndu elongo w'apami watukitaka huhakayi. 31 Keli wane watukungelaka Latuyalaka, Watuludiamaka la wulu w'uyuyu. Vo watufumboka uku fudu ya pungu. Vo watulawoka, Ku hawuheko, watokendakenda, ku hawokomo.

Daka Dia Unyashungu le Isariyele

41 Nyu asenga, nyolembohali ki la ntundu kami. Antu waludiami la wulu w'uyuyu, wasukani, la watekete. Tusukani kame lu elumbwelu. 2 Akona akatunyira untu uma l'ehutwelu ka unya, akawete uya le ndi, Akukimwela ndu akawete umbuledi a khumi ya dikanga? Ndi akawaete ditshu la yombo yandi, Ndu uku adiyu watufumboka la uta andi. 3 Ndi akatawatshanyaka, aketi la ki Lu mbuka kakindi kumbetaka. 4 Akona akatshi dikambu ne, aketi nonga umak'etatu? Dimi Latuyalaka, leli etatelu, kame la ekumelu, keli ndi.

5 Waku wudjashi lu asenga, watenaka,

watukaka woma. Wa la kuma ya kete watitudimaka, watuyakaka, watusukanaka. 6 Vo tshe watukimanyanyianaka. Untu l'untu atutelaka unyandi ati: Ukititali! 7 Okone utshudi w'abaya atukikitshaka utshudi wa paunyi. One latokolongaka la uhomo, atukikitshaka one latutshulaka la nyundu, Atutaka dia songa ati: Dio diaya dimena! Ndi atudikikitshaka la seti, ne dia dio diatukusukasuka.

8 Keli we ukambi ami Isariyele, Jakoba lakamasonola, dihuu di'ongenyi ami Abarahama; 9 We lakamose uma la kuma ya kete, Ndu lakameti uma lu atshuku ayo; Lakamatela nti: Ukambi ami mbeye. Dimi lakakosonola, dimi kunkutuna.

10 Tukaki woma, dimi leko la ye. Tuyakiyanyaki, dimi keli Unyashungu aye. Dimi layukukikitsha, layukukimanya, Layukusukela ololo la lunya lami la pami. 11 Enda, waku tshe watukukaka kele, Wayukanana, wayutshama sonyi. Wane watolokaka la ye, wayulanyema, wayushila ushiki. 12 We ayuyanga waku wakadjaka la ye lundju, Keli we huwatanu. Wane watolokaka la ye, wayuyala pudi, wayushila tshe, 13 Ne dia dimi keli Latuyalaka, Unyashungu aye, Latukukimelaka lu lunya laye la pami. Dimi latukutelaka nti: Tukaki woma, layukukimanya.

14 Jakoba, we kanga ohodu, tukaki woma. Ndu nyu asi Isariyele. Dimi layunyukimanya, mbata Latuyalaka, L'Ekila l'Isariyele, utshungudi anyu. 15 Enda, dimi layukete ohelo wa panga w'uyuyu. Ku we ayohela ekungu, ayekitshakitscha, Ayete akuna efushi etu. 16 We ayâfufula, ku lopepe layuwaemba; La punganendji kayadianganya. Ku we ayongenangenela Latuyalaka! Ayuyatumbula lu dikambu dia l'Ekila l'Isariyele.

17 Asi wula la amenyi fono watuyangaka ashi, ku ashi pudi. Weudi awo wambuma tu la pusa k'ashi. Dimi Latuyalaka layuwaukela. Dimi Unyashungu wa Isariyele haluwaseka. 18 Layutundja ekedi w'ashi uma l'akuna w'etali, La teko di'ashi uma l'ekidi. Dimi layete usui wa shenga uduwa, La kete ya wumu teko di'ashi. 19 Dimi layutundja etamba w'esasi, w'elungu, Wa wuma, la w'eweli l'usui wa shenga. Dimi layune weoto, eduwula, la esengi, 20 Dia antu mena, mbeya nkana yimba la mana fundu vati: Lunya la Latuyalaka mbakatschi akambu ane. L'Ekila l'Isariyele keli utungi wa akambu ane.

Unyashungu Ambudja Ditemolatemola Tofefe

21 Nyuyateketele, mbata Latuyalaka. Nyutundja emenyi anyu a wulu, mbata khum'ekanga ka Jakoba. 22 Watenyu bewu diawo watuteli akambu wayanga ndja. Watusanya akambu wakatshama ntundu Dia shu nkana yimba loko, dia mbeya ekumelu kawo. Naka aha osoku, nyututeli akambu wayayi. 23 Nyututeli akambu wayayi, keli teyi shati: Ditemolatemola dia mete mbenyu. Nyutshi ololo kana kolo, Dia shu tshe mbuka la mena kame. 24 Enda, nyu nyeko anyanya, ndu ulimu anyu pudi. La one latunyekamaka, eko wononyi. 25 Dimi lakunyiya untu omotshi uma la ngel'a kushi. Ndi ayuya uma l'ehutwelu ka unya, Ayetaka lukumbu lami. Ndi ayuya dia ndjohotshahotscha embuledi uku lotekete, Uku atohotshahotscha ukingi a puki diwumba. 26 Akona akati dikambu ne umak'etatelua dia shu dieya, Akona akatutela la ntundu dia shu mvuta shati: Mete? Nduku untu lakatutela, Nduku lakatenya, nduku lakuki aui anyu. 27 Dimi kakatatela mvutela wa la Siona nti: Vo ane, vo ane! Ndu le Jerusalema nti: Dimi lambukutumela dikendji dia kumu y'ololo. 28 Dimi lambenda, ku nduku untu, Nduku untu l'atei awo eli la yimba ya nkalyayumi diui lam'uwandubidi. 29 Enda, vo tshe weli anyanya. Elimu awo nduku engo. Dikishi diawo dieli efufelu k'anyanya.

Ukambi wa Latuyalaka

42 Enda ukambi ami latumusukelaka. 1 Osonami ami, latongenangenaka utema ami. Dimi lakawahe lumu lami, Ndi ayutela wedja dia dialelu di'ololo. 2 Ndi huhangohango, hedia diui diandi. Diui diandi hadiukema l'esese. 3 Ndi hahimbula sopo diakawaminula, hadimi ushingya wa tala, wakatumbi dinga. Ndi ayulumbya la sambu k'ololo. 4 Ndi huhoko, huyala la ohodu edja ndu lam'ayundushikike sambu k'ololo la kete. Antu wa l'umamu wa ashi a waki watulungamelaka wetshelu andi.

5 Okone, mbata Unyashungu Latuyalaka, lakatungi ulungu, lakananula; lakanandjula kete la diango dieli loko, latufufaka antu weli loko luwi, ndu latushaka wane watokendakenda loko lumu. 6 Dimi Latuyalaka, lakaketi la esangweyu ka shikaa. Dimi layukukimela lu lunya, layukulama, layukete daka le wudju ami, la usasi lu wedja, 7 dia nsenya ashu w'akanga a tutshungu la ntshungula wane wakandama uma lu lukanu

la waku wudjashi l'udjima uma lu difuku di'asui. 8 Dimi keli Latuyalaka. Oso keli lukumbu lami. Dimi halakimo lutumbu lami le ukina, kana nemo diamti le dikishi. 9 Enda, akambu wakatama ntundu, wambutshama, lambukutela akambu w'eyuyu. Ntundu vo watatshama, mbamumukutelawo. Diandu le Latuyalaka ne dia Etshungwelu kandi ka wuki.

10 Nyimbeli Latuyalaka usambu w'uyuyu, Nyu wane watetetaka lu ashi a waki, ndu wane watudjaseka loko, Nyu asenga la tshe wudjashi loko, Nyuwandulaki pulu ndu la kuma ya kete. 11 Usui wa shenga la esumba weli loko, Nyu ngelu yudjashi asi Kedara, wedia aui awo. Wane wudjashi la Sela wimbi esambu l'ongenongeno. Wadji waelu w'ongenongeno uma l'ete w'ekungu. 12 Watumbulaki Latuyalaka, Wawandulaki lu asenga. 13 Latuyalaka ayunela uku kanga wulu. Ndi ayufudia ngala kandi uku dihuka dia wulu. Ndi ayedia diui, ayuhangohango, ayenza atunyi andi wulu andi. 14 Dimi lakatshikala ki edja, Lakalembohala, lakayakimela. Keli kakiane, dimi layulela uku umuntu latata lono, Layuhetula lakema akemo. 15 Dimi layete ekungu la akuna shenga tshu, Layumia tumbatumba tshe, layete ekedi losenga lutu, Layumia eduwa tu. 16 Dimi layolombola akanga a tutshungu lu mbuka kahaweyi, Ee, lu mbuka yahaweyi, mbayumalombola. Dimi layukadimula udjima yanyi la ntundu kawo. Ndu layusimbulu ahuli w'akote. Osoku mbayumutsha. Dimi haluwaseka. 17 Waku watekamaka dikishi dia lutshula, Watutelaka dikishi dia lolelola vati: Ditemolatemola diasu mbenyu, Wayukalula ekongokongo, wayolombo la sonyi.

Isariyele Wambusuwa, ne dia Vo Hawulangi Mbekiyama

18 Nyu akanga wa puki, nyuki! Nyu akanga a tutshungu, nyendi, ndu nyosene! 19 Akona eli tshungu, uku ukambi ami? Eli luhuki uku dikendji diamumutumuna na? Eli tshungu uku unangimi ami? Eli tshungu uku ukambi wa Latuyalaka? 20 We menaka akambu efula, keli we hewo. Atui aye weko hwe, keli we huki. 21 Uma l'ololo wa Latuyalaka mbakandangenangena, Dia mbete oleme wuki la uluwanyi. 22 Wudja one mbakawakhumuya diango, mbakawahandjula! Vo tshe wambundama lu tulunga, Wambudjama lu mvudu ya kanu. Vo wambuyala uku nyama kambundama,

Ku nduku untu lakishimbela. Weli uku diango dia lohotola, Ku nduku untu lata ati: Nyudikaluya. 23 Akona l'atei anyu ayuhuke tui lu akambu ane? Akona ayulanga mbahukama La mbalunga ne dia etena kayayi? 24 Akona akakimo Jakoba dia ndjala engo ka lohotola, La Isariyele le apotodi, aha Latuyalaka? Shu takutshela kolo, konkendakenda lu mbuka yandi, Kunkitanya oleme andi. 25 Ndi akatshulwela ududu wa kele kandi la ngala kandi ka ta. Ndi akâdingi la dja, keli vo kunimbitela. Ndi akatshumbi, keli vo kunkitscha dikambu ne l'utema.

Latuyalaka Ndame Keli Utshungudi

43 Latuyalaka lakakutungi, we Jakoba! Ee, lakakukungi uma lu ditshu, we Isariyele, kata ati: Tukaki woma, ne dia lakakushimbela. Dimi lakaketi lukumbu laye; lami keye. 2 Lam'ayuyetetaka lu ashi, dimi layuyalaka la ye; Ndu lam'ayuyutehoka ndjali, yo hayukuditsha. Lam'ayuyokendakenda lu dja, Yo hayukutshumba, kuyanga lumbi halukudinga. 3 Dimi leli Latuyalaka, Unyashungu aye, L'Ekila l'Isariyele, Ushimbedi aye. Lambukimo Edjibitu uku etshungwelu kaye, Ndu Etiyopiya la Seba lu dihuli diaye. 4 We keli engo ka nemo ndu k'ushinga a wulu lu ashu ami. Dimi latukulangaka, Diako mbamumukimo antu lu dihuli diaye, La wedja ne dia lumu laye. 5 Tukaki woma, ne dia dimi leko la ye. Dimi layukaluya diuhu diaye uma l'ehutwelu, Ndu layudisanganya uma l'edjelu. 6 Dimi layutela wa la ngel'a kushi nti: Nyukimo! Ndu wa la diku dia kushi nti: Tanyukimeki! Nyela an'ami w'apami uma l'etalii, La an'ami w'amantu uma lu kuma ya kete. 7 Nyela untu tshe latetamaka lu lukumbu lami, Ndu lakamatungu ne dia lutumbu lami, Lakamakingi, ee, lakamatshi.

8 Nyela akanga a tutshungu weli la ashu, Ndu akanga a puki weli la atui. 9 Wedja tshe wamotshami kame, la antu wasangani. Akona l'atei awo eya ntutela akambu wakatama ntundu? Wâtundja emenyi awo dia vo nkundja luha. Antu wuki, wati vati: Mete kewo. 10 Emenyi ami mbenyu, mbata Latuyalaka. Nyu nyeli ekambi ami wakamasonola, Dia nyu mbeya, mbetawomi la nimbitela nyati: Dim'akone. Nduku etemolatemola kakiko la ntundu kami. Nduku kene kayuyala l'okongo ami. 11 Dime keli Latuyalaka, Nduku ushimbedi ukina weko, paka dime. 12 Dimi dime kakanyutela

akambu ane, Kakanyushimbelia, kakanyenya akambu ane, Aha etemolatemola k'asi wedja keli l'atei anyu. Nyu nyeli emenyi ami, mbata Latuyalaka, Dimi keli Unyashungu. 13 Dimi keli ndi umaka mombokombola. Nduku leya mpotola engo uma lu lunya lami. Dimi layukambaka ulimu. Eya nshimbami na?

14 Okone mbata Latuyalaka, Utshungudi anyu, l'Ekila l'Isariyele, ati: Lu dikambu dianyu, mbamumutuma utunyi la Babilona, Ku dimi layalembia. Dielu di'ongenongeno di'asi Kaladiya Diayukadimo dielu dia lunyangu. 15 Dimi leli Latuyalaka, lanyu l'Ekila, Utungi wa Isariyele khum'ekanga kanyu.

16 Latuyalaka ako, katataka osese lu ashi a waki, La mbuka lu ashi a wulu. 17 Ndi katelaka pusupusu la falasa, Alimbi la andoshi wa to wa wulu. Ndi atokoshaka atunyi kame, edja ndu wo wambulanyema, Wambudimala uku ushinga wa tala, haweyi munela ntu. 18 Tanyuhoki akambu waketi, Kuyanga nkana yimba lu akambu w'edjedja. 19 Enda, dimi layanga ntsha dikambu di'uyuyu, Dio diuyanga ntshama. Undi, nyu hanyudieya? Dimi layetsha mbuka l'usui, la ekedi l'usui wa shenga. 20 Mbulu la kumbaka ya l'esui yayuntumbula, Ne dia dimi layutundja ashi l'usui, la ekedi l'usui wa shenga, Dia mbisha wudja ami, osonami ami. 21 Ee, wudja wakamayatungela dia vo nyanganya lutumbu lami. 22 Keli Jakoba li, we kontemolakami! Isariyele li, we akampeko! 23 We kumbelami elambu wa lutshumba uma lu dungalunga diaye. We konemiami la elambu aye. Dimi kunkohenyahenya dikambu dia elambu wa lutshumba, Kunkuhekuya dikambu di'ulambu wa shima. 24 We kunsumbelami diango di'epumu la falanga, Kuyanga ndutshami la wata w'elambu aye. Keli we akampenyahenya la kolo yaye. We akampekuwa la ehdia aye. 25 Dimi dime, lu lulangu lami, mbatumudimulaka kolo yaye. Dimi haluho kolo yaye.

26 Yaka, tulumbuli, uyateketele. Umbuhuli naka we la dikambu dia nyindjama. 27 Lotshetshe laye lakatshi kolo, Ndu embetsha aye wakantshela kolo. 28 Diako mbakamatuni elombodi w'etemwelo. Lakakimo Jakoba l'elanyelu, la Isariyele lu dionyo.

Latuyalaka Ndame Keli Unyashungu

44 Ukambi ami Jakoba, Isariyele lakakutungi l'utema wa nyu, Ndu

latukukimanyika, kata ati: We ukambi ami Jakoba, we Jeshurana lakamasonola, tukaki woma. 3 Dimi layutshulula ashi lu kete yambuma, Layutunga ekedi lu kete y'ufumbu, Dimi layutshulwela dihuu diaye lumu lami, La tukanula taye otshoko ami. 4 Vo wayulaka uku adiyu l'umamu w'ashi, Uku eduwula l'umamu w'ekedi. 5 Omotsi ayuta ati: Dimi leli la Latuyalaka; Ukina ayuta ati: Lu dihuu dia Jakoba kemi. L'asatu ayufunda lu ewambu kandi ati: Dimi leko la Latuyalaka; ayuyadja lu dihuu dia Isariyele.

6 Latuyalaka, Khum'ekanga ka Isariyele La Utshungudi andi Kanga lulimbilimbi kata ati: Dimi leli etatelu ndu ekumelu. Nduku Unyashungu ukina weko paka dime. 7 Akona edimi la mi? Eya mvuta akambu wahatayi uku dimi? Ndi awati, atulimbitshiya okondo Umak'etena kakamakitsha wedja w'edjedja. Ndi atuteli akambu wayanga ntshama ndu akambu wahatayi. 8 Tanyukaki woma, tanyudidimaki; dimi kunyenza, Ndu kunyutela dikambu ne umaka nshi y'edjedja uka? Nyu nyeli emenyi ami: Unyashungu ukina weko uku dimi? Kema; dimi mbeyaka nti: Nduku dive dikina dieko.

Eko Enginya Dia Ntemola Dikishi

9 Wane watoselaka dikishi weko dinginya; la dikishi diawo diatuwulangaka dieko anyanya. Atemodi wa dikishi weli akanga ta tutshungu ndu antu waha la yimba; ekumelu kawo eli sonyi. 10 Akona atutshaka etemolatemola kana ekishi ka Iolelola, ku hakundji ekimanyelu? 11 Enda, wane tshe watukambaka loko, wayutshama sonyi, ndu atshiadio weli paka antu. Vo tshe wamote, wemali. Ku vo tshe wayudidima wayutshama sonyi kame. 12 Utshudi a mbulu atudjaka luwulu lu akalanga, atulutshulaka la uhumo, atulolongosola la lunya landi la wulu. Ndi atukaka ndjala, atokomoka dimba, atonoka ashi, atushilaka wulu. 13 Utshudi w'abaya atedikaka utamba la ushinga, atusangulaka usatu w'ekishi loko la dikalanga, atudjaka tulimbitel tato la okodi w'utshimbedi. La kaku, mbatundoselaka ekishi kufanyi l'untu, dia to ndjalaka lu luudu. 14 Ndi atokotaka esasi, atosonolaka woto kana ulungu, atuweteka dia vo mbula l'atei ukunda. Ndi atuneka usasi, ku mvula yatuwudiaka. 15 Utamba aka atukimanyika untu dia mpetsha dja. Ndi atuwunaka kunyi, atohetshaka dja, atuyukaka, atukateka ma. Ku ndi atutshaka etemolatemola la wo, atukitemolaka, atoselaka ekishi,

atukikhulseamelaka. 16 Ndi atohetshaka dja la etenyi ka hendi k'utamba ako. Lu dja yako katundufumbaka unatshi, atolekaka, atulutaka, atukaka dja; atutaka ati: Haa! haa! Lambuka dja, lambusalanganya dimba. 17 Ku la etenyi ka hendi kutshikadi, ndi atoselaka etemolatemola kemotshi, ekishi kandi. Ndi atukikhulseamelaka, atukitemolaka, atukilombaka ati: Unshimbeli! We keli Unyashungu ami. 18 Vo haweyi, hawukani yimba. Ashu awo wambudihama, hwosene. Etema awo wambudihama, haweyi nimbitela akambu wa yimba. 19 Nduku otoi l'atei awo ayukana yimba; ayuho ati: Lakatshumbi etenyi ka hendi k'utamba one lu dja. Lakakate ma lu dja yawo, lakafumbi unatshi lu akalanga awo, lakali? Ku layutsha engo ka wononyi la etenyi k'utamba kambutshikala? Undi, layukhusamela etenyi kene k'utamba? 20 Ndi atolekaka utuku. Utema andi wa lukesu watuwunganyiyaka. Ndi heyi nshimbela utema andi; kana mvuta ati: Aha kashi kene kukimedimi lu lunya lami la pam?

Latuyalaka, Ushimbedi wa Isariyele

21 We Jakoba, Isariyele li, uhoki akambu ane, Ne dia we eko ukambi ami. Dimi lakakutungi; ukambi ami mbeye. Isariyele li, dimi halukuhela. 22 Dimi lambunya ehedia aye uku atukumboka lungi; La kolo yaye uku atetaka dingi, Ne dia dimi lakakushimbela, Ukaluli le mi, ne dia dimi lakakushimbela. 23 Ulungu li, imbi usambu, Ne dia Latuyalaka kambutsha dikambu ne. Nyu ehongo wa la kete, nyuhangohango. Nyu ekungu, ekunda, la etamba tshe weli loko, Nyudji dielu di'ongenogeno, Ne dia Latuyalaka akashimbela Jakoba. Ndi ayutumbwama lu Isariyele.

24 Latuyalaka, Ushimbedi aye, La one lakakutungi l'utema a nyo, kata ati: Dimi leli Latuyalaka, latutshaka akambu tshe. Dimi dime kakananula ulungu, La dime kakasandjula kete, akona akankimanyia? 25 Dime katufutanyaka tulimbitelu ta akanga a kashi. Dime kateteka wetshi w'awulu dipoka. Dimi katukulyaka akanga a yimba ekongokongo, Katukadimulaka yimba yawo enginya. 26 Dime katushikikeka diui di'ukambi ami. Dimi latushidiyaka akambu wahatayi watutaka akendji ami. Dimi latutaka dia Jerusalema nti: Antu wayudjase loko; La dia esumba wa Juda nti: Vo wayuhikama ntu. Dimi layuluwanya ahuli awo wakalana. 27 Dimi katutelaka dingunda nti: Umi; dimi

layumia ekedi aye. 28 Dimi katutaka dia Kuro nti: Ndi eli ulami ami w'ekoko. Ndi ayushidiya lulangu lami tshe. Ndi ayuta dia Jerusalema ati: Yo yahikami ntu; La dia etemwelo ati: Atshina ato wahikami.

Ambush Kuro Ulimu

45 Okone mbateketa Latuyalaka le Kuro, Lakandakiti iso l'ote, latundukimelaka lu lunya la pami Dia nembia wedja weli la ntundu kandi, Ndu dia ntewoka eya wa khumi ya dikanga, La dia mbudihwela kuki ne dia yo yatukudihama ati: 2 Dimi layutsho la ntundu kaye, layukitanya akuna. Layuhandjula kuki y'ehotela, la mpimbula tukengiti ta mbulu. 3 Dimi layukusha ukundji wushami La diango di'ushinga a wulu diukhundami; Dia we mbeya wati: Dimi keli Latuyalaka, Unyashungu wa Isariyele, latuketaka lukumbu laye. 4 Ne dia ngandji kukami ukambi ami Jakoba, Osonami ami Isariyele, mbatumuketaka lukumbu laye. Kuyanga we hambeysi, dimi lambukusha lukumbu la nemo. 5 Dimi leli Latuyalaka, nduku ukina, Ee, nduku Unyashungu ukina weko. Kuyanga we hambeysi, dimi katukukitshaka, 6 Dia antu w'uma l'ehutwelu ndu w'uma l'edjelu mbeya vati: Nduku Unyashungu ukina weko. Dimi leli Latuyalaka, nduku ukina. 7 Dimi katutumaka usasi la udjima. Dimi katelaka ki ndu ohenyoheheno. Dimi, Latuyalaka, katutshaka aka mbu aso tshe.

Latuyalaka Keli Utungi

8 Ulungu alosa sambu k'ololo uma ladiku, Ku wangi wakikedia, kete yadiho dia panda nto elua loko, Ndu ethshungwelu katumbi uma loko. Dimi Latuyalaka katutungaka akambu aso. 9 Mananu kayali le one latamaka l'Utungi andi! Puki l'atei a puki ya la kete! Diwumba mbeyaka mumbula one ladikinga ati: Akingaye na? La engo kukingindi mbeyaka mbutela ati: We kema l'anya? 10 Mananu kayali le one latumbulaka umbutshi a pami ati: Kakona keye lu mbuta? La le umuntu ati: La na atataye lono? 11 Okone mbata Latuyalaka, L'Ekila l'Isariyele, la Utungi andi, ati: We nangaka mumbulami akambu wahatayi? Ndu we nangaka mbidjangelami adjangu dikambu di'ana ami, La dikambu di'ulimu w'anya ami uka? 12 Dimi lakutungi kete, Ndu untu ludjashi ladiku diayo. Dime kakananula ulungu l'anya ami. Dime kakadjangela ului awo tshe adjangu. 13 Dimi lakudia Kuro

lu sambu k'ololo, La dimi layukitanyia mbuka yandi tshe. Ndi ayuhika usumba ami. Ndi ayutshungula antu ami uma lu fumbi utshungulatshungula, Aha la difutu di'etshungwelu, mbata Latuyalaka Kanga lulimilimbi.

14 Latuyalaka kata okone ati: Ukundji w'Edjibitu, ongonyi w'Etiyopiya, Ndu asi Seba, antu w'etalii, Wayuya la ntundu kaye, wayuyala waye. Vo wayuya wukelekaami la molola, wayukuyela, wayukukhusamela, Wayukolemia vati: Unyashungu eko la ye. Nduku Unyashungu ukina weko, paka ndi.

15 Mete, we keli Unyashungu latuyasheka, Unyashungu wa Isariyele, Ushimbedi. 16 Asedi wa dikishi tshe wayukanana, Wayutewala, wayolombo la sonyi kame. 17 Keli nyu, asi Isariyele, nyayushimbamela Le Latuyalaka la the panda ka pundju, pundju. Nyu hanyuhananaki, hanyutshamaki sonyi.

18 Okone mbata Latuyalaka, Lakatungi ulungu (ndi eli Unyashungu!), Lakatungi kete, ndu lakayitshi (ndi kakayishikike; Ndi kuyitunga utungatunga, Keli akayitungi dia antu mbindase loko!) kata ati: Dimi keli Latuyalaka, nduku ukina. 19 Dimi konteketa lu usheshe Kana lu dihuli dia udjima dia la kete. Dimi kumvutela dihuu dia Jakoba Dia vo nyangami uyangayanga. Dimi Latuyalaka latutaka akambu wa mete, Latoteketaka akambu w'usimbwi.

Dikishi Dia Babilona la Latuyalaka

20 Nyu wane wakahandi l'atei w'asi wedja, Nyomote, nyuyi, nyusukani kame. Waku watembaka dikishi diawo di'etamba, La watolombaka etemolatemola kaheyi mbashimbela, kema la yimba. 21 Nyotekete, nyuwaela, walakan kame! Akona akati dikambu ne edjedja? Akona akaditeketa lu nshi ya ntundu, aha dimi, Latuyalaka? Nduku Unyashungu ukina weko, Dime keli Unyashungu w'ololo la ushimbedi, nduku ukina. 22 Nyu tshe wa la kuma ya la kete, Nyukadimo uya le mi, ku nyayushimbamela, Ne dia dime keli Unyashungu, nduku ukina. 23 Dimi lambuyatshiba la diui dia shikaa uma l'unyo ami, Diaheyi nkalula ukalulakalula nti: Adui tshe ayunkhusamela, La nimi tshe yayutshiba dia mbekama le mi. 24 Antu wayutaka vati: Sambu k'ololo la wulu weko paka le Latuyalaka ndame. Antu wayuyakaka le ndi, Keli waku tshe watuwukaka kele, wayutshama sonyi. 25 Tukanula ta Isariyele wayuyindjama, Ndu

wayutumbwama le Latuyalaka.

46 Dikishi dianyu, Bele la Nebo, diamboko. Nyu nyambudiemba, nyambudiae ladiku dia punda la ngombe. Dio diambuyala ushiko ladiku dia nyama yambokomo. 2 Dikishi diako diamboko kame. Dio hadieyi nshimbela wudja. Dio diame diambembamba utsha lu fumbi.

3 Nyumbukeli, nyu wa lu luudu la Jakoba, Nyu atshikadi tshe wa lu luudu la Isariyele. Dimi dime kakanyulamaka l'etema w'anyengenyu, kakanyembaka umak'eutwelu kanyu, 4 Edja ndu esumbi anyu. Layunyusukelaka, Edja ndu lam'ayunyuyala esumbi wa lukusumbi. Dimi lakanyembe, layunyembe ntu. Dimi layunyusukela, layunyushimbela. 5 Akona ayunyumbedika la ndi, Dia dimi mbedima la ndi? Akona ayunyunfanya la ndi, Dia dimi la ndi ndjala pupu? 6 Antu mbatutundjaka paunyi uma lu atapa awo, Mbatedikaka fesa lu kilo, mbatutufaka utshudi wa paunyi, Dia ndi mbatsheha etemolatemola uma loko. Ku vo watukikhusamela, watukitemolaka. 7 Vo watukiediaka, watukiembaka lu diheka, Ndu watukikitshaka lu dihuli diato, Ku to katutshikalaka leko. To hakieyi nsukasuka. Lam'atukilelelaka untu, to hakieyi mbukaluya diui, Kuyanga mbushimbela uma lu pa kandi. 8 Nyu akanga w'ehedia, nyuho dikambu ne, Nyukani yimba loko, nyudikitsa l'utema. 9 Nyuho akambu waki lu nshi y'edjedja, Ne dia dimi keli Unyashungu, nduku ukina. Dimi keli Unyashungu, nduku ukina lufanyi le mi. 10 Dimi lakataka l'etatu akambu wukuyala l'ekumelu, La lu nshi y'edjedja akambu wahatayi. Dimi lambuta nti: Alaka ami wayushikikala, Ku layutsha kene tshe kalangami. 11 Dimi laketi pungu uma l'chutwelu, Untu uma le kete y'etalii, Dia ndjushidiya sangweyu diam. Dimi lakati dikambu ne, layudishidiya. Lakadisanguya, layuditsha.

12 Nyu wane watukikitshaka etema, Wakangana uma lu panda, nyumbukeli. 13 Dimi lambusukanya etshungwelu kami, To kema etali ntu. Panda kami hatshimbatshimba. Dimi layukitsha panda kami lu Siona, Ndu lutumbu lami lu Isariyele.

Elumbwelu ka Babilona

47 Babilona li, we usekaseka a umuntu, Ukiti, udjase l'atei a ditshu. We Kaladiya, ona umuntu, udjase lu kete, Aha

lu kitika diulelu, Ne dia vo hawuyuketa engo k'ololo ka dimena ntu. 2 Ose ukanda, oto asami; unya kitambala kaye, Ukululi ahondo aye w'ushinga wulu; Utshiki pelohelo l'andja, uteho kushi weme. 3 We ayuyala utakataka, ayutshama sonyi. Dimi layosomboya, haluhandja nduku untu, 4 Mbata Utshungudi asu, l'Ekila la Isariyele, Letawo vati: Latuyalaka Kanga lulimbilimbi. 5 We Kaladiya, ona umuntu, utshu, utudjase ki lu udjima, Ne dia vo hawuyuketa umbuledi a waulelu ntu. 6 Dimi lakuki wudja ami kele, Lakonyola ukito ami, lakâkimo l'anya aye, We kumbauka ketshi. We akasuya esumbi la elimu a wulu. 7 We akataka vati: Dimi layuyalaka umbuledi pundju. We kunama akambu ane l'utema, Kuyanga nkana yimba ne dia ekumelu kawo.

8 Kakiane ulungi dikambu ne, we latuyangenyangenyaka, We latudjaseka la lutui tshitshi, We latutaka l'utema aye vati: Dimi, nduku ledimi la mi. Dimi handjalaki wadi aki udu, kuyanga nshisha an'ami! 9 Keli akambu ane ahendi: Eshishwelu k'ana la wadi aki udu, wayuya le ye shashimuya. Kuyanga we la wetshi la ekanga efula, vo wayukuma le ye, 10 Ne dia we akekamaka lu kolo yaye; Akataka vati: Nduku untu lamena! Yimba yaye la ewu kaye wakakukesaka. Ku we akataka l'utem'aye vati: Dimi, nduku ledimi la mi. 11 Okone kolo kayuya le ye, Ohenyohenyo wayuya le ye. We heya mbutshanya. Elanyelu kahayeyi kiyaya le ye shashimuya. Ekanga aye haweyi nldshimba.

12 Emali l'atei w'ekanga aye ndu w'awulu aye, Watuyutshaka umaka nshi yaye va dikenda. Tendi kana vo wayukusha wulu, Kana wayukukimanya dia mbutshsha antu woma. 13 We ambuheko nungamela ekimanyelu Uma le ambeiyi w'akambu wa l'ulungu, watendaka toto, Watutaka akambu uma lu talelu ta ngondo. Vo wemali, wakushimbeli, wakuteli akambu wahatayi. 14 Enda, vo weli uku adiyu; dja yayatshumba. Vo haweyi ndjashimbela uma lu lumbi la dja. Dja yako hayukuka untu djuka, Kuyanga nsukana suki la yo. 15 Osoku mbayuyala elanyelu ka waku watukambaka la ye, Waku watukukesaka umaka nshi yaye ya dikenda. Vo wayudiangana untu l'untu lu dihuli diandi, Nduku otoi ayeya nkushimbela.

*Ambuhangwela Isariyele
Dia Uhedia Awo*

48 Nyuhukami, nyu wa lu luudu la Jakoba, Watetamaka lukumbu la

Isariyele, Ndu wakatumbi uma lu dikila dia Juda, Watutshibaka lu lukumbu la Latuyalaka, Watetaka Unyashungu wa Isariyele aha lu mete, kana lu ololo. 2 Vo watuyatata vati: Asi usumba w'ekila mbesus; watekamaka Unyashungu wa Isariyele, Letawo vati: Latuyalaka Kanga lulimbilimbi. 3 Umaka nshi y'edjedja, mbakamatata akambu wahatayi. Vo wakatumba uma l'nyo andi. Dimi lakâsanyaka, shashimuya mbakamâtshaka, Ku vo wakashidiyamaka. 4 Dimi mbeyaka nti: We eko kanga utema a wulu. Kingu kaye keko uku luwulu, La fumu kaye keko uku ohotela. 5 Diako mbakamatutela akambu ane nshi y'edjedja. Lakakenyawo ntundu vo watayala, we utuyuta vati: Ekishi kami kambâtsha. Ekishi kami ka lutshula la ka lolelolâ, mbakadjanga. 6 We akuki akambu ane, ambalimbite, Undi, we huyala omenyi loko? Umaka kakiane dimi layukenna akambu w'eyuyu, Akambu wushami wakiye kumbeya. 7 Vo wambutumba kakiane, aha lu nshi y'edjedja. We atawaalkaka nduku lushi paka elo, We utukuyuta vati: Lambuwaeyaka. 8 We kumbauka, kumbaeya nduku yema, Ee, uma lu nshi y'edjedja atui aye waki khu, Ne dia dimi lakeyi nti: We kuludi too la lukesu, Ndu we aketama uma l'utema wa nylo ati: Kanga uhedia.

9 Ne dia lukumbu lami, mbamu-mushimba kele kami; Ndu dia lutumbu lami, mbamumuyakimela, dimi ntukukudiaka. 10 Dimi lakakutshulula, aha uku atuwutshululaka fesa, Keli lakedika lu khuka k'asui. 11 Ne dia dikambu diam, Ee, ne dia dikambu diam, mbayumutsha akambu ane. Ukundi ayonywama lukumbu lami? Dimi hakimo lutumbu lami le untu ukina. 12 Umbukeli, we Jakoba! Ee, we Isariyele lakameti! Dimi dime, keli etatelu ndu ekumelu. 13 Lunya lami mbakakitsa tshina dia kete, Lunya lami la pami mbakananula ulungu. Lam'atumuwaetaka, vo watuyakaka esadi. 14 Nyu tshe, nyusangani kame, nyuki! Ekishi kakona l'atei a ditemolatemola dianyu kakati akambu ane? One latulangemaka le Latuyalaka, ayutshela Babilona uku alangandi. Ndu lunya landi layuyala wulu le asi Kaladiya. 15 Dimi dime kakateketa; ee, dime kakaweti. Dimi kakawela, ku ndi ayuluwanya akambu andi. 16 Nyusukani le mi, nyulungi dikambu ne, Umak'etatelu dimi konteketa lu usheshe. Umak'etatelu k'akambu ane, dimi laki lawo. Ku kakiane Khumadiiondo, Latuyalaka akantumi, ndu

Nyuma kandi.

17 Okone mbata Latuyalaka, Utshungudi aye, l'Ekila la Isariyele ati: Dimi leli Latuyalaka, Unyashungu aye, Latuketshaka dia we nduwana. Ndu latukolombolaka lu mbuka kahumbaye ntsho. 18 Utunduyala we akalungi elembe ami, Tshiki ki kaye kutuyala utamanya, La sambu kaye k'ololo kutuluwana otekoya; 19 Tshiki tukanula taye tutufula uku losenga, La an'aye wutuyala efula uku seke ya lokongo; Tshiki lukumbu laye tutululana, Tutuluhamelama uma la ntundu kami.

20 Nyutumbi uma la Babilona, Nyulawo uma l'atei w'asi Kaladiya! Nyuhangohango nyati: Latuyalaka Akatshungula ukambi andi Jakoba! Nyimbaki dikambu ne l'ongenongeno, Nyutaditaka pulu ndu la kuma ya kete. 21 Nyutaki nyati: Vo kumvo la pusa k'ashi Lam'akandatålombolaka l'esui wa shenga. Ndi akâtundjiya ashi uma lu dive, akati dive, Ku ashi wakafukofuko. 22 Latuyalaka kata ati: Ki kema le antu wa kolo.

Isariyele, Ukambi wa Latuyalaka le Wedja

49 Nyulungi, nyu wane wudjashi lu asenga. Nyuhukami, nyu wedja w'etali. Latuyalaka akambeti uma l'utema wa nyomi, Akambole lukumbu umak'eutwelu kami. 2 Ndi akete unyo ami uku yombo ya diesa. Ndi akankumbi la didjidji dia lunya landi; Ndi akambete luhitu la sodi. Ndi akambishe l'ukulu andi a pitu. 3 Ndi akamvutela ati: Isariyele, we keli ukambi ami, Uma le ye mbayumutumbwama. 4 Keli dimi lakati nti: Dimi lakakambi ukambahamba. Dimi lakashisha wulu ami ushishashisha. Keli dialelu diamti di'ololo dieko le Latuyalaka, La difutu diamti dieko le Unyashungu ami.

5 Latuyalaka akantungi l'utema wa nyomi, Dia dimi ndjala ukambi andi, Dia nkalya Jakoba le ndi, Ndu dia nsanganya Isariyele la ntundu kandi ntu, Ne dia dimi lambolembiama lu ashu wa Latuyalaka, La Unyashungu ami eko wulu ami. 6 Kakiane ndi ambuta ati: Eko dikambu dia tshtishe dia we ndjala ukambi ami, Dia mbulula wedja wa Jakoba, La dia nkalya atshikadi wa Isariyele. Kakiane dimi lambukete usasi le asi wedja, Dia we nkumia panda kami lu kuma ya la kete.

7 Okone mbata Latuyalaka, Utshungudi wa Isariyele ndu l'Ekila landi, La one

latuhetshamaka le wedja, Latuwengaka waengekhu, ukambi w'ambuledi, ati: Khumi ya dikanga la ewandji wayukena, wayunela. Vo wayotemola Latuyalaka leli la kolamelu, Ee, l'Ekila la Isariyele, lakakosonola.

Ambulaka Dia Mbulula Siona

8 Okone mbata Latuyalaka ati: L'etena ka ngandji kami kayumukukaluya diui, Ndu lu lushi la panda mbakamakimanyia. Dimi layukulama ndu layukushiki, Dia we mbindja la wudja sheki, Dia we mbulula luhangga, Ndu dia nkahanya ahuli wakalana; 9 Dia we mvutela asi lukana wati: Nyutumbi; La wane wudjashi l'udjima wati: Nyutumbi l'usasi. Vo hawuhumba ma lu mbuka, Ne dia wayutatanaka mbu ya nde l'ete w'akuna. 10 Vo hawuyala la ndjala kuyanga pusa k'ashi; Yanyi hayuwahetela wulu, Ne dia one latuwaukaka ketshi ayalombola, Ee, ayalombola l'umamu wa teko di'ashi. 11 Dimi layete ekungu ami tshe mbuka, Ndu layukitanya esese ami. 12 Enda, vo wayuya uma l'etalii: Amotshi uma la ngel'a kushi, Ndu uma l'edjelu ka unya, La akina uma lu kete ya Sinime. 13 Ulungu, ongenengene; kete imbi usambu w'ongenongeno; Ekungu, nyudji dielu di'ongenongeno! Ne dia Latuyalaka ambusamba wudja andi, Ndu ayuka emenyi fono andi ketshi.

14 Keli Siona akataka ati: Latuyalaka ambonseka Khumadiondo ambumbuhela. 15 Wali mbeyaka mbuhela ona lalomandi? Umbutshi huki on'andi lakanduti ketshi uka? Vo mbeyaka mbuhela undu, keli dimi haleyi nkuhela. 16 Enda, lambufunda lukumbu laye lu anya ami, Peli dia usumba aye ndjalaka nshi tshe la ntundu kami. 17 An'aye watusamanyaka Wane wakakulanyaka la wakakuhandjulaka, Wayumo uma l'atei aye. 18 Edia ashu aye, endi l'utshimba. We henyi vo tshe wambomota kame, wambuya uya le ye: Uku wemi la lumu! mbata Latuyalaka, We ayuyalotshawo uku elengalenga. We ayuyakelekawo uku atolotaka Usekaseka a umuntu layanga ntshukama. 19 Umaka kakiane, Antu aye wayuyala pika lu ahuli wakalanyema Ndu wakayala atongo atu lu wudja aye. Ndu wane wakakomenaka esidia, wayangana etali. 20 An'aye wakuto lu fumbi, wayuyukutela vati: Dihuli diemi, diambotekoya pika, Unyangeli dihuli diayukuka dimi mbindjase. 21 Ku we, Siona, ayuta l'utema aye wati: Akambelawo na? Ne dia dimi lakashisha an'ami, lakatshikala uku ekumba; Lakayala fumbi ndu yekeko, ku

akona akawaudia? Dimi lakatshikala dime; ku ana ane, uma lendi akiwo?

22 Khumadiondjo, Latuyalaka kakati okone ati: Enda, layedia lunya lami utsha le wedja, Layuhane ekuku kami ka koi utsha le antu. Ku vo wayuya la an'aye w'apami l'anya awo, Wayemba an'aye w'amantu lu aheka. 23 Khumi ya dikanga la wadiewo wayukuleshaka. Vo wayokole dundji diawo la kete, wayukotemola; Wayolombola ditshu di'uma lu akaka aye. Ku we ayeya wati: Dimi keli Latuyalaka, Ne dia wane watunkungelaka, hawutshama sonyi.

24 Untu mbeyaka mpotola engo ka dimbu uma le kanga wulu? Kana ntshungula fumbi uma le kanga ngala uka? 25 Elu, mbata Latuyalaka, Fumbi yakandama le kanga wulu, mbeyaka ntshungwama, La engo ka dimbu kakose kanga ngala, mbeyaka mpotwama; Ne dia dimi layolo la wane watukoloshaka, Ndu dimi layushimbela an'aye, 26 Dimi layuleshaka wane watukusuyaka emunyi awo hita. Ndu vo wayono dikila diawo hita, Wayudidjo uku wanu w'uyuyu. Ku antu tshe wayeta vati: Dimi keli Latuyalaka, Ushimbedi aye, Utshungudi aye, Kanga Wulu la Jakoba.

Latuyalaka Nkimanyiaka Wane Watuwekamaka

50 Latuyalaka kambula okone ati: Lend'eli mukanda wa ndjaka diwala, wakamaseke nyengenyu? Kuyanga l'atei a wane wunkuli abasa, Le akona akamanyusundja le ndi? Enda, nyu nyakatshanyema ne dia ehdia anyu, Ndu nyengenyu akasakama ne dia kolo yanyu.

2 Lam'akamayi, dikambu kuna diakimi kuntana nduku untu? Lam'akameti, dikambu kuna diaki untu kunkaluyami diui? Undi, lunya lami mundumundu mbelo, Mbahalakuki mbatshungula? Dimi kema la wulu wa mbashimbela uka? Enda, la luhangu lami mbamumumia ashi a waki, Mbamumukadimula ekedi shenga. Nsi yawo yayovo la pusa k'ashi. Yo yayuvala sulu, ne dia kema ashi. 3 Dimi layolotsha ulungu udjima a tshududu, Ndu layükumba ulangitshi wa dikuta.

4 Khumadiondjo, Latuyalaka lambumbishalulimil'luluwanyi Ladimimbeya ndakanya one lambokomo, Atumbetulaka pindju tshe, Atudihulaka atui ami dia vo mbuka ololo. 5 Khumadiondjo, Latuyalaka akandjhila atui. Dimi kumbuhedia, kuyanga nkalula ekongokongo. 6 Dimi

lakalungi okongo le wane wakankomolaka, La luwanga le wane wakambikulaka ndedu. Dimi kuminya elundji kami uma lu sonyi, La umu lu soi yakawampongwelaka. 7 Khumadiondjo, Latuyalaka atunkimanyiaka, Diako mbahamatukanda-kandaka, Mbatumukikitshaka elundji kami uku dive. Dimi mbeyaka nti: Halutshama sonyi. 8 One latunyindjaka, eko suki. Akona ama la mi na? ndi atumbi, temali kamé! Akona eli utunyi ami? ndi asukan! 9 Enda, Khumadiondjo, Latuyalaka atunkimanyiaka. Akona ayumbidja mananu? Enda, vo wayolemba uku emusu w'ahondo, ku wediya ayuwale.

10 Untu tshe l'atei anyu latukaka Latuyalaka woma, Alungi diui di'ukambi andi. La one tshe latokendakenda lu udjima, aha l'usasi, Alungamelu lu lukumbu la Latuyalaka, ekami Unyashungu andi. 11 Enda, nyu tshe wahetsha dja ndu wakime ewa, Nyokendekende lu dja la lu ewa wakanyahetsha. Uma lu lunya lami, mbayukuma dikambu ne le nyu. Nyu nyayetama l'atei w'asui.

Aui wa Nsamba Siona

51 Nyumbukeli, nyu wane watuyelaka sambu k'ololo, Watuyangaka Latuyalaka. Nyendi dive lene akanyaselama, Ndu wuku wa difuku lene akanyosama. 2 Nyendi shenyu Abarahama, ndu Sara lakanyuti, Ne dia ndi ndame kakameti. Dimi lakôtschokola, lakûfudia. 3 Latuyalaka ambusamba Siona, Ndi ambukanelala ahuli tshe wakalana loko. Ndi ambukadimula shenga yayo uku Edena, Ndu ahuli w'anyanya uku ekambo ka Latuyalaka. Ongenengeno a wuki ndu wa mamba wayutanema l'atei ayo, Ndu eukelu ka lusaka la embel k'esambu.

4 Nyu antu ami, nyuhukami, Nyu wudja ami, nyumbisha lutui, Ne dia olembe ayutumba una le mi, La dimi layushikike olembe ami. Dia vo ndjala usasi w'antu. 5 Sambu kami k'ololo keko suki, panda kami kutsha ntumba, Ku anya ami wayulumbuya wedja. Asenga wayungelaka, wayekama lu lunya lami. 6 Nyedia ashu utsha l'ulungu, Ndu nyuhuluya ashu utsha la kete. Ulungu ayunyema uku dinga. Kete yayoko uku umusu wa dihondo. La wane watudjaseka loko wayovo uku tshingu. Keli panda kami kayutshikalaka pundju, La sambu kami k'ololo huyala l'ekumelu.

7 Nyu ambeiyi w'akambu w'ololo, Nyu wane watudjaka olembe ami l'utema, nyuhukami. Tanyukaki dionyo di'antu woma,

Ndu tanyudidimaki lam'anyotengawo. 8 Wediya ayuwale uku atuwolekaka ahondo. Tumumbu tayuwale uku atutoleka ahondo wa diosa. Keli ololo ami ayutshikalaka pundju, La panda kayugalaka lu nonga tshe.

9 We lunya la Latuyalaka, emo, emo, ukikitali, Uku akayemoka nshi ya ntundu, lu nonga y'edjeda! Aha we kakatshatsha Rahaba, kakatundutnduya shimiamba? 10 Aha we kakumia ashi w'angundu, Kakati osese l'uduwa dia atshungwami mbeta? 11 Atshungwami wa Latuyalaka wayukalula, Wayuya la Siona wayimbi esambu. Ongenongeno wa pundju wayulula l'etema awo, Wayongenangena utamanya. Okei la akhumu wayumo etali uma le wo. 12 Dimi dime katukusambaka. We na, dia we mbuka untu lukuvo woma, La ona untu lufanyi l'adiyu? 13 Ukundi ambusuhela Latuyalaka, Utungi aye, Lakananula ulungu ndu lakahike atshina wa kete. Ku we ndjidimaka nshi tshe ne dia ngala k'utunyi aye, Ne dia ndi nangaka nkudiaka! Kakona kayundeya ntsha la ngala kandi? 14 One lambukutatala la wutshu ayutshungo esadi; Ndi havu, hoto lu diumbu, huhumba mbu ya nde. 15 Dimi keli Latuyalaka, Unyashungu aye, Latusutshasutshaka ashi a waki dia asukhu ndjikita. Mete, Latuyalaka Kanga lulimbilimbi keli lukumbu landi. 16 Dimi lambudja aui l'unyo aye, Lambukukumba la deli dia lunya lami, Dia nanula ulungu w'uuyuu la mpika atshina lu kete y'uuyuu, Ndu dia mvutela Siona nti: We eko wudja ami.

17 We Jerusalema, eto, eto, uneli! We akano dikoho dia kele ka Latuyalaka Uma lu lunya landi. We akano dikoho dia yimba ntshimba tshe ndu ditshi. 18 L'atei ana apami tshe wakanduti, Nduku untu ayeya mbolombola. L'atei ana apami tshe wakandudia, Nduku untu ayeya mbukimela lu lunya. 19 Akambu ane ahendi wambukunda, ayukulela na? Ohenyohenyo la elanyelu, ndjala ka kasha la yombo. Ayukusamba na? 20 An'aye w'apami wamboko la yimba ntshimba, Wambetama l'esese, uku peli kambundama l'otei. Vo wambuludiamma too la kele ka Latuyalaka, Ndu la luhanglu Unyashungu aye. 21 Okone ulungi, we omenyi fono, latudjoka aha la wanu. 22 Okone mbata Khumeye Latuyalaka, Unyashungu aye, Latoteketelaka wudja andi ati: Enda, lambunya dikoho dia yimba ntshimba una lu lunya laye, Ee, dikoho dia kele kami. We hudino ntu! 23 Layudikitsha

lu anya a waku watukusuyaka; Watukutelaka vati: Ukututali, Keli shu teti ladiku di'okongo aye. We akete okongo aye uku kete, Ee, uku osese w'ambetshetshi mbetaka.

Unyashungu Ambutshungula Isariyele Uma lu Fumbi

52 We Siona eto, eto, uyakikitsha! Jerusalema li, usumba w'ekila, Olete ahondo aye w'amena! Umaka kakiane, nduku osendji, Kana untu laki kumbahema uehekeli layukuma le ye. 2 We Jerusalema, uyaombe ditshu, udjase! We fumbi, ona umuntu a Siona, uyakelekuli ekodi lu kingu! 3 Latuyalaka kata okone ati: Nyu nyakakahema ukahemakahema, nyayutshungwama aha la falanga, 4 ne dia Khumadiiondo, Latuyalaka kata okone ati: Lu nshi ya ntundu, wudja ami wakatshu l'Edjibitu dia ntudjase leko. Ku l'okongo diku, asi Asuriya wakayâsuya ususayusa. 5 Ku kakiane, atshami na? mbata Latuyalaka. Wudja ami wakosama wosamosama? Ambuledi awo watuhangohangoka, la lukumbu lami latonywamaka nshi tshe, mbata Latuyalaka. 6 Okone wudja ami wayeya lukumbu lami. Lu lushi layumoteketa, vo wayeya vati: Dimi oso.

7 Ndi amena weli ekulu w'omembia kumu y'ololo l'ekungu li! Ee, dikendji diatudianganyaka lukumu la ki, Latelaka kumu y'ololo, diatudianganyaka lukumu la panda, Diatutelaka Siona ati: Unyashungu aye uleli! 8 Alami aye wayudja dielu di'ongenongeno. Vo wayedia aui awo, wayimba esambu kame; Ne dia vo wayenana la Latuyalaka Lam'akalulandi lu Siona. 9 Nyu ahuli wakalana wa Jerusalema, Nyudji dielu di'ongenongeno kame, Ne dia Latuyalaka ambusamba wudja andi, Ambushimbela Jerusalema. 10 Latuyalaka akakumbula dihondo lu lunya landi l'ekila, Akalusumula la ntundu ka wedja tshe. Ku kuma tshe ya la kete yambena panda ka Unyashungu asu. 11 Nyuneli, nyuneli, nyumo uma lane. Nyu wane watembaka puki y'ekila ya Latuyalaka, Nyuyaedia; tanyunandaki engo ka mindu. Nyutumbi uma la Babilona. 12 Tanyunelaki shashimuya kuyanga ndawo lulawo, Ne dia Latuyalaka ayutsho la ntundu kanyu, Ee, Unyashungu wa Isariyele ayudihela l'okongo anyu.

Sui Dia Ukambi wa Latuyalaka

13 Enda, ukambi ami ayongona. Ndi ayumbuela, ayediamma, ayumbiyama

otekoya, 14 Wuhu wakandayala engo ka wononyi le antu, Lam'akakadimo elundji kandi Ndu lam'akatshikitana dimba diandi la alimba w'antu uma l'asui. 15 Wuhu ako mbayunduyala engo ka mamba le wedja efula, Khumi ya dikanga wayudiha enyo la ntundu kandi, Ne dia vo wayena kene kakiwo kumbasanya, Wayulimitela kene kakiwo kumbuka.

53 Akona eya mbetawo aui wakatuki? Lunya la Latuyalaka lambenama le na?

2 Ukambi aka akuli la ntundu kandi uku dimonga dia wodu, Uku teketa lu kete ya wumu. Lam'atutuwenaka, ndi kema la elundji ka dimena Kana dimba dia lonyengo dia shu mbulanga. 3 Ndi akonywama, akasékama le antu, Akayala omenyi fono, akekela asui. Antu wakawushelaka dundji. Ndi akonywama, shu kumbolemia.

4 Mete, ndi akatembela asui asu, Akatutshwela la nyangu yasu. Keli shu takükani shati: Usuyami, Uhumwami, okomwami uma le Unyashungu. 5 Keli ndi akahumo ne dia kolo yasu, Akakomwama ne dia ehedia asu. Mete, ndi akasuwi dia shu ndjala kukeli, Akakomwama dia shu nkono. 6 Shu tshe takanganelu uku ekoko, Takatshu untu l'untu lu mbuka kandi. Ku Latuyalaka akawahela kolo yasu shu tshe.

7 Ndi akahenahenyama, akasuyama, Keli ndi kumvuta diui. Uku atolombwamaka on'okoko utsha l'ediakelu, Uku atolembolahala okoko La ntundu k'ahimbudi wa diosa, Osoku mbakindi kundjhihula unyo. 8 Lu asui la dialelu, mbakandanyema. Akona l'atei a lolonga landi etawo ati: Ndi akakomwama ndu akanyema uma lu kete ya wasena, Ne dia kolo ya wudja ami? 9 Kuyanga ndi kuntsha dikambu diako kana ndjala la aui wa lukesu l'unyo andi, Wakütshela diumbu kame l'antu wa kolo. Ndu la kanga ongonyi, lam'akandavu.

10 Keli Latuyalaka aketawo mbenza pa la asui. Lam'akimondi lumu landi ulambu ne dia kolo, Ndi ayena tukanula, ndu ayufudia nshi yandi. Ku ulimu wa Latuyalaka wayuluwana lu anya andi. 11 Lam'eyena ukambi ami w'ololo Elua wa ulimu wa lumu landi, ndi ayongenangena. Uma lu ndjalimbitela kandi mbayunduyindja antu efula, Ndu mbayunduwaembela kolo yawo. 12 Okone dimi layuwusha etenyi kandi pupu la antu a waki. Ku ndi ayukahana la antu a wulu diango dia dimbu, Ne dia ndi akakimo

lumu landi lu nyoi, Akalema kame w'antu wa kolo. Ndi akembela antu efula kolo yawo, Akateketela akanga w'enungu.

Ngandji ka Pundju ka Latuyalaka le Isariyele

54 We ekumba, laki kumbuta ona, laki kuntsho diemi, Uhagogango l'ongenongeno, Ne dia osekami ayuleka one lutshukami mbuta ana efula. 2 Okokole luudu laye la dipema. Unanule apema wa mvudu yaye, tuhekoki. Utaluli ekodi ndu ushikike dikoho dia luudu laye, 3 Ne dia ayudiangana lu lunya la pami Ndu lu lunya la lomoso. Tukanula taye tayulela wedja Ndu wayululanela lu esumba wa hwe. 4 Tukaki woma, ne dia we huvo sonyi. Tukananaki, ne dia we hutshama sonyi. Keli we ayuhela sonyi ya lu nshi yaye y'usekaseka. We huho lotengo lakawakotengaka lam'akiye wadi aki udu. 5 Utungi aye keli umeye. Lukumbu landi eli Latuyalaka Kanga lulimbilimbi. L'Ekila la Isariyele keli Utshungudi aye. Ndi ambetama ati: Unyashungu a kete tshe. 6 Latuyalaka, Unyashungu aye, kata ati: Dimi lambuketa ntu uku umuntu lakasekama, Leli la lunyangu l'utema, Uku wadi lakawasukula eki usekaseka. 7 Etenyi ka tshitshe kakamakoseke, Keli layukukaluya la ketshi ka mamba. 8 L'etena ka tshitshe kakimi la kele, Dimi lakakushe elundji kami. Keli uma lu ngandji kami ka pundju, mbayumukuka ketshi, Mbata Latuyalaka, Utshungudi aye. 9 Dikambu ne diambufana la nshi ya Noa le mi. Uku akamatshibi lu nshi ya Noa nti: Ashi hawukukanelaki ntu ladiku dia kete. Osoku mbatshibami nti: Dimi hakukaki kele, hakuhangwelaki ntu. 10 Kuyanga ekungu kumoka kana akuna kosekoka, Ngandji kami ka shikaa hamoki uma le ye. La daka diamni dia kia hasekoki, Mbata Latuyalaka, latukukaka ketshi.

11 Isariyele li, we usuyami, lakahenahenyamaka Ndu laki kunsambema, Ulungi, dimi layudja ave aye lu alangi w'amena! Layuhika atshina aye la ave w'edima w'ushinga a wulu. 12 Dimi layutsha ete aye l'ave wa tilili, kuki yaye l'ave wa ngaingai, Ndu eheli kaye ka lukumbu l'ave w'ushinga a wulu. 13 Ana aye tshe wayetshama le Latuyalaka, Ku vo wayuyala la ki k'utamanya. 14 We ayushikikala lu sambu k'ololo, Asui wayuyala etali uma le ye, Ne dia we hahumbi mbuka woma. Elanyelu kayuyala etali uma le ye, To husukana le ye ntu. 15 Naka vo wayukudjela

tuseki, dikambu so hadiuya uma le mi. Untu tshe layulanga ndo la ye, ayolembiamia le ye. 16 Enda, dimi kakatungi utshudi a mbulu latufufaka dja, Latutshulaka ehumo ka ta, dia ntsha ulimu ato. Dimi kakatungi ndu ulanyishi latulanyaaka.

17 Ehumo tshe kambutshulama dia ndo la ye huluwana. Lulimi tshe layukutungela dikambu l'elumbwelu, We ayuludja mananu. Oso eli sangu di'ekambi wa Latuyalaka. Oso eli eyindjamelu kawo uma le mi, mbata Latuyalaka.

*Esengoyelo ka Ushasha
wa Ketshi le Antu Tshe*

55 Nyulungi, nyu tshe weli la pusa, nyuyi lu ashi. Ndu nyu wane waha la falanga, nyuyi, nyuyose, nyono. Nyuyi, nyuyose wanu la awele wososa, aha l'ushinga. 2 Okoko wana atunyukimoka falanga yanyu lu kene kaha ma? Dikambu kuna diatunyushishaka wulu anyu lu kene kahanyulutsha? Nyumbukeli, nyolekaki kene keli ololo. Etema anyu wangenangenaki lu mbu ya nde y'ololo. 3 Nyuhuke atui, nyuyi le mi. Nyumbukeli, Ku etema anyu wayuyala la lumu. Dimi layudja la nyu sheki ya pundju, Dia nshikike ngandji kami le Davidi.

4 Enda, lakükitscha omenyi le wedja, Umbuledi la olombodi le antu. 5 Enda, we ayeta wedja wahayeyi. Ndu wedja wahakeyi wayulawo le ye, Ne dia Latuyalaka, Unyashungu aye, Ne dia l'Ekila la Isariyele, kambukutumbula.

6 Nyuyangi Latuyalaka lam'eyandi ntanema. Nyôlombaki lam'ekindi lasuki. 7 Untu a kolo aseke mbuka kandi, La one latusanguyaka kolo akimo tukanyi tandi. Akaluli le Latuyalaka, ku ndi ayuwuka ketshi, Ee, le Unyashungu asu, ne dia ndi ayetawo mbudimanya tshe. 8 Tukanyi tami hatedima la tukanyi tanyu, Ndu ditshelu dianyu hadiedimi la ditshelu diam, mbata Latuyalaka. 9 Uku anganyi ulungu la kete etali, Wuhu ako mbanganyi ditshelu diam la ditshelu dianyu, Ndu tukanyi tami la tukanyi tanyu etali. 10 Uku atolokaka mvula la lungi l'ekama la tshitshi uma l'ulungu, Ku yo hayukalula utsha leko edja ndu yo yambutaloyisha kete, Edja ndu yo yambutayitemisha, yambutatumbisha tumbatumba, Edja ndu yo yambutasha umbuki a wuhu wehu, la undeshi wa ma ma. 11 Osoku mbatuyalaka diui diatutumbaka uma l'uno am: Dio hadiutukalulaka le mi ukalulakalula.

Keli dio diatutshaka lulangu lami Ndu diatushidiyaka kene kakamasanguya. 12 Nyu nyayunela l'ongenongeno, nyayolombwama la ki. Akuna la ekungu wayimba kimbu y'ongenongeno la ntundu kanyu. La etamba tshe wa l'usi wayuhuma saka. 13 Woto ayutumba lu dihuli dia atende, La wuma lu dihuli dia adungu. Dikambu so diayulyala euhwelu ka Latuyalaka, Djimbitelu ya pundju yahashilaki.

*Difutu Dia Elamelu ka
Sheki ya Unyashungu*

56 Latuyalaka kata okone ati: Nyuyeli akambu w'usimbwi, nyutshi akambu w'ololo, Ne dia panda kami kaya ka ndja, La etshungwelu kami kayenama. 2 Untu latutshaka osoku eli la otshoko, Ndu on'a unto latushikikalaka leko, Ee, one latulamaka lushi la mumuya diaha ndi lulanya, Ndu latushimbaka lunya landi diaha lo ntsha kolo.

3 Ongendangenda lambumamema le Latuyalaka tataki ati: Latuyalaka ayumamitula uma le wudja andi. Ndu olenga tataki ati: Utamba wambuma mbemi. 4 Latuyalaka kata okone ati: Le elenga watulamaka nshi yanyu ya mumuya, Watosonolaka akambu watongenyangenyaka, Ndu watushikikalaka lu sheki yami, 5 Mbayumusha dihuli la lukumbu l'atei a luudu lami, Ndu l'atei a peli diam iuleki vo ndjala la Ana apami la ana amantu ololo. Dimi layuwasha lukumbu la pundju lahashishoki. 6 Ndu asi wedja watumamemaka Latuyalaka dia mbukambela ulimu, La dia mbuka lukumbu landi ngandji, La dia ndjala ekambi andi, Ee, wane tshe watulamaka lushi la mumuya diaha lulanya, Ndu watushikikalaka lu sheki yami. 7 Dimi layuwaela l'ukungu ami w'ekila. Layangenyangena lu luudu lami la dombelo. Layetawo eshasha awo la elambu awo l'ediakelu kami. Wayeta luudu lami vati: Luudu la dombelo la wedja tshe. 8 Okone mbata Khumadiondjo, Latuyalaka Latusanganyaka asi Isariyele wakatshanyeema, ati: Dimi layusanganya ndu wedja ekina la Isariyele, Kame la wandi wakasanganyeema edja.

9 Nyu nyama tshe ya l'usui, nyuyi dia ndjole Nyu nyama tshe ya l'ukunda. 10 Elami wa Isariyele weko tutshungu, Vo tshe waha la yimba: Vo tshe weli fo ya nyumi, yaheyi mpangohango. Vo watuningonyingoka, watulangaka mbetama, watenaka alo. 11 Elami ako weli fo ya lukaki, yahatulutaka.

Elami ako hawutulimbetlaka. Vo tshe wambudiangana lu mbuka yaho hita, Dia untu l'untu ndjayangela waho walangandi; 12 Ata ati: Nyuyi, lutsha nyanga wanu. Tono dinono dia wulu wuhu w'anyanya. Katono ndu lui, ku lui djekaleka.

*Isariyele Wambanyema ne
Dia Otemwelo wa Dikishi*

57 Untu ololo avo, ku nduku untu ladja yimba lu dikambu diako. Akanga wa ketshi watunyemaka, ku nduku lakana ati: Untu ololo ambunyema la ntundu k'elanyelu. 2 Ndi amboto lu dihuli dia ki. Antu w'ololo watukundjaka mumuya lu mabetu yaho.

3 Keli nyu, ana wa umuntu kanga doka, Diuhu dia kanga munanyi ndu dia unyimba kanga luseka, nyusukani. 4 Akona asokanyu? Akona asenyu enyo? Akona aletwenyu nimi? Aha ana wa kolo mbenyu la diuhu di'akanga a kashi uka? 5 Aha nyu mbatuyakimoka l'otemwelo wa dikishi, La tshina dia utamba tshe w'uyuyu, Mbatudiakaka ana l'ekidi, lu wekuu w'ave uka? 6 L'atei ave wa lokolonga wa lukidi keli esonwele kanyu, Ee, vo weli etenyi kanyu ka sangu. Nyu nyatuwalambulaka elambu, Nyatuwatelaka elambu wa lutela. Undi, dimi mbeyaka nembohala lu dikambu diako? 7 L'ote w'ukungu w'utali kakanyakitsha tangi yanyu, Ndu leko katunyumbelaka la ntulambula elambu. 8 Nyu nyakakitsha euhwelu kanyu l'edia lukuki ndu l'edia dikoho. Nyu nyakanseke, nyakatuyakimo l'otemwelo ukina. Nyu nyakakokola etema anyu, Nyakadji la dikishi diako sheki. Nyakangenangena l'otemwelo adio. 9 Nyu nyakatshu le khum'ekanga La iso la diango di'upumu efula, Nyakatumi akendji anyu etali, Pulu ndu l'Udimu a Pengandu.

10 Nyu nyakalembe lu lokendo lanyu. Nyu kumvuta nyati: Tambuheko. Nyakakundja wulu w'uyuyu, mbakinyu kunkita balakata. 11 Akanyukia woma dia nyu mvuta kashi? Akanyusakia lukumba diaha nyu mbuhomi La diaha nkana yimba lu dikambu diamii? Lam'akamayakimela edja, Undi, nyu nyakambuki woma? 12 Layutaka dia ololo anyu la etsha anyu, Keli akambu aku hawuyala waho le nyu. 13 Lam'aletanyu, dikishi dianyu mbeyaka nyutshungula uka? Efufelu ka luwi kayudinya, Ku lopepe layudiemba dio tshe. Keli one latuyangaka eshamelule le mi, Ayuyala kanga wudja, ayukita ndu ukungu ami w'ekila. 14 Diui diayutama ati: Nyati osese, nyôlongosole,

nyutedia afuku, Nyunya utamba wa ntakanya lu mbuka ka wudja ami.

15 Ne dia Khum'Ulungu, kanga edjaselu ka pundju Ndu kanga lukumbu l'ekila, kata ati: Dimi layudjase ladiku lu dihuli di'ekila, Kame la kanga utema wambate ndu wa ndjakitshakitsa, Dia mbulula lumu la kanga ndjakitshakitsa La nkikitsha kanga utema wambate. 16 Dimi hatudjaka l'untu tamu pundju, Kuyanga ntshikala la kele nshi tshe. Nyumu yatukukita balakata la ntundu kami, Ee, etema wakamatungi, 17 Ne dia kolo ka okomiya andi mbakamuki kele, mbakamôkomola. Dimi lakawushe elundji, lakumala; Ku ndi akatetemala ndjela lulangu l'utema andi. 18 Dimi lakenyi etsha andi, layôkonoya. Dimi layôlombola, layûsamba ndi la wane watulelaka la ndi. 19 Layukitsha diandu l'elomo. Ki, ki, kayali le one leli lasuki Ndu le one leli etali, mbata Latuyalaka. Dimi layôkonoya. 20 Antu wa kolo welli uku ashi a waki Wasutshashutshama, waheyi nembohala, Ne dia ashi awo watuniyaka ditshi la lotekte. 21 Ki kema le antu wa kolo, mbata Unyashungu ami.

Dikilelu Di'Ololo Dia Ma

58 Uhangohango wulu, tukitshakitsaki diui, Edia diui uku dimana. Uteli wudja ami dia chedha awo, La luudu la Jakoba dia kolo yaho. 2 Keli vo watunyangaka nshi tshe. Vo watongenangena dia nimbitela akambu ami, Watonombaka adjangu w'ololo. Vo watulangaka nsukana le Unyashungu uku wudja watutshaka ololo; Wahatutunaka elembe wa Unyashungu awo.

3 Na uhumba wa shu nkilaka ma, naka we henyi dikambu so? Na uhumba wa shu ndjakitshakitsa, naka we hadji ashu loko? Enda, lu lushi laye l'ekilelu ka ma, We atuyakimoka lu akambu wa ndjangenanganya, Atukitshiyaka ekambi aye wetshu a wulu. 4 Enda nyu nyatukilaka ma, Paka dia mama la ndo ata, la dia nkromwana mbala ya wulu. Wuhu wakilanyu ma elo, Hawunyukimanya dia cui nkuma l'ulungu. 5 Lushi layohenyahenya untu utema andi, Layundokole ote uku lokombe, Ndu layundetama lu wanga la l'utuku, Mbayuya kilu katumulangaka? Oso kayuyeta wat: Kilu, Lushi la ngenyanganya Latuyalaka uka? 6 Aha wuhu one wa kilu katumulangaka: Nkelekula molola wa kolo, Nkelekula okodi wa lohombo, Ntshungula asuyami, La mpimbula weuhu tshe wa koho? 7 Aha dia mbiša one leli la ndjala ma, Ndu

dia mbotshiya one laha la dihuli dia mbidjase lu luudu laye? Aha dia la m'enaye untu utakataka, ku we mbolotsha dihondo, Ndu diaha mboka umyaye untu okongo?

8 Usasi aye ayoheta uku sasi dia pindju. Ekonwelo kaye kayuyala esadi. Ololo aye ayutsho la ntundu kaye, La lutumbu la Latuyalaka layudihela l'okongo aye. 9 Ku lam'ayuyolomba Latuyalaka, ndi ayukukela. Lam'ayuyuweta, ndi ayuta ati: Dim'one! Naka we ayunyu lokoho uma l'atei anyu, La etshelu ka ntshumana pita la cui wa lotengo. 10 Naka we ayuyakimo dia nkimanyia one leli la ndjala La dia munduya saki k'omenyi fono, Ku usasi aye wayoheta lu udjima, La udjima aye ayuyala uku yanyi ya midi. 11 Latuyalaka ayukolombola tena tshe. Ndi ayukutsha ehumba aye lu nshi ya pa. Ndi ayukikitsa weka aye. We ayuyala uku ekambo kamboloyama, Uku eteko k'ashi kahumi. 12 Waye wayuhika ngelu ntu lu ahuli wakalana. We ayunyiya atshina wa nonga yacketi. Wayuketa vati: Olongosodi w'ahuli wakalana, Umbuludi w'esese w'antu mbidjase.

Elemielo ka Lushi la Mumuya

13 Naka we ayushimba lukulu laye lushi la mumuya, Diahia lo ntsha lulanglu laye lushi lami l'ekila; Naka we ayete lushi la mumuya lushi l'ongenongeno, Ee, lushi l'ekila la Latuyalaka, lushi landi la nemo; Naka we ayulolemia diaha we ntsho lu mbuka yaye, Diahia we ndjakimo lu nangu yaye Kuyanga nteketa oteketateketa; 14 Ku we ayongenangena le Latuyalaka. Osoku dimi layukumbiya l'ahuli wa ladiku wa la kete. Ku layukongenanganya l'ukito wa sho Jakoba, Ne dia Latuyalaka ndame kakati osoku.

Eshwelu ka Kolo ya Wudja

59 Nyuki, lunya la Latuyalaka kema mundumundu. Ndi mbeyaka nyushimbela, Atui andi kema khu, ndi mbeyaka mbuka. 2 Keli ehdia anyu mbambunyatanya la Unyashungu anyu. La kolo yanyu yambunyushela elundji kandi diaha ndi nyukela, 3 Ne dia anya anyu watululaka too la dikila, La pita yanyu too la kolo. Elomo anyu watoteketaka akambu wa kashi, La nimi yanyu yatutaka akambu wa kolo. 4 Nduku latuyelaka sambu k'ololo, Nduku latutaka akambu wa mete, Vo watekamaka akambu w'ananya, watutaka kashi, Watutshoka waemi wa kolo, watutaka ehdia. 5 Vo watuhuhulaka ekeli wa dikhuha,

watelaka etci wa dihuha. Naka untu ayole ukeli omotshi, ku ndi mvo; Naka ayoteta omotshi, ku ului ntumba. 6 Etei awo haweyi ndjala ahondo wa ndota. Antu hawolote diango diatshawo. Elimu awo weli elimu wa kolo, La ditshelu dia ngala dieko l'anya awo. 7 Ekulu awo watulawoka utsha lu kolo. Vo watusamanyaka dia ntutundja dikila diaha la unungu. Tukanyi tawo teli tukanyi ta kolo. Ohenyohenyo la elanyelu weko lu mbuka kawo. 8 Vo haweyi mbuka ka ki. La nduku dikambu di'usimbwi dieli lu mbuka yawo. Vo wakayatela mbuka y'akote akote. Untu tshe latokendakenda loko, heyi ki.

9 Ne dia akambu w'usimbwi weko etali uma le su, Mbahakumi panda le su. Shu tatulungamelaka yanyi, ku udjima utu. Shu tatukungelaka usasi, Keli tatokendakenda lu luhutshihutshi. 10 Shu tatamatambaka eheli uku akanga a tutshungu, Tatekekaka uku antu waha la ashu. Tatufakanaka la midi uku la hyutshihutshi, Uku edu l'atei w'akanga a wulu mbesu. 11 Shu tshe tatumulaka amu uku tambwe, Tatukhumaka akhuru uku binga. Shu tatukungaka etshungwelu, ku to kema. Tatulungamelaka panda, ku to keko etali uma le su, 12 Ne dia ehdia asu waya efula la ntundu kaye, La kolo yasu yeko emenyi asu. Mete, ehdia asu weko kame la su, Shu mbeyaka kolo yasu. 13 Takanguna ndu takahedia Latuyalaka, takaseke Unyashungu asu. Takasanguya akambu wa ngala la w'etombokwelo. Takakanai aui wa kashi l'etema, takawati. 14 Etshungwelu kakakalula ekongokongo, La panda kambemala etali. Mete kambunyema l'esese, Ku akambu w'usimbwi haweyi mboto leko. 15 Mete kakahumbama. Okone one latumoka uma lu kolo, atundamaka. Latuyalaka akenyi dikambu so, keli ndi kongenangena, Ne dia akambu w'usimbwi tawakiko.

16 Ndi akakashimo lam'akindi komena oteketedi. Ku paka lunya landi mbakükimanya, La sambu kandi k'ololo kaküshikike. 17 Ndi akakime sambu k'ololo uku engawu, Akahe lufule la panda l'ote andi. Ndi akalote esombweyo uku dihondo; Akayakumbi la kandjema uku koti. 18 Ndi ayufuta antu uku ditshelu diawo: Kele le atunyi andi, sonyi le wane watuhethshaka. Ndi ayufuta ndu wa lu asenga pupu. 19 Antu wayukaka lukumbu la Latuyalaka woma umak'edjelu, La lutumbu landi umak'ehutwelu ka unya. Latuyalaka ayuya uku ashi wa pedu, Watokelaka uma l'efufelu kandi. 20 Utshungudi ayuyala la Siona,

Ndu le asika Jakoba watukadimoka uma lu kolo yawo, mbata Latuyalaka. 21 Daka diakamalakana la wo ne nti. Nyuma kami keli la ye, la cui ami wakamadjii l'unyo aye hawumoki uma l'unyo aye kana uma l'enyo wa an'aye, kuyanga uma l'enyo w'ekana aye, umaka kakiane edja ndu pundju, mbata Latuyalaka.

Lutumbu Layuyala la Siona

60 We Jerusalema, uneli, osenyami, Ne dia lutumbu la Latuyalaka lambukuhutwela, Ee, usasi aye wambukuma. 2 Enda, hyutshihutshi ayukumba kete, La udjima a tshududu asi wedja. Keli Latuyalaka ayuyala ladiku diaye, La lutumbu landi layukohetela. 3 Ku wedja wayuya dia ndjuyanga usasi aye, La khumi ya dikanga wayusamanya uya Lu ngaingai k'esenyelo kaye la pindju.

4 Edia ashu aye, endi l'utshimba. Vo tshe wambomota kame, wuyayi uya le ye. An'aye w'apami wayuya uma l'etalii, La an'aye w'amantu wayembama lu tukundu. 5 Lam'ayuyena dikambu ne, we ayongenangena. Utema aye ayulimbolimo l'ongenongeno, Ne dia engonyi wa lu ashi a waki wayukadimo le ye, La ekundji a wedja wayuya le ye. 6 We ayukumbama l'ului wa kamelo, Kamelo y'eskaseka y'uma la Midiyana, la y'uma la Efa. Yo tshe yayuya uma la Sheba yayembe paunyi La malashi w'ushinga a wulu, yayatumbula Latuyalaka. 7 Nyimba tshe ya dungahmgaa ya la Kedara yayomotshama le ye, Ndu waumi w'ekoko wa la Nebayota wayuyala l'ulimu aye. Vo wayumbela l'ediakelu kami, Ku dimi layuwaetawo l'ongenongeno. Layutumbula luudu leli too la lutumbu lami.

8 Wana aku wayayi esadi uku wang, Wayafumbo uku bingu uyu la kefu kawo na? 9 Ne dia asenga watulungamelaka le mi, Mashua wa la Tarashishi wayuya ntundu, Dia mbela an'aye uma l'etalii, kame la fesa la paunyi yawo, Lu lukumbu la Latuyalaka, Unyashungu aye, Ee, le l'Ekila l'Isariyele, Ne dia ndi ambukutumbula. 10 Asi wedja wayuhika peli diawo ntu, La khumi ya dikanga yawo yayukambela ulimu, Ne dia dimi laki la kele mbakamakusuya, Keli uma lu ngandji kami kakukami, mbamumukuka ketshi. 11 Asuku aye wayutshikalaka hwe nshi tshe. Vo hawudihamaka la yanyi kuyanga l'utshu, Dia mbotshiya khumi ya dikanga ya wedja la atshindedi awo Lam'ayuwkelaka ekundji wa wedja awo, 12 Ne dia wudja la diulelu

wahakukambela ulimu, Wayulanyema, ee, wudja ako wayushila ushiki. 13 Lutumbu la Lebanonla layuya le ye: Esasi, eduwula, esingi, dia nenga dihuli diamii di'otemwelo. Dimi layutumbula dihuli diatumikitshaka ekulu. 14 Ku ana a waku wakakusuyaka, Wayuyakitshakitscha la ntundu kaye, La waku wakakuhetshaka, wayukhusama la ntundu kaye. Vo wayuketaka vati: Usumba wa Latuyalaka, Siona ya l'Ekila l'Isariyele.

15 Kuyanga we akatunama kana akahetshama Edja ndu nduku unto lakakindula l'atei aye, Dimi layukete engo ka nemo pundju, Ongenongeno wa lolonga la lolonga. 16 We ayulela wedja diango, ayulela ndu khumi ya dikanga. Okone we ayeya wati: Dimi keli Latuyalaka, Ushimbedi aye, Utshungudi aye, Kanga Wulu a Jakoba. 17 Dimi layukela paunyi lu dihuli di'ohotela, Fesa lu dihuli dia luwulu, ohotela lu dihuli di'utamba, Ndu luwulu lu dihuli di'ave. Dimi layete elombodi aye ki, La ambuledi aye antu w'ololo. 18 Hawuka wata akambu wa ngala lu wudja, Kuyanga ohenyohenyo l'elanyelu lu kete yaye. We ayeta peli diaye wati: Panda, La asuku aye wati: Diandu. 19 We huyala la uhumba wa unya nkohetela la yanyi, Kuyanga ekashiyelu ka ngondo, Ne dia Latuyalaka ayuyala usasi aye pundju, Unyashungu aye ayuyala lutumbu laye. 20 Unya aye hawudjaki, ndu ngondo kaye hashishoki, Ne dia Latuyalaka ayuyala usasi aye pundju. Ku nshi yaye ya delu yayushili. 21 Antu aye wayuyala antu w'ololo atu. Vo wayukita kete pundju. Vo weli lukuno lakamune, Ndu ulimu w'anya ami, dia dimi ntumbwama. 22 One leli tshitshe ayuyala kinunu, Ona one luleki tshitshe wudja a wulu. Dimi, Latuyalaka, layusamanya dikambu ne l'etena kadio.

Lukumu l'Oloolo la Panda le Siona

61 Nyuma ka Khumadiiondo, Latuyalaka keli la mi, Ne dia Latuyalaka akankiti iso Dia dimi nsambisha amenyi fono lukumu l'ololo. Ndi akantumi dia dimi nkono ya akanga w'eterna wambate, Dia mvutela fumbi dia vo ndjala la ndjadjasela, La dia mvutela asi lukanu dia vo ntshungo; 2 Dia nsanyia antu di'eleku ka ngandji ka mamba ka Latuyalaka La dia lushi l'esombweyo ka Unyashungu asu, Ndu dia nsamba antu tshe walela; 3 Dia nembohaya wane walela lu Siona, Dia mbasha alembo lu dihuli di'utuku, La iso k'ongenongeno lu dihuli di'utanda, Diandu lu dihuli di'ukananu, Dia

vo mbetama vati: Etamba wa sambu k'ololo, Ekambo ka Latuyalaka, dia vo mbutumbula.

4 Vo wayuhika ngelu ntu lu ahuli wakalana. Vo wayunyiya dihikahika diakato. Vo wayulula esumba wakalana, Dilanyelu dia nonga efula. 5 Asi wedja wayuyala leko dia Ndesha nyimba yanyu ya dungalunga. Vo wayuyala ekambi anyu wa dikambo Ndu wa lu dikambo di'elua. 6 Nyu nyayetama elombedi wa Latuyalaka. Antu wayunyeta vati: Ekambi wa Unyashungu asu. Nyu nyayole engonyi wa wedja, Ndu nyayutumbwama uma l'engonyi awo. 7 Nyu nyayukundja difutu tena pendi lu dihuli dia sonyi. Nyayongenangena lu sangu dianyu lu dihuli dia dionyo. Okone nyu nyayukita diango pendi pendi lu kete yanyu, Nyayuyala la ongenongeno wa pundju. 8 Dimi, Latuyalaka, latulangaka akambu w'usimbwi, Latuhetshaka uvi la akambu wa kolo. Dimi layunyufuta la kolamelu, Layudja la nyu sheki ya pundju. 9 Ekana anyu wayeyama l'atei a wedja, La tukanula tanyu l'atei w'antu, La antu tshe wayuwaena, wayeya vati: Vo weli diihu diakatshokola Latuyalaka.

10 Dimi layongenangena le Latuyalaka. Utema ami ayutamanya ngenangena le Unyashungu ami, Ne dia ndi akandotsha ahondo wa panda kandi. Ndi akankumbi kota dia sambu k'ololo, Uku ataheka utshuki a wadi dembo, Ndu uku atuyalengaka utshukami dengalenga diandi. 11 Ne dia uku atudihulaka kete etumbatumba, Ndu uku atomenyaka ekambo wehu, Osoku mbayomenya Khumadiondjo, Latuyalaka panda La lutumbu la ntundu ka wedja tshe.

62 Ne dia ngandji ka Siona mbahamole-mbohala, Ne dia ngandji ka Jerusalema, mbahamumuya, Edja ndu eyindjelu kandi kambenama uku usasi, La panda kandi uku uwa waheta. 2 Wedja wayenda eyindjelu kaye, La khumi ya dikanga tshe wayenda lutumbu laye, Ku we ayetama lukumbu l'uyuyu layukole Latuyalaka. 3 We ayuyla dembo dia kusu lu lunya la Latuyalaka, Ee, lufule la diulelu lu lunya la Unyashungu aye. 4 We hayetama osekami ntu, Ndu wudja aye hawetama elanyelu ntu. We ayetama ongenongeno ami, la wudja aye utshukami, Ne dia Latuyalaka atonganangenaka dikambu diaye, Okone wudja aye ayuyla la umi ntu. 5 Uku atutshukaka olongo a pamia usekaseka a umuntu, Osoku mbayukutshuka

an'aye w'apami. Uku atonganangenaka utshuki dikambu dia utshukami, Osoku mbayogenangena Unyashungu aye dikambu diaye.

6 We Jerusalema, dimi lakakitsha elami ladiku dia peli diaye. Vo hawutshikala ki ndu la yanyi ndu l'utshu. Nyu wane watuhulaka Latuyalaka, tanyumuyaki! 7 Tanyuwushaki mumuya, Edja ndu ndi ambushikike Jerusalema, Edja ndu ndi ambuyete engo ka nemo. 8 Latuyalaka akedua lunya landi la pamia la wulu; Akatshibi la etambi kandi ka wulu ati: Dimi handjusha atunyi aye mbu yaye ya nde ntu, Asi wedja hawuyono wanu aye wakayatshi. 9 Wane wakakambi mbu ya nde, wayuile, Ku wayandula Latuyalaka. La wane wakahini elua, wayono ashi awo Lu aseke w'etemwelo kami.

10 Nyutumbi la suku, nyutumbi dia ntolongoswela antu mbuka. Nyolongosole esese, nyutedia afuku, nyunya ave. Nyedia ekuku ka koi ladiku di'antu. 11 Enda, Latuyalaka ambudianganya diui pulu ndu la kuma ya kete ati: Nyuteli ona umuntu Siona nyati: Enda, panda kaye uyayi kame la difutu diandi, La diango diandi dia lukaha diambuwetela la ntundu. 12 Vo wayuwaeta vati: Wudja w'ekila, Atshungwami wa Latuyalaka. Ku vo wayuketa we vati: Uyangemi, usumba wahasekama.

Lushi l'Esombweyo ka Latuyalaka

63 Akona one ayayi uma l'Edome, Olotshi ahondo wa tilili uma la Bazera, Ayakendakenda la shunganya lu wuki wa lukumu landi? Dimi latoteketaka la sambu k'ololo, Leko la wulu wa nsimbela. 2 Okoko wana olotshiye ahondo wa tilili Uku one latohotshahotshaka elua lu ludu? 3 Dimi dime kakawamulaka lu yundja, Uma l'atei w'antu, nduku untu laki la mi, Ee, dimi lakâhotshahotsha lu kele kami, Ee, lakâhotshahotsha l'ududu ami. Ku dikila diawo diakamvutela lu ahondo, Okone ahondo ami tshe dikila tu. 4 Lushi lami la nsomboya leko l'utema ami, Eleku k'atshungwami ami kambuguka. 5 Dimi lakendi, ku nduku untu dia nkimanyiami; Lakambi ne dia nduku untu lakiko dia nsukelami. Okone lunya lami lakankimanyia, La ududu ami wakansukela. 6 Dimi lakahotshahotsha antu lu kele kami, Lakâdjuya l'ududu ami. Dimi lakatshula dikila diawo lu kete.

Ololo wa Latuyalaka le Isariye

7 Dimi layusanya dia ngandji ka shikaa

ka Latuyalaka, Dia diandu dia Latuyalaka, Uma lu akambu tshe wakandatutshela. Dimi layuta dia oolo andi a wuki le khumbu ka Isariyele, Wakadatshi uku efula ka ketshi La ongonyi wa ngandji kandi ka shikaa. 8 Ndi akati ati: Mete, antu ami mbewo, Ana wahatshaka akambu wa lukesu. Ku ndi akayala ushimbedi awo. 9 L'atei asui awo tshe, ndi akasuwi kame la wo, Ana uma le olohe kana dikendji, Keli ndi ndame kakashimbela. Lu ngandji kandi la ketshi kandi mbakandashimbela; Ndi akasukelaka, akaawaembaka tena tshe lu nshi y'edjeda. 10 Keli vo wakotombokwela, Wakanyangia Nyuma kandi k'ekila; Diako mbakandayala utunyi awo, mbakandalo la wo.

11 Ku vo wakuho nshi y'edjeda ya Mose. Wakambwama vati: Lend'eli one lakalombola wudja andi Kame l'ulami awo uma l'uduwa? Lend'eli one lakakitsha Nyuma kandi k'ekila l'atei awo? 12 Lend'eli one lukanga lunya la mamba, Lakalombola lunya la pami la Mose, Lakati ashi la ntundu kawo dia mbete lukumbu landi pundju? 13 Lend'eli one lakalomholia l'atei w'ohongo w'uduwa, Uku falasa l'usui diaha vo ntakan? 14 Uku atuhuloka nyama utsha l'ukidi, Mbakalombola Nyuma ka Latuyalaka dia vo ntumuya. Osoku mbakayalombola wudja aye, Dia lukumbu laye ntumbwama.

Dombelo Dia Mbukama Ketshi la Nkundja Ekimanyelu

15 Uhuluya ashu uma l'ulungu, Uma l'edjaselu kaye k'ekila ka lutumbu. Endi, lend'eli saki kaye la wulu aye na? Lukumbu lakasakelaka utema aye, La ketshi kakayambukaka, kambushila le mi. 16 We keli shesu, kuyanga Abarahama hatulimbetela La Isariyele hateyi kumbu. We Latuyalaka keli shesu, We katetamaka Usimbedi asu umaka mombokombola. 17 We Latuyalaka, ukundi atuyutunganyiaka etali uma lu mbuka yaye, Ndu atuyukikitshaka etema asu diaha shu nkuka woma? Ukaluli le su ne dia ngandji katukaye, Shu ekambi aye, wauhu w'ukito aye. 18 Wudja aye w'ekila wakayala akanga w'etemwelo Kaye etenyi ka tshitshe ketu, Ku atunyi asu wakakihotshahotsha. 19 Shu tambuyala uku antu wakiye kumbulela nduku lushi; Ndu waki kumbetama lu lukumbu laye.

64 Utunduyala we akati ulungu ndu akahulo, Tshiki ekungu wutusukasuka la ntundu kaye, 2 Uku atohetaka dja lu lunyi

lambuma, Ndu uku atuyuduyaka ashi, Tshiki atunyi aye wutueya lukumbu laye, Ndu wedja wutudidima la ntundu kaye. 3 Lam'akayatshi akambu a wulu wakisu kunungamelia, We akahulo, ku ekungu wakadidima la eyelu kaye. 4 Umaka mombokombola, nduku untu akuki kuyanga nimbitela, Nduku su diakenyi etemolatemola kekina, Katukimanyiaka wane watfulungamelaka uku we. 5 We atuhandjaka waku watongenangenaka, ndu watutshaka ololo, Ee, wane watukuhoka lu mbuka yaye. Enda, we akuki kele, shu takatshi kolo; Tambusawa loko edja, tayushimbamelia? 6 Shu tshe tambuyala uku akanga a mindu, La oolo asu ambuyala uku dihondo dia mindu. Shu tshe tambolengela uku dikatshi, La kolo yasu yambutemba uku lopepe. 7 Nduku untu latetaka lukumbu laye, Latuhasasaka dia nkumamema. Ntu, we akatushela elundji, We akatukimo dia shu nanye lu kolo yasu.

8 Latuyalaka li, we keli shesu. Diwumba mbesu, we keli ukingi. Shu tshe telu ulimu w'anya aye. 9 We Latuyalaka tutukaki kele ka wulu, Tuhoki kolo yasu pundju. Utendi, mbakosengasengasuu; Shu teko wudja aye. 10 Esuma aye w'ekila waya shenga tshu. Siona aya shenga, la Jerusalema elanyeli. 11 Luudu lasu l'ekila la dimena, Lene akakandulaka washesu, lambulungula. Ahuli asu w'amena tshe wambulana. 12 Latuyalaka li, lu akambu ane tshe, Ku we ndjakimelaka la ntshikalaka ki? Undi, we ayutetemala ntusuya?

Asui w'Akanga w'Uhendudi

65 Dimi laketawo mbukela wane waki konombami. Dimi laketawo ntanema le waku waki kunyangami. Dimi laketela wudja waki kumbetaka lukumbu lami. Nti: Dim'one, dim'one! 2 Dimi lakasimbula anya ami nshi tshe Le wudja w'akanga w'uhedia, Watokendakenda lu mbuka ya kolo, Watuyelaka tukanyi tawo. 3 Nyu nyeli wudja watumbutshaka kele ndu la ntundu kami, Watulambulaka elambu lu dikambo, Watutshumbaka elambu wa malashi ladiku di'atafad. 4 Nyu nyeli wudja wateteka waumbu ahuli wa mbidjase, La weuku ahuli wa ndala; Watolekaka sumbu, Ndu ushi wa sulu wa wononyi. 5 Watumvutelaka vati: Umo laku! Tusukanaki la le su, ne dia shu nkuleka oolo. Akambu ane weli dinga l'hembe ami, Ndu uku dja yatohetaka yanyi tshe.

6 Enda, kene kakamasanguya la ntundu kami nti: Dimi halolemboha, keli

layunyusuya, Ee, dimi layunyusuya lu tulu yawo, 7 Ne dia kolo yanyu, ndu ne dia kolo ya washenyu, Wakatshumbaka malashi lu ekungu Ndu wakantengaka lu akuna, mbata Latuyalaka. Okone layuwaedikela difutu uku etsha awo wa ntundu.

8 Latuyalaka kata okone ati: Uku atuwuhinaka ashi w'elua uma l'esandji, Ku vo mvuta vati: Tanyukilanyaki, Ne dia otshoko weko loko, Osoku mbayumutsha ne dia ngandji kami le ekambi ami, Diahā dimi mbalanya vo tshe. 9 Dimi layutundja tukanula uma le Jakoba, La ekito w'ekungu ami uma le Juda. Esonami ami wayukita kete yako, La ekambi ami wayudjase loko. 10 Sharona ayuyala dihuli dia dungalunga ndekaka adiyu, La ukidi w'Akora dihuli dia dio mbetamaka, Ne dia wudja ami watunyangaka.

11 Keli nyu wane watonsekaka, dimi Latuyalaka, Watuhelaka ukungu ami w'ekila, Wakalela Lukulu l'Olo mesa, Ndu wane wakasohanyia Wendjudi wanu. 12 Mete, dimi layunyukimo dia nyu ndjakema la yombo, Ne dia lam'akamanyeti, nyu kumbetawo; Lam'akamatketa, nyu kununga. Keli nyu nyakatshaka akambu waki kolo lu ashu ami. Nyu nyakasonola akambu waki nkongenyangenyami. 13 Diako mbata Khumadiondjo, Latuyalaka ati: Enda, ekambi ami wayole, keli nyu nyayuvu ndjala. Ekambi ami wayono, keli nyu nyayuvu pusa. Ekambi ami wayongenangena, keli nyu nyayutshama sonyi. 14 Ekambi ami wayimba esambu la etema w'ongenongeno, Keli nyu nyayulela la etema wa lunyangu, Nyayukhuma akhumu la ukiyanu wa l'etema anyu. 15 Nyu nyayutshikela esonami ami lukumbu lanyu la mananu. Khumadiondjo, Latuyalaka ayunyudiaka. Ku ndi ayole ekambi andi lukumbu lukina. 16 One latulangaka ntshokwama lu kete, Ayulanga ntshokwama paka le Unyashungu a mete, La one latutshibaka lu kete, Ayutshibaka paka le Unyashungu a mete, Ne dia asui wa ntundu wambuhamamelā, wambumo lu ashu ami.

Ulungu w'Uyuyu la Kete y'Uyuyu

17 Enda, dimi lutsha ntunga ulungu w'uyuyu la kete y'uyuyu, Akambu wa ntundu wayuhamamelā, hawuyuhwama ntu.

18 Nyongenengene, nyuyali la ongenongeno wa pundju, Ne dia kene kayangami ntunga. Enda, dimi lutsha ntunga Jerusalema, usumba w'ongenongeno, La

antu awo, antu w'ongenongeno. 19 Dimi layongenangena dikambu dia Jerusalema ndu dia antu ami. Alelu la tukuku t'alelu hawukema leko ntu. 20 Nduku ona layuwo lam'ekindi la nshi tshitche, Ndu usumbi havu tshikima ndi ambukutsha nshi yandi. Ona mbeyaka mvo, tshikima aya deku lukama, La untu a kolo laya deku lukama, ayudjama mananu. 21 Vo wayuhika mvudu, wayudjaseka loko; Wayune dikambo di'elua, wayolekaka elua w'uma loko. 22 Vo hawuhika mvudu, ku akina ndjudjase loko. Vo hawukamba dikambo di'elua, ku akina ndjole elua uma loko. Nshi y'antu ami yayuyala uku nshi y'etamba. Esonami ami wayongenangena ne dia elimu w'anya awo. 23 Vo hawukamba ukambakamba, kuyanga mbuta ana, Dia vo ndjakema shashimuya, Ne dia vo weli ana w'atshokwami wa Latuyalaka ndu an'awo pupu. 24 La ntundu vo watambeti, dimi layākaluva diui. Layuwaukela lam'ekiwo lu nteketa. 25 Laundu la on'okoko wayole kame. Tambwe ayole adiyu kame la ngombe. La ului ayoleka paka ditshu. Vo hawutshela nduku engo kolo, Kana kilanya l'ukungu ami w'ekila tshe, mbata Latuyalaka.

Elumbwelu ka Latuyalaka, la Engonelo Kayuyala lu Siona

66 Latuyalaka kata okone ati: Ulungu eko kiti kami ka diule, La kete eko kihuna k'ekulu ami. Wuhu akona wa luudu wukukinyu mbikelami? Lend'eli dihuli diukukimi mbidjase? 2 Lunya lami mbakatungi diango ne tshe. Osoku diamī mbedio dio tshe, mbata Latuyalaka. Enda, dimi layediya ashu ami Utsha le one latusuwaka ndu leli l'utema ambate, Utsha le one latukaka diui diamī woma. 3 Untu latudiakaka ngombe eko uku one ludiaki untu. Untu latulambilaka on'okoko, Eki uku one lokodi fo kingu. One lalambula ulambu wa shima, Eko uku one lukimwi dikila dia sumbu. Untu latshumba malashi, Eko uku one latemola dikishi. Vo tshe watosonolaka mbuka yawo; Etema awo watongenangena lu akambu awo wa wononyi. 4 Ndu dimi ntu layāsonwela lukulu l'engeno, Layātumela kene kayuwautshā woma, Ne dia dimi lakawaeti, ku vo kunkaluyami diui. Lakateketa la wo, ku vo kunungami. Keli vo wakatshi akambu waki kolo lu ashu ami; Wakasonola akambu wahatongenangenyaka.

5 Nyu wane watukaka Latuyalaka woma,

Nyulungi diui diandi. Nyulungi okone wata anengenyu, Wane watunyuhetshaka Ndu watunyusukulaka ne dia lukumbu lami, vati: Latuyalaka atumbwami, Ku shu tayena ongenongeno anyu! Keli vo wayutshama sonyi.

6 Nyulungi diui so diambutumba uma l'usumba. Diui diako diambutumba uma l'etemwelo, Dio dieli diui dia Latuyalaka, Latufutaka atunyi andi difutu diawo.

7 Siona akuti ntundu atatati lono, Ee, ntundu yatatati lono mbakayuti ona pami. 8 Akona akuki dikambu dia wuhu oso? Akenyi dikambu diufanyi la dio? Undi, utundu wa kete mbeyaka mbuto lushu otoi uka? Kana wudja mbuto l'eten a otoi? Kam'akatatela Siona lono, mbakayuti on'ayo. 9 Naka dimi layetawo umuntu ntsho diemi, Dimi layushimba dia ndi mbuta uka? Mbambula Latuyalaka, Dimi latuluwanyaka waemi, ku layushimba dia ana mbuto uka? Mbambula Unyashungu anyu.

10 Nyongenengene kame la Jerusalema, Nyogenengene kame la yo, nyu tshe watuyükaka ngandji. Nyu tshe watulelaka dikambu diayo, Nyulimbolimbo l'ongenongeno kame la yo; 11 Dia nyu ndeshama la ndutshama awele wa sambelu diayo, Dia nyu mpina awele ayo La ngenangena lu elulelu ka lutumbu layo. 12 Okone mbata Latuyalaka ati: Enda, dimi layolombewla Jerusalema ki uku okedi, La lutumbu la wedja uku kyoko yatshulotshulo. Ku nyu nyayoloma; nyayembama lu tukundu, La nyayosengama lu dihelo diayo. 13 Uku atusambaka nyangu on'andi, osoku mbayumunyusamba. Nyu nyayusambema lu Jerusalema. 14 Nyu nyayena dikambu diako, Ku etema anyu wayongenangena. La weka anyu wayukikitala esadi, Uku atukikitalaka adiyu w'omongela. Latuyalaka ayenza ekambi andi lunya landi la wulu, Ku ayuka atunyi andi kele.

15 Enda, Latuyalaka ayukuma l'atei wa

dja La pusupusu yandi uku punganendji. Ndi ayukadimula kele kandi efuki ka dja, La luhangu landi lumbi la dja. 16 La dja ndu la yombo yandi, Mbayusambula Latuyalaka akambu w'antu tshe; Ndi ayudiaka antu efula. 17 Waku watuyakidiaka ndu watuyaediaka dia ntsho l'ekambo, dia ntotemola etamba a waki, la dia ntsole unatshi wa sumbu, dji la diango dia wononyi, vo tshe wayulanyema kame, mbata Latuyalaka.

18 Dimi mbeyaka elimu awo la tukanyi tawo, etena kayuyala ka dimi nsanganya wedja tshe wa eteketa tshe, ku vo wayuya la ndjenda lutumbu lami. 19 Dimi layukitsha djimbitelu l'atei awo. Ku uma l'atei awo, dimi layutuma atshikadi utsha lu wedja: la Tarashishi, la Puta, ndu la Luda, wane watukaka eta, la Tubala la Javana, ndu lu asenga w'etalii, le wane wahatuki lukumu lami, kuyanga mena lutumbu lami. Ku vo wayututela wedja dia lutumbu lami. 20 Vo wayuya la anengenyu tshe uma lu wedja tshe uku ulambu le Latuyalaka. Vo wayuya le wo wahemii ladiku dia falasa, lu pusupusu, lu poyi, ladiku dia punda, ndu ladiku dia kamelo uya la Jerusalema, l'ukungu ami w'ekila, mbata Latuyalaka, uku atelaka asi Isariyele elambu awo lu puki ya pupidupi, uya lu luudu la Latuyalaka. 21 Uma l'atei awo, mbayumosonola elombedi la asi Lewi, mbata Latuyalaka.

22 Uku wayutshikala ulungu w'uyuyu la Kete y'uyuyu yayangami ntunga, Mbayutshikala tukanula taye la lukumbu laye La ntundu kami, mbata Latuyalaka. 23 Uma lu yalelu ya ngondo utsha lu yalelu ya ngondo, Uma lu lushi la mumuya utsha lu lushi la mumuya, Antu tshe wayuyakaka la ndjontemola, mbata Latuyalaka. 24 Lam'ayuwutumbaka, vo wayenaka edu w'antu wakantomboekwela, ne dia kusu hayushilaki laawo, la dja yatshumba edu hayudimalaki. Ku edu ako wayuyala wononyi le antu tshe.